

中華民國
新修
豐順縣志
第四冊

17687

44330.181

42

2p=56

中國農民銀行經濟研究處

列傳四 鄉善表

邑人李唐介丞甫編纂

世衰道喪奸僞萌起貪劣交橫上自當官食祿之輩服古誦數之徒皆相率以爭錐刀貨高利爲務雖罔民助俗而有所不惜清議消沉人道或幾乎熄矣吾賢有言居高位志不在國計民生居林下志不在人心世道君子無取焉舊志舉倡捐平糶助谷施粥及修橋築路一善之小俱爲立傳初以爲失之大濫顧近數十年來之人事雖欲濫而不可得蓋孟子所謂一鄉善士一邑善士者已如麟角鳳毛若舍此不錄則勸善勸俗之志益以荒矣故文欲其簡事欲不遺作鄉善表

羅拱上陽人揭湯學諸生捐田租助祭文廟經提學道張瑞俊獎德行祀揭陽學鄉賢

吳廷符字弼垣六奇父篤孝弟好施與以千貫贈光祿大夫祀潮州府學縣學鄉賢

張應制字元亮官溪人庠生性謹嚴整飭鄉規好施與鄉人感服稱之爲官溪公而不名鄉人祭於社頒昨至今不替

楊安定金甌寨人澄海學歲貢質直好義雍正連歲大饑捐金賑濟

吳 鳴璜溪鄉人以國學生屢赴鄉試不中其父勗之曰爾讀書當以報本型俗爲先功名富貴天定之敦善積德我主之父歿後每遇歲饑皆盡力賑濟遇紛爭輒力謀排解築室誦曰尙志

張錦帆城星槎雙螺口人郡庠生嚴氣正性敦姪叩道光十二三年連歲饑凡貧困者賜給之至傾囊典

豐順縣志

卷二十二

列傳四

一

汕頭錦字局梅縣分局承印

物不惜復勸捐錢谷設廠賑濟

楊紹徽字旨堂沙田鄉人治家嚴肅敦孝友咸豐土匪亂市無米售施粥救贍之

陳林濤字松軒潘田人附貢家饒裕咸豐丁巳大饑斗米千錢減價平糶遇窮困者減其穀價

張璉字文唐建橋人生員爲人約已好義鄉之石碑下係海程孔道崎嶇難行捐重資開僻之鄉有甲溪水深病涉造橋以利行人又修一渡水橋凡鄉之死喪無所歸者周恤不倦年至八十五壽

朱文德字潤軒居林人布政司理問道光甲申淫雨江漲東隴巨浸數百家不舉火者五日文德僱舟載米沿鄉散賑復修築橋路

張際雲號澄川雙螺口人勤儉自處非正經不枉費惟修橋路濟貧乏雖傾囊不惜捐巨資助建普濟橋邑令以利物濟人一匾旌其廬

李南金號錫三小勝人例貢同治匪亂設局團防最力修橋路施義渡

邱錫慶小勝鄉人自捐數百金倡築迴瀾橋復施三坑口韓江橫水渡

張偉馥字仁齋埔子寨人內午歲饑捐谷米施粥賑救掩骼埋胔無數獨貲築羊角壠石橋

徐必雍字德舉埔頭鄉人興濱良孫慷慨好施與一擲千金毫無吝色嘗曰毋以多財爲我累暮年盡焚債券以卹貧乏至於賑災修路則其餘事耳必雍以富家子涉事多遇橫逆之來不與較曾添雕忍字

懸壁自儆蓋深得寬柔以教之旨云

吳亦槐號植之歲貢城內人倡修文廟普濟橋一家百餘口同居無間世稱其孝友

朱承斌號全齋上林坑人從九品道光壬辰大饑捐銀數百兩近者施粥遠者施米癸巳又饑謀勸捐再賑人有難色自發谷百餘石獨賑不足則賣田二十餘石以益之邑令旌其廬壽八十二卒

杜亦彬蓮塘人例貢道光連歲饑捐谷倡賑咸豐寇亂捐助軍需團防邑令旌之

張騰萬連橋人道光連歲饑捐谷倡賑並勸捐平糶捐修獎坑大路

張光烈建橋人道光大饑捐錢谷設賑平糶凡貧價賈均不責償

吳文經田背人增貢生乾隆乙卯大饑捐谷五百石賑濟湯坑械鬥親往排解自費銀數百兩息其案

林世德隴隍人咸豐四年寇亂圍逼官軍世德果團勇督戰破之母歲饑輒辦平糶

鄭登清隴隍人道光連歲饑勸市商減米價平糶歷兩月餘咸豐丁巳設局平糶

黃建中斗牛鄉人例貢崇儒重道好施與道光連歲大饑捐谷二百餘石復勸各股戶捐資設賑閭里賴

之

朱德華號厚菴上林坑人隆孝養篤友恭重道尊師修橋息事卹孤寡濟貧寒典型其具乾隆歲饑捐粟

賑濟海陽豐邑令各旌其廬

李廷英大勝人好義樂施道光大饑自捐谷二百石以濟鄉人

陳其昌隴隍人凡祠基巷廟橋路靡不捐助咸豐寇亂籌餉九力同治兩次饑荒皆倡捐平糶

豐順縣志

卷二十二

列傳四

一一

汕頭縣字局梅縣分局承印

林慶東隴人好善樂施遇公益事無不捐助光緒甲辰沙田一水劇災自捐數百金邀各股戶捐助派人

散賑論者皆稱其能救災卹鄰

朱秋江諱耀宗隴隍人廩貢生光緒甲辰沙田水災捐助百金助賑自捐千元倡建兩隴公學

李席儒號祝三黃花村人質直好義築橋路修廟宇修井汲軒築鳳瀑陂設老人會立祭會皆獨方董其

成民國六年韓江舟中拾獲於商夥伴卸抱遺金六百元後如數還之五華道人聞其事遠送善書來

勸遂居於村口純陽觀飾其道

張廷高號雲峯雙螺口人建磔下佛寺築馬頭大路好雕卹貧乏

徐德裕湯坑埔頭安墩鄉人性忠實操行尤不苟凡地方鬥爭出任排解時有解囊息爭事愈縣令夙耳

其名諭爲藍田保安分局董每遇歲荒即倡發民積義倉平糶以活饑民及結束必將糶粟所得銀

款封固使同事蓋印以保存之年稍豐即召集同事原封開發又復積倉鄉人稱爲克己奉公可以風

世卒年七十有七

徐歷養號炎輝湯坑埔頭人業商暹羅對於慈善事業無不慷慨解囊贊助凡鄉里故舊在暹無寄者均

賴招待使無失所人咸德之嗣國革命事業尤踴躍輸將故迭受黨國嘉禾等獎章任籍於公益事業

尤捐助不貲其由凹子頭至湯坑一帶大路均獨資修造年八十三卒

黃吉圃湯坑大羅鄉人性溫良有厚望鄉里每有糾紛輒任排解事甯人唯力是視嘗感于鄉中教育

低落不惜重資新建啓智學校尤倡導拓殖政策現南洋荷屬一帶湯屬僑民衆多商業興盛皆其鼓舞之力也卒年五十有二

鄭君輯字性容國學生九河鄉人賦性純厚度量寬洪陸隣卹貧倡建里學平日落鄉收租素極通融曾有一度赴南坑村收租被兇暴佃戶侮辱甚且毀斗子姓輩咸欲問其交涉君輯力制止謂當容忍其度量過人歲貢生鄭芳舟爲撰像贊云天地德厚江海量洪既厚而洪何所不容公之得量實與是同橫逆不較畛域胥融始興家學大振文風一門競爽八子亢宗迄今澤留桑梓名重辟雍人稱大度世碩豐功固官啓雲祚於勿替享俎豆於無窮年八十四壽

羅維中字伯夔號處卿新樓鄉人幼入塾勤謹逾常兒天性真摯廉正不阿平居喜讀宋諸子性理書暇則以詩文與邑人丘大令紫瑞吳明經月坡相酬答所作多憂時感舊之什時見清廷變政廢科舉爲學堂歲已酉遂獨自捐貲創辦敦讓兩等小學以誨鄉人熱心教育人皆慕之民國四年縣長劉公發怡因公蒞鄉以敬教勸學匾旌其閭其弟增光以文章馳騁庠序間徐花農學使拔爲冠軍溫太史仲和長金山書院時以君兄弟皆士之賢而知禮者每對人稱爲富世機雲子松江武庫英姿煥發惜天不永其年孫翔初秉賦爽朗近且倡辦龍山中學足以徵君能以好學樂善世其家其餘曾孫輩之肄業于大學軍校或供職政界者爲一鄉之冠君晚年以捐貲賑災贈奉直大夫年七十卒

鄭流衛九河鄉人前清國學生生平樂善好施鄉里稱爲善人舉凡貧窮身故踵門乞棺木者無不施與

豐順縣志

卷二十一

列傳四

三

汕頭籌字局梅縣分局承印

對方地方公益如修築隴隍苦練橋創建九河口牛頭嶺各處風雨亭施茶施藥周濟貧苦以及興辦雲徑小學校等均有昭著事蹟爲地方人士所崇仰卒于民國廿八年冬子品軒中山大學畢業孫宗元肄業廣西大學繼民肄業同濟大學

張振春號華卿埔寨鄉人少習科舉業弱冠以家政贅父喪不任輟學乃力事生產兼營商業家遂益豐有暇仍手不釋卷尤喜讀日報明世變復銳意爲鄉里謀興革潮州各鄉自嘉道間習染泉漳械鬥風氣往往因毗睚小故輒列械決勝負爲禍實甚湯坑近揭陽亦染其習振春每出而排解曉以大義門爲之解鄉有石子塘山地沃而崎嶇久荒棄振春邀鄉人組農林公司自認股本一千三百元爲之倡復集足五千金力事墾植不數年所種果林皆垂垂實遂變爲生產之區其經營糖業居積以時遂不事務厚值尤深得陶朱計然之術光緒末葉罷科舉令天下設學堂振春倡鄉人創設二育學堂復遣其子禮亭赴日本留學並勸以學工業專門謂爲國要先富而後能強其草識可見時鄉里小民習種蠶粟振春引以爲憂每有所見輒向之諄諄曉諭譬喻百端更屢邀紳耆開會謀互爲勸誡毋任滋蔓生平性方輒寡言笑重成議無世俗氣尤篤實能愛人淮陰周偉人南社鉅子也與禮亭交以事來潮訪禮亭于家遊其石子塘農場三育學堂極稱重振春爲人爲作小傳稱其行事端方立志偉大作一鄉之長誠綽有餘裕非鄉願鄙夫所可望其項背云

朱春華字實生大龍華鄉北溪人素性慷慨嘗設塾教育子弟鄉鄰貧苦就讀者得免費

朱文瀨字紹程紫湯鄉上林村人壽歲貢上詩文嘗掌教揭邑生徒衆多負盛名平日樂善好施解紛排難有魯仲連風辛亥革命邑人推舉爲副縣長與吳正縣長海帆共維桑梓治安子丙南字壽孫應縣府試第一淮邑庠旋食廩餼孫斐然亦清增生連任紫湯鄉長治理鄉政成績卓著迭奉上峯嘉獎孫曾繁盛均能克繩祖武焉

朱迪光字照堂清廩貢賦性正直爲善鄉里人皆仰之

列傳四

耆壽表

鄉黨尚齒朝廷禮老古之道也若壽兼好德老有典型則舉邑之頌鄉賓之舉在承平時代典禮尤重舊志耆壽所傳或爲一族老成或爲鄉閭欽式多屬年高德劭之儔今擇其有特著事蹟者分別列入孝友義行二傳若庸德庸行彼此略同率無待別優異可記概列爲表庶幾事覈而文不繁俾省篇帙作者壽表

明

羅仕傳上陽人舉鄉飲賓賜帛九十三歲

清

羅鼎明上陽人郡學生八十七歲

張家達建橋人庠生八十七歲

張臻建橋舉鄉賓飲于程鄉縣

廖振琳西陽人雍正間旌八十四

豐順縣志

卷二十一

列傳四

四

汕頭鑄字局梅縣分局承印

王宗藩湯坑人雍正八年旌八十二

王廷賓環清人宿儒七十六

何宗富東陽人雍正元賜帛九十有奇

羅奕卿上陽人雍正間旌八十六

羅兆吉上陽人庠生乾隆三年賜帛九十

巫乃文大槎社人六十六

楊汝弼金甌寨人監生乾隆初舉鄉賓

連朝相東陽人七十

黃子信城廂人監生七十六

鄒宗智璜溪人衛千總八十七

羅利永上陽人八十一

楊蓉初水頭洋人恩生七十

楊國秀沙田鄉人八十六

羅元輔上陽人七十五

張文山雙螺口人歲貢負時望功不受獎七十四

張世裕密坑人舉鄉賓八十一

陳鵬英沙田鄉占頭人考授州同八十三

譚承志下潭人監生八十二

譚煥廷大田鄉人州同八十四

張鳴岐建橋圍人國子監八十九

鄭君成九河人夫婦齊眉俱壽至九十

吳啓瀨號性源高田人監生舉邑賓八十一

魏邦澤贛隍人七十六

鄭松布心人七十四

張孟鸞埔寨人順治舉大賓七十二

譚承璋大槎人七十

陳奇龍號桂山占頭人參將銜九十二

朱孔桂東陽人布政司經歷八十三

朱宗顯龍溪人壽屆百齡

胡香彬仙池人道光賜帛九十七

陳義章沙田鄉占頭人恩賜正六品壽百零三

朱彩鳳上林坑縣主簿七十五

王鐸環清鄉人康熙舉鄉飲太賓九十餘

譚琨大槎社人例貢七十一

吳渭賢龍蟠園人增生康熙舉鄉賓八十二

譚毓燕靈水鄉人監生七十五

曹仕城廂人監生七十九

譚步雲大田鄉人從九品八十五

曹彝歲貢生仕之平年七年

王時行龍溪人九十七

曹對墀城廂人從九品八十二

吳泰盛城內人監生七十九

吳成得高田人國學生八十四

李德滋黃花村人國學生七十八

楊善先沙田鄉人從九品九十五

李飛鵬黃花村人補用訓導八十七

陳肇昌沙田鄉人州同九十一

李輝光黃花村人從九品九十

李宗耀黃花村人恩貢生八十

李高霖黃花村人監生七十六

李廷桂黃花村人廩貢生七十七

朱鴻勳沙田鄉人監生九十

林輝祖沙田鄉人例貢生八十八

陳振常例貢生占頭人八十四

程葉翠金湯人一百零一

關昭漢北勝溪西人九十二

陳星麟占頭村人從九品八十五

李輔猷小勝鄉人附貢生七十五

歐陽希聖松林社人七十六

吳泰崙瑞溪鄉人九十三

豐順縣志

卷二十二

列傳四

五

油頭鎮字局梅縣分局承印

楊鴻佐湯背人監生八十六

陳河書占頭村人例貢生八十

李樹金小勝鄉人九十三

李篤蕃小勝人州同八十四

劉藁輝環清人增生九十

王煥文環清人欽賜副貢九十一

邱國珍小勝人九十

李承訓小勝人監生八十五

李騰雲小勝人監生八十七

李良桂小勝人監生九十三

李國英小勝人九十三

劉致中環清人拔貢八十四

王琳環清人恩貢生八十一

吳開祐新陂人參軍八十餘

劉玉樹環清人欽賜副魁八十八

陳應恆湯坑人縣丞八十九

羅鶴鳴大勝人八品頂戴九十一

羅元龍大勝人軍功六品八十五

徐玉鼎大勝人九十

蘇振榮大勝人從九品九十

蘇振興大勝人從九品七十六

林華明小勝人八十七

鄭伯霖一書文庠生九河人七十六

吳開煥號紹唐高田人例授州同八十六

鄭士梅九河人庠生八十六

鄭春魁九河人庠生七十四

簡乘通龍溪人九十五

吳亦梯城內之舉族正九十六

吳世謨城廂人從六品七十四

彭炳光魏鄉人舉鄉賓八十

劉家勤例貢生九十

羅元魁藍田人武庠生七十九

楊肇榮沙田鄉人例貢八十八

陳振記占頭村人例貢九十一

王顯朝瓊清人歲貢七十六

游尚炯隴隍人道光舉大賓九十五

蔡鴻集赤嶺人九十三胞弟鴻立俱九十

劉鼎廷白土人壽一百零五

賜帛長子壽春九十三賜冠帶次子壽盛九十一舉鄉賓三喜獎軍功九十二門壽考

汪鳴陽東隴埔頭人七十五

魏鳳梧東留人舉鄉賓七十五

楊紀廷沙田鄉人七十五

楊顯杰小堪人保舉把總九十九

李文珍小勝人州同七十六

曹文煥城廂人監生獎六品七十五

李春蘭小勝人監生七十九

吳登洲號士貞高田人例貢生七十六

羅元傑新樓人例贈州同九十二

吳榮先新坡人候選縣丞享年七十四

杜育萬小湯人夫婦百齡

楊德成小堪人例貢生七十五

杜國英育萬子九十六子乃聘八十四

譚史靈水村人興甯縣訓導八十三

杜紹揚小湯人八十四

何士珍蓮塘人夫婦俱九十一子國瑞七十

余開基後井人八十

劉永傑東隴人例貢生八十八妻陳氏百零八

黃頤昆隴隍人從九品八十五

李瀛洲小勝人從八品七十六

蔡廷肅西隴人夫婦七十二

豐順縣志

卷二十二

列傳四

六

汕頭鎮字局梅縣分局承印

許樂天八鄉人九十入泮九十一

蔡耀晃西留人監生七十

胡恭偉東留人八十三

鄭伯霖九河人庠生七十六

魏家合東留人八十二

魏梯雲東留人舉鄉賓七十五

蔡廷治西留人賜冠帶九十二

朱繼先拔溪人壽百齡

朱桂芳上林坑人庠生九十三

何作懋潘田人從九品八十二

張炳堃號鵬南潭江鄉人歲貢八十二

鄭天驥九河人庠生七十二

李廷桂號蕊初黃花村人廩貢七十六

鄭文漢九河人附貢生七十六

彭廷聘魏鄉人九十三

彭芝勳魏鄉人舉族正夫婦八十九

彭如耀魏鄉人八十一

廖煥西隴人夫婦七十六

黃清田東留人舉鄉賓六品九十一

鄧浙西留人舉鄉賓八十九

鄧毓璠西留人從九品八十四

陳聯東占頭人以功保六品七十七

鄭芳舟九河人歲貢生七十四

廖江潮官溪人例貢生七十

詹耀奎西留人份生八十六

鄭春山九河人歷任管帶城守現年八十

楊顯嶽布心人八十八

唐煌牛牯石凹人壽百齡奉旨建坊

李振常黃花村人同胞四人俱夫婦七十以上

羅大邵埔人年九十二妻九十四

何紹龍棠荆人廩生現年八十三

羅俊五上陽人武生現年八十

丁鏡波湯坑人現年七十

王逸叟湯坑人宿儒現年七十五

吳以瀚高田人廩貢生現年八十

劉乙燃東陽人庠生九十二

朱國鎮東陽人庠生七十

葉步變東陽人庠生現年七十

巫春莊潭江鄉人庠生現年六十九

李國光小勝人庠生現年七十

洪鳴感轉水歲貢生七十

譚星圃大田人庠生現年七十六

羅煥梅上陽人欽賜翰林九十三

陳林宴潘田人廩生現年七十

陳玉珊占頭宿儒現年八十

陳毓蘭占頭人庠生現年八十六

陳步洲占頭人歲貢生現年九十

李玉如小勝人現年八十一

李錦芳城廂人庠生七十一

鄭信之九河人七十二

李樹棠城廂人附貢生現年七十一

李文華附生八十九

鄭河鳳環清鄉人現年八十四

王鏡湖環清鄉人宿儒現年七十四

王筱臣環清鄉人現年七十四

丘炯章溪頭村人增生現年七十

吳佐臣橋背人現年七十八

朱壽山紫湯鄉上林人八十八

彭雲初紫湯鄉濁水坑人現年八十七

張義山建橋人現年八十四歲精醫術濟世人

豐順縣志

卷二十二

列傳四

七

汕頭鑄字局梅縣分局承印

彭鶴雲紫湯鄉租石坑人現年夫婦均七十

彭利賓紫湯鄉見龍園人現年七十八

彭佐清璜溪鄉高車田人九品銜現年八十六

楊鴻卿豐良鄉壩園裏人現年七十二

楊甫雲豐良鄉小樵人年八十三歲

楊炳勳建大鄉水頭洋年七十九

楊家銘豐良鄉小樵人七十六

楊朝馨豐良鄉小樵人八十三

列傳四

烈女

明

羅美娘上陽羅敬恕女自幼不妄言笑年十七歸霖田湖口高姓十九而夫亡哀哭歷數日遂自縊而殉

清

宋氏貢生宋兆榕女年十九歸舉人吳啓晉爲繼室二十六啓晉病亡生一子未周歲氏自教之讀書成名苦節三十年海陽令朱一鳳詳請旌表

張氏環清堡鄭邦懷妻年二十五而夫亡守貞至七十二歲康熙四十四年程鄉令郭廷祚旌其門日光

耀竹屏

歐錦娘松林社歐子靖女幼字吳汝潤及笄未婚而汝潤亡錦娘聞耗哀痛欲絕三日不食潛至汝潤墓哭拜歸而自縊殉之

鄒氏副將鄒瑞女監生吳廷選妻生一子年二十四而廷選亡遺孤三歲氏素知學以紡織事親教子守貞至八十九歲齡者稱其母儀師儀俱爲圖範云

彭氏生員吳三彪妻年二十四而夫病亡氏號泣三年苦守七載後立夫弟之子芳爲嗣遇姑病藥必親嘗教子入大學守節八十五歲而卒

吳氏九河鄭象善妻年二十一夫死氏時歸甯高田母家聞報奔喪哀哭盡禮矢死靡他無子立姪日觀爲嗣乾隆二十六年邑令吳蘭穀嘉其貞節詳准府憲旌以松筠勁節匾額並採入府志年七十三卒

其後昆昌盛爲九河鄭氏一大支派說者爲苦節之報云

呂氏州同吳廷遜妻年二十四而廷遜亡無子立夫弟次子爲嗣事姑以孝聞教子入大學堂環四代享年八十有五海陽令顏曾敏旌之曰節孝流芳

馮氏在城吳玉鸞妻玉鸞亡氏年二十三遺孤未周歲家貧氏事翁姑撫幼子四十六年如一日卒時親見四代同堂

譚龍姑大田譚方明女鎮將吳約之子寬聘爲妻未婚而寬亡氏聞報哭不食屢欲奔喪父母止之未逾

豐順縣志

卷二十一

列傳四

八

汕頭書局梅縣分局承印

月龍姑逕自入吳門喪服三年後立振第爲嗣邑令詳以上聞奉旨建坊

陳氏上陽人羅義烈妻年二十一而義烈亡遺腹生子旬雍正初登癸卯武科舉人氏孝事翁姑守節而終四年奉旨建坊旌之入祀揭陽節孝祠

陳氏占樓園副貢陳棐五女歸吳漢若爲妻年二十三而漢若亡遺腹生子懷源氏撫孤苦節自守八十有四卒

吳氏庠生三彪女下湯張啓庸妻年二十五夫亡遺孤甫三齡氏撫孤守節閱三十八卒康熙六十一年海陽令顏曾敏旌其門

林氏歲貢林作棟女在城吳成孝妻年二十四而夫亡氏撫孤開墾入成均壽七十有六海陽令顏曾敏旌表之

劉氏監生羅晃之王母氏年二十五而寡守節至九十二歲雍正元年賜帛

吳氏上陽羅文士妻年三十而寡守貞壽至百齡奉恩賜帛頒旌

陳氏妻上陽羅畧如年十九而寡家赤貧氏力紡織事舅姑撫孤守節卒時八十七歲雍正元年揭陽

令陳樹芝旌表之十三年賜粟帛

葉氏生員葉文斌女環清王正遠妻年二十八而夫亡時舅姑皆老遺孤尙幼氏孝事而撫育之守一

十八載乾隆八年邑紳僉呈督學梁文山旌之

林氏下埔連朝烈妻年二十三爲寡鵠遺孤生五月氏撫而成人年五十乾隆十年邑令葛曙旌其門
朱氏在城吳啓昌妻年三十三而夫亡撫孤又早世而歿復撫孫至成立年八十二卒邑令葛曙聞而旌
之

馮氏朱成梁妻年二十而寡姑亦孀守久氏撫遺孤事之乾隆五年邑令王如珩旌其門曰雙節垂範後
葛令亦旌之

黎大娘吳啓義妻年十七歸于吳未百日而吳亡氏哭之氣絕救醒後嚙指血誓不改節哀乞夫兄次子
爲嗣守節終老焉

丘氏埔寨張建福妻年二十三夫亡爲寡鵠撫孤孀守卒九十六歲五代一堂道光二十九年奉旨旌表
羅氏湯坑丁惠樂妻年二十九惠樂殉難于梧州軍次氏聞之哭不欲生既而曰親老子幼吾何忍死撫
孤志德後任碣石鎮總兵誥封大夫人年五十七卒光緒二年其戚工部郎中具疏奏奉旨旌表建坊
孫培珊拔貢署容縣知縣

陳氏浙江寧波人杭州課大使張登瀛側室道光二十九年登瀛病故氏撫諸孤至于成立每舉古今忠
孝節烈事勗諸孤咸豐十年髮逆陷杭州氏手挈嬰孺賊赴井死長媳葛氏次媳莫氏子從九品葛達
及戚莫望祀僕婦李氏家丁龐福俱殉難同治五年巡撫馬新貽具狀奏聞奉旨旌表兩媳俱受褒封
錢塘吳淦撰其死事節略爲詩百首刊行表之

豐順縣志

卷三十一

列傳四

九

汕頭路字局海縣分局承印

陳氏埔寨張爲恆妻年十九懷孕方七月不幸爲恆以病亡氏誓以身殉投繯數次俱遇救翁姑諭以遺
孤在腹宜以吾二老終養及宗祧爲念氏感悟閏二月生子姑以痛子死喪明氏以舌旦夕砥其目士
林聞而哀之作詩詠其事邑令詳其事聞於上督撫具奏道光二年奉旨旌表建坊入祀節孝祠

黃氏河南人嘉慶間城北李維慎宰汝陽時其子舉聘爲側室後遇翁病藥不效聞醫人言惟人肉乃能
療否則危矣氏夜半焚香默禱自割左臂肉烹而進人莫知也既而翁病果愈而氏刀口猶滴血竟成
瘡家人廉知其故述於翁姑氏終不肯明言且告其姑曰兒盡心懇勿介意未幾瘡亦平復後生一子
年六十餘卒

林蟬娘隴隍林世科女年十六歸朱紹江未四月而夫亡氏哀痛不自存嘗賦詩見志有句云不貪富貴
不貪惟全詩及遺稿均佚其母勸之改嫁氏唯唯越數日暗自整理衣裳針縫周身衣投江而死年謹
十八其貞烈如此

吳氏嫁環清武生王魁爲妻室年二十二夫死取他人子撫之家頗裕自建青潭驛路木橋並撥田租入
石擇佃管耕守護斯橋遇水漲卽以木筏濟人壽八十餘人祀節孝祠

吳氏字雙溪張丹鳳未婚聞丹鳳病嘔血日夕默禱觀音年十九歸于丹鳳閱十六月而丹鳳亡氏血淚
之餘請於翁姑爲立嗣姑以長媳所生之仲子爲其嗣既而抱兒拜姑姪伯叔曰藐孤賴姑等撫養成
立之一日詒家僮曰我房內多鼠聒噪爾爲我市砒霜毒之僮如所言旅值夫七虞之夜遂自毒死年

二十耳光緒八年鄉里爲列狀請旌表

羅氏岡下園劉起順妻幼歸劉爲童養媳七歲而起順亡八歲翁又亡氏已長茹素奉養姑並撫諸子姪爲夫嗣其一爲之娶守貞至六十五歲卒世稱爲童貞孀閭

王滿娘環清王三考之女幼字張秋苑爲妻後以張貧不能具聘錢旁觀議退婚氏年已二十六力持從一面終其家阻之氏服毒遇救旋投水自盡

鍾氏大田譚斯乾妻歸逾年而斯乾病氏侍湯藥不效遂歸寧告父母曰婿死兒女相從願勿以薄命女爲念復請翁姑爲立嗣及夫亡遂自縊因同墳葬之

丁氏田背吳世芳繼室年廿八無出勸夫納妾旋娶妾童氏方十六歲氏病童侍湯藥未幾世芳病卒時童年十九事氏如母遂依而終各立一子爲嗣氏五十七卒童四十八卒光緒八年邑令旌之

藍氏建橋張懷英妻年廿二而懷英故生一子甫三歲姑病目氏與兄嫂鄒氏朝夕舐之數月而愈氏年五十八卒督學馮爾昌旌其門

陳氏埔寨張志淡妻無所出夫納妾吳氏未幾夫亡氏年廿八妾年廿一矢志相守而卒氏享壽七十六妾六十八

彭姜娘九河人字杜昌文年十五未婚而昌文亡彭聞耗過門服喪泣請舅姑爲立嗣既立而撫養之其王母壽百有三歲氏奉侍寢食不離年三十三卒

豐順縣志

卷二十一

列傳四

十

汕頭鐫字局梅縣分局承印

劉氏坭溪張發貴妻年二十九而夫亡遺一子氏撫孤孀守閨三十八年光緒七年聞於上奉准入祀廣州小北門外節孝祠

林慧娘徑心林俊蘭女幼字於鍾國隆未結褵而鍾亡慧娘年十六父母令改適堅持不可遂過鍾之門守貞家貧力作靡他志道光間官紳憫其苦節旌之以匾

徐氏幼字大山背楊三友爲妻先是三友外出未歸氏年及笄父母舅姑商議擇吉娶歸其祖母牽氏手拜碓臼而成禮抱他人子養爲嗣及子娶妻徐氏又以所夫夫亡氏復又爲其孀媳立孫撫養之自是

姑媳相守而終後竟孫曾繞膝氏卒年七十有五

朱氏東隘胡秉福妻年二十一而秉福病歿氏痛哭竟於是夜自咬其舌殉於屍側邑令劉鈺德聞之徵士林作詩詠其事詳大吏具奏奉旨旌表建坊

吳氏環清王洪選妻年二十三而洪選病故遺二孤長四歲次二歲伶仃孤苦孤矢志守節教養之職一身自任卒之蔗境回甘目覩遺孤成立諸孫繞膝民國十一年卒年八十四

張氏環清附生王之楨妻建橋舉人張千秋女年二十九而之楨病卒氏痛不欲生幾以身殉無子立嗣子爲後小心撫養茹苦如甘後竟係曾見面而卒時民國九年享年九十有六

譚女士小勝鄉李少梅妻少梅偕其兄李滄萍居北平讀書于北京大學女士亦偕行旋生一子少梅既畢業挈之南歸未幾少梅病瘍經年纏淹牀蓐女士侍疾日夕不離旣而知其夫不能起遂私採斷腸

草根藏之懷中及少梅年女士哭之哀是夜抱其子入幃閉門寢子僅二歲尙乳家人以爲哺其子不虞有他夜深聞其子啼不止呼女士不應乃開門察視詎女士已服斷腸草根而殉還魂無術矣遂于羊公溪上同穴葬之李介丞爲賦斷腸七占一章紀其事

柯氏湯坑陳某妻極祿卽歸陳家爲童養媳年及笄未成禮而所夫殤家貧以十指事孀姑尋螟蛉一子卒撫育成家年五十餘卒世稱之爲童貞孀節

徐氏湯坑蔡某妻生四旬其母抱入市賣蔡家爲乳媳三歲而蔡氏子殤氏及笄守義不嫁居貧食力後撫夫兄之孫失恃者爲嗣而終老焉

羅氏幼爲犁頭山徐姓童養媳五歲而徐氏子殤氏笄而守志幽居勤女紅事姑惟謹年三十撫夫弟子爲嗣今年將六十猶童貞云

鄭氏幼字九河曾治平爲妻未過門年十七而治平病故氏聞耗痛哭自咬舌身殉

陳氏幼爲犁頭山童養媳年十七方成禮未幾而夫歿矢志守義夫無兄弟姑憫子死變目喪明氏代子職奉養惟謹後撫夫族子爲嗣教養成立守節終老鄉人稱之

羅氏湯坑湖坡鄉人武生羅實秀之女適安墩鄉徐國煌爲妻入門後恪循婦道生子春暉影三兩人影三僅八月卽遭父喪氏矢志撫孤成人對於戚誼則和藹相待好施樂善數十年如一日民國三十年病歿年五十八歲地方人士爲之題請旌表彰三思親情切在隔子頭地方建立懷萱亭一座以垂紀

豐順縣志

卷二十一

列傳四

十一

汕頭總字局梅縣分局承印

念有杜公駿伯爲記

朱氏居林朱炳青庠生女年十八適東隴黃廷科生四子長遜九次意南三鵬南四經南二女而廷科早卒家貧氏守節撫孤種菜傭工備嘗勞苦以助家計四子日後長成經商越南屢致巨富秉承母訓和睦無間一家男婦老幼一百七十餘口猶同炊共爨焉

朱氏小勝鄉李煥妻年三十而寡撫孤讀書應試娶媳林氏年二十四又早寡生一子名國常姑媳孀守教國常攷升金山中學畢業清獎給歲貢生人以爲一門雙節之報未幾國常又早世其妻年方二十餘亦撫孤孀守蓋三世守節朱氏享年八十餘卒

列傳四

節孝表

林氏曹寨陳題卿之妻

羅氏金湯周元捷之妻

張氏湖陂羅明係之妻

羅氏城廂吳成亨之妻

朱氏縣城吳啓煥之妻

黎大娘橋背吳啓義之妻

謝氏產溪彭奕瑞之妻

吳氏上林朱文麟之妻

朱氏大田胡良瑄之妻

彭氏仙洞劉宏售之妻

彭氏大田朱世豪之妻

張氏松林何夫之妻

劉氏大田朱正立之妻

王氏城廂曹增玉之妻

張氏下湯文縉之妻

劉氏譚淮之妻

徐氏新棠曾殿係之妻

楊氏李善宣之妻

李氏官溪張光樹之妻

張氏吳泰深之妻

吳氏建橋張懷彬之妻

鄒氏張永春之妻

鍾氏官溪張光第之妻

王氏吳亦楷之妻

劉氏環清王用行之妻

羅氏劉振千之妻

劉氏建橋張澧之妻

徐氏梁承宗之妻

胡氏陳高通之妻

巫氏張敬韶之妻

陳林氏馮振衡之妻

曾溫氏陳永灼之妻

劉氏彭成旺之妻

劉氏彭亦機之妻

譚氏張朝綱之妻

楊氏李亦展之妻

王氏張崇香之妻

謝氏張鑽玉之妻

劉氏田貝吳國甯之妻

楊氏朱明端之妻

邱氏埔寨張建福之妻

鄒氏吳顯達之妻

王氏張立淦之妻

邱氏李馨宣之妻

豐順縣志

卷二十二

列傳四

十二

汕頭總字局梅縣分局承印

朱氏鄭禮宰之妻

陳氏羅啓才之妻

朱氏張立漢之妻

許氏朱文桂之妻

吳氏陳耿增之妻

朱氏李亦材之妻

謝氏張爲樞之妻

官氏李三善之妻

葉氏陳桂香之妻

李氏吳亦傳之妻

古氏王品官之妻

譚氏朱義和之妻

劉氏魏亦參之妻

杜氏李煌宣之妻

彭氏墩仔吳獻昀之妻

林氏王立繩之妻

陳氏李光烈之妻

以上俱經入祀節孝祠

吳氏王斌魁之妻

何氏張錦帆之妻

劉氏林定國之妻

王氏雙溪張立梅之妻

楊氏張顯洞之妻

楊氏雙溪張登壇之妻

鄒氏吳順德之妻

張氏田貝吳泰劬之妻光緒八年奉部建坊

蔡氏朱啓元之妻

陳氏張南祝之妻

李氏何光濟之妻

吳氏鄧蘭湘之妻

吳氏建橋張崇道之妻

鄒氏張立濟之妻

洪氏雙溪張鴻材之妻

鄭氏王遠謀之妻

黎氏楊耀璋之妻

羅氏金湯吳振玉之妻

魏氏隴隍劉象萬之妻

黃氏雙河徐承選之妻

呂氏湖陂羅清就之妻

陳氏銅盤馮先纘之妻

葉氏神砂許華用之妻

陳氏埔寨張添進之妻

陳氏埔寨張佑南之妻道光二十三年奉准旌表建坊

邱氏埔寨張詩煦之妻

曾氏埔寨張文藻之妻

劉氏璜坑鄒仁提之妻

邱氏埔寨張岱祝之妻

鄭氏密坑張和芳之妻

邱氏埔寨張瑞香之妻

鄭氏東廂吳鴻序之妻

謝氏埔寨張恂瑜之妻

鄭氏沙田楊璋卿之妻

何氏大山背楊二水之妻

陳氏南陽林嵩之妻

葉氏布心楊鳳南之妻

徐氏小溪壩吳濟翔之妻

陳氏和寨曾廣應之妻

王氏建橋張希政之妻

邱氏后峯徐德堯之妻

彭氏蓮塘杜朝美之妻

豐順縣志

卷三十一

列傳四

十三

汕頭鐫字局梅縣分局承印

楊氏金湯蔡德才之妻

魏氏隴隍林世華之妻

陳氏斗牛黃紹聚之妻

杜氏東隴劉文通之妻

李氏隴隍詹瓊園之妻

陸氏大堪王肇柱之妻

胡氏潘田陳林敏之妻

蔡氏密坑張佳敏之妻

陳林氏銅坑馮振衡之妻

彭氏棠荆何允元之妻

陳氏九河劉丹桂之妻

邱氏占頭陳尙如之妻

楊氏布心鄭國金之妻

張氏上林朱日修之妻

楊氏埔頭徐亦感之妻

彭氏山芳廬集朋之妻

郭氏溪西李維辛之妻

彭氏新池胡傳洲之妻

胡氏隴隍羅文猷之妻

謝氏占頭楊元喜之妻

洪氏大勝鍾明亮之妻

柯氏金湯蔡宗通之妻

劉氏小勝丘國清之妻

馮氏楊梅坑朱君門之妻

譚氏小勝李國棠之妻

鍾氏小勝李凌雲之妻

劉氏東隴葉孟作之妻

鄒氏雙溪張朝經之妻

廖氏東隴葉華之妻

江氏丹竹坑盧集慶之妻

李氏東隴朱學善之妻

許氏蓮塘杜廷輝之妻

王氏城西李維標之妻

吳氏環清王繼盛之妻

彭氏環清王洪友之妻

鄭氏隴隍詹其珍之妻

吳氏雙溪張紹基之妻

杜氏葛布李毓傲之妻

劉氏產溪譚廷英之妻

吳氏卜湯彭朝嵩之妻

張氏璫坑鄒仁春之妻

陳氏環清劉瑞友之妻

張氏璫坑鄒顯曾之妻

柯氏環清鄭智奇之妻

鍾氏大田譚英全之妻

陳氏產溪彭恆捷之妻

鄭氏譚上承之繼之妻

劉氏產溪彭從龍之妻

吳氏環清王大寶之妻

鄭氏小樁楊顯城之妻

郭氏隴隍朱鳴玉之妻

陳氏產溪譚榮元之妻

劉氏占頭陳榮勳之妻

朱氏松林何慎圖之妻

林氏東隴朱耀東之妻

劉氏環清王財臨之妻

李氏石湖陳壽成之妻

何氏九河鄭士義之妻

吳氏大田譚斯翰之妻

魏氏九河鄭永棟之妻

豐順縣志

卷二十一

列傳四

十四

汕頭鑄字局梅縣分局承印

謝氏大田譚維繼之妻

管氏九河鄭流鏐之妻同治六年邑令饒誦清請旌表

光緒八年邑紳丁日昌於揭陽善堂採訪節孝經將邑屬所有應請旌表節孝姓氏彙列具奏奉旨准予一律旌表建坊有案茲依原奏冊列姓名備錄于後 案以上俱奉准入祀廣東省城小北門外節孝祠

唐氏下角盧鴻能之妻

彭氏城廂吳永享之妻

馮氏仙鄉劉昌彥之妻

黎氏橋頭吳孟聰之妻

鄧氏城廂曹慶傳之妻

陳氏橋頭吳昌智之妻

蔡氏下溪黃受業之妻

吳氏仙洞劉春魁之妻

彭氏小溪壩何鼎成之妻

黎氏新坡吳泰紹之妻

藍氏小溪壩吳亦命之妻

鄧氏新坡吳亦彩之妻

謝氏埔寨張雙龍之妻

劉氏建橋張鵬程之妻

王氏城廂吳永恂之妻

吳氏布心鄭恩魁之妻

鄒氏田貝吳泰華之妻

吳氏小溪壩何德尙之妻

劉氏小溪壩吳永聘之妻

張氏松林鄭孔香之妻

鄒氏陶下吳世光之妻

洪氏松林鄭芳英之妻

陳氏埔寨張觀光之妻

朱氏小溪壩吳亦緯之妻

劉氏建橋張崇基之妻

何氏雙溪張衍六之妻

鄒氏下湯張正能之妻

李氏大堪吳瑞蘭之妻

吳氏建橋張如松之妻

吳氏雙溪張雙魁之妻

張氏新坡吳泰景之妻

劉氏建橋張崇高之妻

譚氏三角塘吳世儀之妻

王氏建橋張錫書之妻

彭氏橋背吳亦理之妻

王氏建橋張永浩之妻

黎氏橋背吳亦穎之妻

王氏建橋張錫連之妻

李氏新坡吳泰寬之妻

張氏灘下許粵文之妻

鄒氏建橋張步梯之妻

吳氏建橋張兆基之妻

張氏環清王之楨之妻

吳氏建橋張崇翼之妻

藍氏高田吳喜遠之妻

鄭氏環清王默安之妻

王氏高田吳喜初之妻

彭氏湖田朱君協之妻

鄒氏高田吳喜標之妻

曾氏埔寨張親能之妻

劉氏高田吳亦綸之妻

朱氏環清王曾祥之妻

鄭氏城廂吳得昭之妻

陳氏金甌楊政要之妻

豐順縣志

卷三十一

列傳四

十五

汕頭鑄字局梅縣分局承印

何氏雙溪張衍琨之妻

邱氏金甌楊世掌之妻

吳氏建橋張崇登之妻

吳氏東里陳連增之妻

何氏建橋張崇景之妻

謝氏坡尾樓蔡旭昂之妻

吳氏東里陳謙瑞之妻

羅氏埔寨張五娘之妻

邱氏柯屋寨鄭士申之妻

黃氏埔寨張喜雲之妻

王氏埔寨張明倫之妻

吳氏大羅黃鉞之妻

羅氏埔寨張集福之妻

徐氏和寨會廣談之妻

蔡氏金湯黃可輝之妻

黃氏金湯蔡東初之妻

高氏金湯林初昇之妻

劉氏銅盤馮天惠之妻

吳氏溪頭丘家節之妻

黃氏赤草劉新時之妻

邱氏和寨曾德興之妻

黃氏新巷蔡煥明之妻

黃氏埔頭徐振康之妻

吳氏后巷徐明捷之妻

蔡氏和寨陳式玉妻媳羅氏二十而寡一門雙節

羅氏埔寨張書豪之妻

徐氏金湯卓齊秋妻媳劉氏二十而寡一門雙節

黎氏銅盤馮善繼之妻

邱氏后巷徐國華之妻

曾氏埔寨張蔚文之妻

羅氏埔寨張清輝之妻

陳氏埔寨張簡淡之妻

曾氏埔寨張習傳之妻

黃氏埔寨張永年之妻

張氏璜坑謝仲景之妻

蔡氏高尾羅紫棠之妻

陳氏大湖洋徐喜兆之妻

劉氏金甌林大漢之妻

張氏溪頭邱家業之妻

劉氏建橋張世榮之妻

黎氏建橋藍鼎祥之妻

林氏上陽羅禮發之妻

楊氏蓮塘陳創增之妻

陳氏埔頭徐承祐之妻

傅氏埔頭徐德雄之妻

吳氏建橋張樹棠之妻

張氏縣城吳敦仁之妻

馮氏南廂吳永激之妻

劉氏馬圖饒榮祖之妻

吳氏建橋張世經之妻

蔡氏銅盤馮世遠之妻

吳氏北門外黃家仁之妻

張氏松林吳永書之妻

彭氏大槎黎開舉之妻

張氏大槎楊朝金之妻

呂氏湖陂羅清就之妻

梁氏建橋張向葵之妻

朱氏馬圖饒子基之妻

吳氏建橋張芳祖之妻

杜氏產溪湖田人朱良之妻

豐順縣志

卷二十二

列傳四

十六

汕頭鑄字局梅縣分局承印

劉氏城東徐永海之妻

林氏上陽羅德用之妻

高氏璜坑吳世岐之妻

藍氏馬圖饒以文之妻

羅氏桑背胡立定之妻十二歲夫亡守貞

列傳四

方技

清

林亦全號建陽原籍饒平遷居沙田鄉南陽村生年廉謹忠厚精醫學凡沉疴求治無不立效尤精痘科負病者輒施以藥不受診金雍正六年海陽令顏敏曾以母病篤聘亦全診治立愈令贈以指下回生匾自是良醫之名大噪旋舉鄉賓冠帶

譚濬字方哲大田人由程鄉學膺康熙乙未科歲貢好義尚俠家饒於貲歲代完納額賦各分戶省無數差輸糜費暇嘗宣講聖諭化導鄉民尤精堪輿學先是濬嘗與王帝臣黎立南張賓佐同往江西興國學堪輿後歸里尋山探穴得牛眠吉地最多縣學宮基址得潮州府龍左支幹脉直結萃山水秀靈之氣濬初謀購其地建祠因先有饒鎮吳六奇大平公館久不遂建縣時官紳擇新菴嶺興建僉以其地大偏未幾惠潮嘉道張士璉蒞縣召議建學校力主是地濬乃將所購屋址三間獻於公或曰濬因卜壘其先世大子披袈裟墓謂自身當受刑事處分百日時張士璉爲海陽令問濬犯罪由則曰生無罪止應受百日刑獄災耳令奇其言詢之以實對令固精青烏術因是別有會心士璉後擢陞道其定建

學址說者謂潯實有以啓之今大田譚氏多吉地皆潯所卜也

張繼烈字慶光建橋人幼承家以醫濟世尤精痲痘科遇貧求醫不受診金且出資爲購藥人多德之壽逾七旬著痲痘驗方二冊傳世孫凌魁亦能繼其業迄今鄉人有出痲痘者將原方調治無不藥到回春子五人其幼子雲錦辛巳科舉人孫凌衡武庠生後嗣繼起文武科名不歇人咸謂是乃仁術濟世之報云

彭綱綱號紀堂下湯人業醫精脉訣習奇方所治無不效世咸名醫目之

鄒錫綸墳坑人世業刀圭術好行其德多家傳秘方凡遇急病而貧者皆贈以丸藥從不取值其子世卓亦傳其秘授

盧精一南陽人業醫懸壺縣市性誠樸遇病者延治雖道遠風雨必至無貧富不問酬金至老不改年八十卒舉飲賓授冠帶

馮飛六潘田人業醫初受學於名醫曾平階以故精脉訣能決人生死於一二年之先診病處方治之輒愈不愈者必死故有神醫之稱年四十而卒聞者惜之

馮秋江潘田人少隨丁日昌中丞居上海因習醫學所研習者皆醫家之四子六經學有師傳博而能精歷在海陽澄海懸壺名藉甚後主潮州仁壽醫院多年活人無算晚年以自患小便血症謂無可醫乃結廬於南溪山中種樹讀書不倦而終老焉

豐順縣志

卷二十一

列傳四

十七

汕頭總字局梅縣分局承印

馮芝馨原名芷馨秋江子傳父業醫尤精所治無不效遇貧乏每不收診金且贈以藥治病不泥方書嘗自出新方法所醫皆見效潮澄間富家多聘之爲專東者歲幣皆數百金有專東某患鼠疫症核結如碗芝馨令取大水蛭多尾截竹爲筒立核上以水蛭投其中使盡吸去其毒血飽則更易其一如是者數四至核平爲止並處方服之果無恙腸炎症西醫所稱爲難治者芝馨謂即仲景所言傷寒人腸胃症用柴胡治之立效海陽有陳某居汕市設銀莊病入某醫院西醫治逾月幾瘦斃輿歸其家強芝馨往診趨視則牙已禁而目直視矣令其家人爲米漿扣其牙關試注之告以如目能轉睛再行處方既而果然芝馨仍用柴胡湯變化之其藥僅值銅元十八枚服之竟霍然已自是庵埠人皆稱其能起死回生芝馨嘗勸人凡患腸炎症千萬不宜用西藥梅縣某氏婦病延芝馨不過聘其友曾某處方不效復聘芝馨至既診查曾處原方未易一味止變換其輕重各數量服之立驗有婦人犯血崩症延其診危甚以離市遠購藥遲芝馨問有蓮蓬及老紅酒否曰有急蓮蓬火爲灰沖酒服之血立止其醫術之神類如此生平性慷慨任豐順旅潮學校校董贊助學費五六百元無吝色年五十七卒於慈溪旅寓家貧無以爲殯其友梁石蓀陳鈞偉李介丞黃曉三諸公爲啓事集多金並經紀其喪事遺其妻子扶柩歸里

彭其源瑞溪鄉高車田人精通醫術有口皆碑光緒甲午年受縣長王耀曾考取中醫生第一名歷受縣府醫俸世人多稱爲華陀再世壽八十二卒授子國忠亦懸壺問世有名焉

藝文一 著述類

邑人李唐介承甫編纂

明羅萬傑瞻六堂集已刻 原稿存中多殘缺

陳際泰序陳子於有韻之言本無所諳然從衆中讀之謬然相贊譬之陸羽不識字坐石上讀書效人口動而已前序天中石郎詩亦爲此語石郎大貽笑之以爲陳子之直白如此也陳子在浮梁舟中晤汪函朗正朗爲汪伯玉大司馬從子素不習時藝而善古詩辭得子制舉業大嗟賞予刻怪卿不習時藝何以獨賞此然以別友文使之讀則已不解爲何語矣世之習舉子業者以陳子之文不可句而汪所不解者乃在彼不在此彼非以時文讀陳子之書以古文讀陳子之書也由此言之陳子不諳有韻之言至如羅子貞卿之詩則固諳之矣讀之正如讀人名作古遠潛宮而秀傑之氣往往引人着勝地味之經年未必可盡也然乍接之時一睇而見之洪纖高下雖不習者皆能名其處此爲天材絕優非後一流之材之所可幾者也陳子所不能諳者雖坐不習然亦世人之爲詩有以使之然諳如貞卿而陳子猶貽人云效人口動而已夫非媒而誕陳子亦不爲也貞卿年日制萬外凡有雜著皆可名家此詩固已見虎一文矣

豐順縣志

卷二十三

藝文一

汕頭錦字局梅縣分局承印

年早達游刃吏事余十駕弗及而襟情蕭遠頗似之余每見其戰髯抵掌如滕元發扁舟破浪而來軒然傑出至讀其詩如九皋獨唳深林孤芳異香幽響都不着人間澤穢豈澤翁評山谷帖謂不應携在長安逆旅中亦非貴人席帽舍絡馬傳呼入省時所觀余於正卿詩亦云

清吳六奇忠孝堂文集已刻 原稿存

洪圖光序今海內以文人自負者大約芳州杜若沉芷禮闈或冷然可誦不過騷人逸士之章卽蜃海鯨波倏忽傾瀉作者氣吞雲夢讀者亦驚若漢河而性情不可問文章亦未可傳耳蓋古今大文人卽古今大英雄未有不具忠孝之性者也昔李青蓮供奉翰林題詩鳳凰臺上杜錦里哀職軍儲堯封禹域固感時憂事者之作而忠孝之氣自負者若歐文忠力砥狂瀾韓侍御克乎鱷浪使非以大文人員大英雄氣概其能驚風雨泣鬼神震蕩古今天地間耶順恪吳公少慷慨負氣好擊劍善射通孫吳兵法兼事舉子業適天下喪亂赤眉銅馬相繼騷騷先生謂丈夫當立功疆場封侯食邑豈能作咕嗶語倖廁一官迎人色笑爲耶爰投筆去遂參戎伍歷軍功以上將軍節制潮郡是時金甌未固虛循芝仙之輩出設無常先生力桿禦之其功已繪麟臺不容更贅乃其性好詩書卽百萬發弧中未嘗釋卷蓋潮郡陸大海之南風上鬱難且烽烟初息鱣堂講帳旆馬鳴嘶泮水芹宮刺荆蕪塞先生以潮風被昌黎遺化方將建學明綸巾安國之教規講伊川之性命迺令暨序坵墟文風於何振耶爰出俸錢下郡邑大修孔子廟一時堂皇巍煥車服禮器粵人士以時習禮於其中先生又或登坐堂上進諸生與語

道學辨古今事且惟以忠孝學親爲重潮之士氣不振咸先生爲倡導焉先生又素慕平原爲人朱履紛踏四方從游者時倒屣宣之歷時密疏廣之金或迎秋月而坐共元規或佩春風而樽開文學應酬之暇又乘籃輿小憩山寺對黃面瞿曇談釋迦佛法先生以大英雄具大文人丰骨宜其個儔自如爲當世人傑也哉予時奉命出宰程邑每道過其處左右紅旆握刀佩立迎道左宛行細柳營中赫赫軍威不寒而慄及入帳圖書滿座翰墨風清直以青藜老人登天祿閣語酒酣耳熱時先生問出所爲文命予披閱夫以先生勛高宇宙卽在儒將風流亦第飲酒娛賓投壺歌雅博一樂事耳而二十年來興貢建學重道崇儒悉以濂溪晦庵諸先生爲法有時端征奉命必詣廟告期而奏凱旋師又入泮獻賦昔王文成講學龍溪立決不庭爲弁髦倫紀者咸先生之功首重庠序卽以忠孝訓世者歟全若奏疏條議關切國家司病其愷切不讓陸賈益足以光史冊垂奕世者哉今先生往矣度其精誠固宜環護宮牆與諸先儒共襄文治而遺編具在令子父源昆仲繼才博學雅善讀書知先公之父有關若父大義爰命梓人亟登梨棗是先生之文章傳而性情與共傳殆又以大英雄見聖賢身爲世說法者矣

吳任齋先生遺稿

李介丞跋云右詩因十九首西歸曲二闕爲鄉先輩吳任齋亦材先生解組後晚年所作也余於家渭寶茂才家得之詩爲其先君蕊初明經誦於先生家時手抄本曲則別一人所手抄原本字多蠹蝕且

豐順縣志

卷二十三

藝文一

二

汕頭鑄字局梅縣分局承印

於作者年次先後間有錯亂追念前賢心血所在未忍其湮沒不傳乃細加校訂次其先後並以原稿有先生哲嗣吳蘭皋進士詩一首附之彙爲一編因原未定名故名吳任齋先生遺稿攷先生以名孝廉昇官至馬平縣令卓有政聲馬平稱廣西左江大縣有道鎮府同城缺本而鑑先生著稱精明強幹以性剛直遇事不苟阿諾又勇銳圖治爲同城上官所忌率被議奉旨降級調京引見解任不赴遂拂袖歸西歸曲卽在歸途舟中所撰詩惟次象舟龍笠衫二首及寄勸出山一首爲解組後取道象舟時作餘皆歸田後所作也先生後半生之情志皆可於詩曲中想見之且其作宰之前自京曹出任龍門感恩涉江等縣教諭及嘉應州學正歷官二十餘年之所作當必不少惜其故家無存稿可稽此編僅鱗爪而已邑舊志本傳亦未錄其著作惟先生在籍所建立地方公益事業爲人所共見今將是編書名於新志藝文門著錄之庶後賢知先生之文詞有與其事功並著者亦卽余補先生是編之微意也
中華民國三十一年立秋日李介丞謹跋

撫吳公牘

丁巳昌發已卯坊間有翻印本

沈葆楨序皇帝御極之元年起葆楨督兩江知非其仕也堅辭弗許疊旨促之行儀儀然不叩所爲抵滬聞豐順丁公在專修謁元指迷授以撫吳公牘於舟中讀之大自興養立教安內攘外諸政小玉於喙角衆牙之細故射魚鳶之常經無不心畫指算條舉縷析胡醫弗滌胡微弗彰大要以澄吏治正人心爲本詞所不能盡者意尙懇懇乎其有餘公撫吳時江南底定三年耳兵燹久民氣凋田萊荒蕪瘡

瘠彌望兼以各郡邑版籍亡失舊規蕩然吏治放紛弛不可理公率神彈精創設條教抉剔弊原兩年之間奸蠹斂手閭左蘇息上下康又肅然井然何其偉也夫學之體猶月也其用猶月之光也月之體無弗明故光無弗燭學之體無弗究故用無弗周公以剛健篤實之法兼察邇見遠之才而又權之以人情參之以時變故坐可言者起可行所謂由體達用即用見體者歟倘不善師公者拘襲形迹分分而度之寸寸而付之且恐貌合神離况乎挾私技藝言積羽以翼折軸聚鼎以希漂山更於公何損焉公之服闋入朝也天子付詔公襄辦北洋事務旋命總理船政未幾復有撫閩三命一歲中恩旨稠疊上之知公可謂至矣公謙讓未遑世無不爲公度者葆慎閩人也讀是篇尤爲爲閩慶茅閣味無似又顏唐弗克自振侍罪公之舊治末由踵公成蹟用副吳人所以望公者實心惡焉公其何以發其病而藥之

翁同龢序丁巳戊辰間江南阮平吏事放紛民氣渙散時豐順丁公以江蘇布政使任巡撫稔知癥結之所在抉摘隱伏專通上下之情而豪強大姓及吏之不奉職者皆不便其所爲日騰謗書百出百變公屹不爲動一意興革民用大和蘇嘗乃公批牘類爲一冊命之曰丁公賓政錄今年夏遇公京師乃益遍觀此數冊其最密者日詞訟月報日錢糧斗則告示此二者他省或倣而行之矣而未覩其效者何哉史稱黃霸尙條教頒行民間米鹽靡密初若煩碎然其精力能推而行之爲人上者欲移風易俗而遇物渾渾其可乎今朝廷任公以籌海之事公其往哉執簡以馭繁推誠以格物天下多事來者無窮公其慎此身以塞士大夫之望

撫閩公牘丁日昌撰

藩吳公牘已刻

兩淮鹽政改革議二卷未刻

奏稿二卷未刻 梅縣謝悔生編入松下齋叢書

百蘭山館詩集五卷二冊已刻

荔支唱和集一冊已刻

持靜齋書目四冊已刻 丁靜齋重印

海道圖說一冊以上俱丁日昌撰

丁雨生中丞政書丁靜齋輯 已印

姚梓芳跋云豐順丁君靜齋取其叔父丁雨生中丞奏議書說編爲政書若干卷將謀付石印以廣其傳持示梓芳囑爲之跋丁氏往歲富有藏書余習與公子文滌叔雅昆孝遊少時讀書紙惜其家凡舊梨名校精鈔叔雅皆不吝相示即公所爲書奏手蹟墨稿屯積盈數簞皆得披覽及之公三言其大者於經國懷遠之畧與夫中外得失利病所關准時度勢立論必洞其微往往規畫所及若燭照數計措之而可行即未得行其成敗至光宣之季亦往往大驗罷官歸里優游林泉而拳拳君國之愛未嘗一

日棄諸懷苟有所見未嘗不言言之又未嘗不剴切可致諸用固非目論之士奮其實中之見而徒博高遠難行之言以爲名高者比惜乎公謀之不盡用也戊戌己亥之間海內賢達稍稍倡爲時務之說凡所攘臂慷慨扼腕而道者烟霧之儒得其餘論或驚爲劍獲而不知公皆從容論議於二十年前吾嘗告文滌世人所見公書靡不歎其振刷吏治綜核名實爲近世名臣所不及不知此公驥之一毛耳其軍國遠謨名散見全集苟不及今流布公之名傳與吾雖不必計再傳以後後生小子又誰與聞公風而興起者文滌聞吾言頗爲動容嘗覓寫生取錄十餘冊卒未及排印今靜齋此刻頗采文滌編輯舊稿以完數年未竟之志可云知要矣昔郭筠仙侍郎與寶相論洋務謂李少荃能見其大丁雨生能致其精沈幼舟能盡其實李沈二公其大與寶姑本深論要之百年以來洋務致精之力殆罕及公侍郎之言不可謂非千秋定論也世有欲知公平生而穆然嚮往者乎盍取公此書究澈其始冬而縱讀之乙卯春二月揭陽姚梓芳

靈異記二卷 吳開岐撰 已刻存

大上感應篇輯參四卷 譚廷儀撰 譚龍三刻

正初文集四卷 鄭家蘭撰 未刻 原稿爲揭陽某君携刊未還分快

碧桃山房文鈔八卷 彭景雲撰 未刻存

彭季鸞序云自左國莊馬以文詞勝歷代名家挺出有以古雅勝者有英雄勝者有以清雋勝者有以

豐順縣志

卷二十三

藝文一

四

汕頭錦字局梅縣分局承印

沉思變化勝者有以藻翰倚麗勝者而要非洪深經術浸淫子史者不能道其隻字予二兄玉鸞先生少丞雀訓好讀書手不釋卷每爲詩古文拈筆便成嘗言爲文不寢舍於奏謨則少古雅豪邁之氣不折衷於康末則少清雋變化之筆而揣摩於六朝則少沉思藻翰之致故其所爲文雜出不齊光怪陸離目不給賞至功令之文曾不屑道間有所作脫稿後不加改竄亦不自愛惜故多散軼不存者今搜破篋得其所作若干首雖不若詩古文之悅魂動魄而其所謂古雅豪邁清雋變化沉思藻翰之上亦時見一斑爰錄而存之以貽厥後謀云爾

擊鉢草二卷 彭景雲撰 未刻存

自序余閒居寡歡又復善病一歲之中養疴居半焉白駒往忽倅倅無須臾之間得竭志意石湖將傾又闕吳剛之斧西山已墮復奪五丁之魂竊爲恨焉今歲從吾君子明經書室日與第輩遨遊乎著作之林詩書之府山川雲物打破我歷城淇魏晉唐大放我愁歡喜笑怒罵愧無坡老之材硯匣筆狀喜有左思之具偶搜故運爰索新詩白魚吞吐不啻什存三四予季嘆不早爲之所余曰雕虫篆刻壯夫不爲小兒號嘖何復悔其少作姑錄而存之願曰擊鉢言其率易也亦以自勵而已

存情集一卷 彭景雲撰 未刻存

自序春風滿袖柳絮盈懷迴首東鄰傷心西邸朱鳥窗前人歌歌青牛帳裏芍藥情深攀桃李于三秋結藕絲于萬里我見猶憐誰能遣此自來有別必怨有怨必盈矧年屬芳卿情如秋子人非木石能

不銷魂僕昔歲閨情之作都爲百首山川雲物久藏宿怨春秋冬夏虛賦歸期雖非黃絹之詞亦曲盡紅顏之志矣今春偶步南園但見柳眼窺人桃顏含笑黃鶯幾兩粉蝶成雙慨然有感拉雜書之又得百葉爲一集

培園賦鈔三卷 陳期昌撰 存

自序賦以屈子離騷爲祖至六朝而一變六朝以倚體爲宗延及有唐而再變唐代制科以賦收士於是有律說文律者所以範天下之不一歸於一也故律賦奉唐爲俎豆歷宋以下不無少變若蘇子瞻前後赤壁歐陽文忠秋聲等賦已可概見然非律賦正軌我朝準今酌古制科皆循明代制藝以外律賦無偏廢每學使按臨校士初場考試經古以及翰林大考館閣月課悉用律賦則律賦不基重歟本朝賦學家夥矣而士林瓣香惟吳穀人顧耕石合稿舉奉之爲圭臬至館閣賦屢出風氣屢更咸同以前競尚淹博藻艷一段有至三聯四六者不善學者不免有誇多鬥靡之弊邇來風氣復古崇尚清麗亦勢所必變也余少學賦於梅州家慕皋夢石二先生摩挲十載研煉未工雖屢試獲售終未能自信復受業於南海廖子亮大史時大史主講金山每課余賦輒見前列復善于批改獲益良深是編皆經葉間于汪柳門樊懋堂廖子亮凌履初諸宗師所取錄及研磨課授所作間有師改十之二三者悉照抄存薪傳所自未敢割愛彙爲一集畧分三卷雖不能得唐人之形似庶幾免於誇多鬥靡之誚也夫

培園詩文集八卷 陳期昌撰 未刻 佚

豐順縣志

卷二十三

藝文一

五

汕頭總字局梅縣分局承印

鮑存室詩鈔一冊

丁乃潛文滌撰
鮑父鑒定 已印存

陳石遺余自養前浙東作湖上寓公者三年於茲矣自以江湖野服迹烟蘿不復與當世簪纓相晉接故門鮮達官車軌然獨與豐順丁君文滌游文滌爲大中丞哲嗣以觀察使分發來浙固赫然今之顯宦也顧其人出入風雅瀟灑軼羣無一毫仕宦氣於時下逢迎奔競之術懵然不知故歷年垂翅未得乘雲雨騰上而處之若素夷然無動於中祇以風晨月夕山巔水涯或賓筵梵刹意有所觸輒爲詩歌以傾瀉其胸中之所蓄積之已久都爲一編問序於予予受而讀之覺清微杳渺之音淵懿樸茂之色悽惻芬菲之情是真騷雅之嗣音匪特漢魏之具體近百年來無此作手矣其閒居十二章去冬曾錄以相示余愛其淡泊無營深入禪理嘗展玩不忍釋手蓋與其求退人說法獨有合焉今乃得縱觀全集其寄託遙深別具懷抱則又非余之一意求退者所可幾矣余不文不能如高適爲詩與文滌相唱和生平所得大率塵俗史事耳然頗爲名公鉅卿所盼矚猶憶同治初年謁兩生中丞於吳門節署一見卽有國士之契嗣後屢見則屢施獎借今已卅餘年矣好修遲暮聞譽不彰無以副當年之嘉譽不圖於解組後又獲與文滌觀察客中話舊其惠好之深一如中丞之所以待我者則余於此編雖欲無言又烏得無言略不辭謫陋而爲之序

惺菴遺稿一卷 丁叔雅撰已印存

宋向恕平等閣詩語吾友丁叔雅部郎惠康一字惺菴豐順中丞第三子也中丞以清德遺子孫家富

有藏書而奮於貨產君爲庶出幼而耽學風神散朗襟期高曠世許乃遊京師所交皆一時賢俊相與講求新學已亥歲暮客滬廢立之議起滬司電經蓮山大守名元善浙江上虞人抗疏諫許君賢左右其事廂名其列遂見惡於當路君愴然物外暢然自適癸卯岑西林督粵延君入幕主持興學事赴日本考查學務已歸明年以持論不合辭去君雖粵人不樂粵中風土自是羈旋都門滬濱志不肯事豪貴與時俯仰竟以貧病於宣統元年四月晦日卒於都門客邸年四十有二平生富文學政事才而竟不過淪躓而死哀哉君善詩沈着之中時見風韻又工尺牘溫雅似六朝人交遊尚博愛吐辭蘊藉與人酬對終日無俗言茲錄存君詩世之覽者於此可諗君之行誼焉君寓居揭陽與曾剛父參議齋名歿後君爲理其喪事並藏其遺稿以待梓

丁徵君遺集二卷羅惇融姚梓芳合輯未刻

愚隱齋詩草二十七卷附文章六卷王祖德已刻 存今重印

溫廷敬序造物能窮人以境不能窮人以詩古之能詩者若孟郊賈島方干羅隱蘇舜欽梅堯臣之徒皆因窮而益昌其詩即魏之曹植北周之庾信唐之杜甫李白韓愈柳宗元宋之蘇軾黃廷堅論者固不以置諸窮之列然觀其生平遭際疑忌怨謗流離喪亂其乃竄死遐方名羅黨禁以視怨老嗟卑者困阨不啻倍徙而其詩傳大昌明乃無一毫跼蹐之態然則諸子之詩固不因窮而益工而窮亦無能損於其詩也吾友王逸叟生紫封少即以文藝鳴當舉世尙科名之時乃限于籍貫不能撥一矜君顧

豐順縣志

卷一十二

藝文一

六

汕頭錦字局梅縣分局承印

夷然不以爲意日方從事於吟哦以發其才而娛其性其詩夷猶澹宕五言溫醇王孟七言步武蘇陸而尤以放翁爲歸然則君之詩固非郊島諸人可比而君詩亦豈易及哉然此猶不足以觀君也辛壬之交朝局滄桑法度蕩散強暴得志攘奪成風君處豪鄰肘腋之下挾其平日之猜嫌妬恨乃乘勢一發以毀君之祠驅君之族君流離道路廁足無所雖悲惋已極猶從道自恃及其事得直而貨產已不能復然君方且寄身於荒江老屋之中閉戶以自理其詩間有所作且直闢韓杜之奧然後嘆造物之摧抑震撼雖能至君于窮無復之之地而於君詩則不能少減其毫末且因之日進而永已也彼怨家仇人其如君何哉君詩自成年後至年三十九時勒爲四卷付梓家毀時失去變後得詩若干首裁爲二卷從友人索回舊刻詩嚴芟四卷仍舊合爲六卷余自壬子歲讀君詩始得定交君固謬推余爲知音書來索序余於君詩未能限其所至乃略畧君之境遇與其所自處者以告當世君舊爲浙之山陰人僑于潮已數世然猶自譽爲浙人

案愚隱齋詩草翻印凡六冊內分詩二十七卷文六卷合爲三十三卷民國二十五年內子門下徐起義諸人合贊印溫序所謂六卷者實六冊也君世居豐順之湯坑

愚隱齋詩續錄三冊詩九卷附文章二卷 王祖德已印

自序不自揆陋前以丙子冬至以拙詩二十六卷詩餘一卷及雜文六卷災印矣爾時輒欲謝絕詩魔除却文字無如七哀五噫觸物如故至今辛巳首夏又積詩九卷雜文二卷合前四十四卷意掘辭

繁如是夫今詩與文凡十一卷年已衰頹精力已竭不復嚴刪鳥噪虫吟自鳴自息陋劣固不計也夫有生於無復歸於無元會終時賢愚共盡貴賤同歸又何有文字工拙之可言哉是不特不暇刪抑亦不必刪矣今拙草置諸破篋欲飽蠹魚而門人以索者日至倦於筆錄復請災印聽之吁

養源堂詩文集二卷吳其瀾著 未刻

跋云先君於民國六年秋棄養祖理曾於墓廬苦塊中識其生前作哀思行誼錄復編輯其所爲詩文計得遺稿有古文辭四十四篇古今體詩七十二首略分二卷蓋手澤猶存期免久後散軼也八年秋依先君所建養源別墅前購地鑿池引流通溪以符養源之義更於堂內爲舟簾之飾崇奉先君栗主於中聊盡事死如生之思仍題曰養源堂意在詩文與祠堂並垂後世冀在我後之人咸知先人手澤常新而已集中所編皆先君勲學勗德有關於世道人心訓俗安民之大者凡制藝帖括專爲決科而作舉無關於載道者未錄焉韓子曰言者心之聲也文之於言又其精者也先君之文卽其言也其言也卽其心之所發而循循然與道爲歸者也故讀先君之文卽可想見先君之爲人其生平之品概如何道學如何性情行事如何俱散見於詩古文辭之間姑勿論其能否成爲一家言而典型固卓然尙在也今者先君往矣而詩文不與之俱存則謂先君至今爲不沒焉可也自維徒讀父書行能無似每一展誦覺淚渺渺自下而不能已焉故謹識之民國庚申九年長男吳祖理謹跋

寥天一廬詩存一册李介承撰 己卯武進徐震坪定

豐順縣志

卷二十三

藝文一

七

汕頭錦字局梅縣分局承印

黃葉序白傳有言文章合爲時而著歌詩合爲事而作介承先生世變驚心痼瘕在抱負才未遇不獲已而聲之以詩請所爲五古諸章蓋猶白傳諷諭詩之遺意嗚呼雲生島上地盡城邊莽莽神州覆亡是懼而官邪未息黎民阻飢此固志士之所嘔心而亦采風者所不容忽視者矣靜夜一燈熒然獨對安書數言以弁諸卷首

右寥天一廬詩存凡一百五十首家大人介承先生所作也先生抱命世之才懷救民之願早歲奮發奮譔不羣晚歷艱屯膏育泉石生平憤鬱青形諸歌詠爲詩千百首要皆言近旨遠發乎至情工掘雖殊其歸則一去冬國平歸自扶桑家大人出浮滬味純寥天一廬諸集論之曰吾生平事業一等烟雲惟此心音思託後嗣小子敬恭受命拜讀再三謹擇其有關於世道民生之大及聲情俱美者得百八十餘首今辱承李滄萍黃海章二先生意重加嚴選遂梓是集以爲家珍其必傳於後無疑也集中以七絕居首五古次之五律七古七律又次之不復泥先例所以明家大人用力之漸也次男李國平謹跋

明季嶺東山砦記六卷李介承纂未刻李鴻璣題詞

何春帆序云吾粵忠烈之士倡起義兵抗拒異族者吾於史乘得兩人焉曰東莞熊將軍曰高涼沈夫人皆共著者然當滿清入關吾粵士夫紛起勤王四方響應其人其事予以寡陋不能舉者蓋亦多矣豐順李介承先生予久聞其工詩今秋先生訪予豐順行署予諮以潮汕抗戰方略先生慷慨縱談條

舉地方險要戰守之方口講指畫疊疊如貫珠非精熟鄉土地理掌故及暢通古今論兵要訣者曷克臻此予聞而倍加興奮以爲世人徒以詩人自先生者尙知之未盡也旋先生出其所著明季嶺東山碧記一書見示蓋撮錄明季嶺東先民結碧集兵以謀匡復史實碧各爲編書分六卷錯綜貫串備極剪裁布製之工誠良史也夫吾國立國數千年其間義士遺臣鐘天地浩然之氣懷國家民族之恩相率執戈而起甯捐軀蹈刃以明保存國家死不肯屈服異族者代多其人由是而精忠之正義遂以充塞天地深入人心匹夫死忠婦人女子死節皆天地正氣有以使之殆不期然而然者而吾國家民族得以歷數千年終能蹶而復興者胥賴此天地正氣有以維繫之者也今者日本入寇時逾兩載戰場遍十數省各地方鄉自爲戰雖婦人女子皆以殲敵爲榮使敵人知吾民族爲不可侮報章所載可以動天地泣鬼神者不可勝舉此皆數千年來先民忠勇壯烈之正氣深入人心有以致之吾國抗戰必勝之基實繫於此而李先生此書適乘時而出吾知讀是書者瞻仰先民之遺風將人皆有結碧起兵守土衛國之念而以鼓動鄉人見諸行事其於振作人心以維護國家民族不亦效大而功宏乎斯又不徒以良史目之許爲必傳也已歡喜贊嘆序而歸之

古今水利營田輯畧十卷 李介承纂

自序云昔禹爲司空平水土定天下墾田九百二十萬頃其時戶口二千三百餘萬遞及夏商周皆田多於人用行井田之制春秋戰國戶口倍增故楚築芍陂鄭伍田潁魏盡地力秦開阡陌史起鄭國西

豐順縣志

卷二十三

藝文一

八

汕頭鑄字局梅縣分局承印

門豹李冰父子皆興水利以增墾農田迄漢代遂增至一千八百餘頃兩漢郡宋若文翁番係白公馬援馬臻召信臣之倫皆以水利營田富民咸稱治最降及魏晉則引漳引鄆引淶開車箱之渠激濁清之流墾田增至二萬八千餘頃故能適應滋生人丁之耕食五胡亂華中原之民多渡江南徙北地遂多閑田故北魏有復井田之議當時南北紛爭史稱農夫少於軍家戰馬多於耕牛列籍戶口祇有二百餘萬隋唐治平未幾中更喪亂因是陸宣公革除弊政疏有農夫不增而墾田欲廣新畝雖關而舊畝蕪矣之言其時猶田多於人可知也治平會計錄謂宋元豐間天下墾田三千餘萬頃而雲州受降城唐振武軍之屯田三千八百萬頃不與焉蓋視魏晉又增倍徙矣歷代戶口史家以宋紹興時爲最盛元明清三代版圖倍廣人口亦倍增其於水利營田均特加注重宋元均令州縣官以增墾田爲隄陰清代以勸墾地多寡爲殿最明設庸田使並令士民墾田若干畝得補縣佐縣官於是墾田代有增加用能自給民國於天下農田既未括覈近年雖事增闢顧四萬萬七千萬之民數視前代實增倍徙而無算矣夫人口增多而田不加闢耕獲不足自養天下之大患也顧自昔以農立國今乃不克自食東南數省歲仰給舶來米無數此則人多田少之明証抗戰以還海運被敵封鎖斗米貴至四五十元舉國上下咸謀救荒之不暇豈非晚近不講求水利農田之所致歟全國土地面積三千四百餘萬方里山嶺實佔大多數舉平原曠野水利易興之地雖墾闢殆盡惟是陵坡岡阜之可墾爲水田者故隨在皆是因高山溪澗皆自高下流若概於山腰水口夾築陂塘沿岡鑿渠或穿山架槽瀉流引溉

任何山多田少之區皆可增墾梯田無數易使耕者皆有其田而自耕自給要視措施方法與力行何如耳余自光緒乙巳興辦學堂艱於籌集學費增謀墾殖造產嗣是一行作吏所至皆爲農墾水利是謀乃甫設施而吏舍已易國事非其有紀宜無人能爲民生謀久遠之計者也民國二十八年冬舊友劉公志陸兼任第五區行政專員促赴商榷產建設旋與縣長劉禹輪組豐順縣地方建設促進會屬余主其事首先推其築山塘墾山田種山禾木薯之三山行政僅五閱月而四鄉民衆築墾者颺起越年興種木薯千萬株蓋因之所利而利之有莫之爲而爲者及退爲鄰里謀不期年而墾山田千餘畝歷經試辦深信墾山爲田築塘引溉確然可推行於任何山多田少之地區且易使耕者有其田謬冀國人羣起而圖以爲非稽諸歷史成迹信而有徵有斟酌損益之資不足以推行盡利用是上溯禹貢下及現在凡關於水利營田之政制專爲農田而修浚河渠之史實及其當時朝議奏記與夫現代鄰邦乃台灣美梅南洋各島營墾水利科學化之成規凡足資墾溉山田觀摩則儆者採而錄之以張吾援敘事本諸原書其不適者間亦刪節之其簡畧者或據他書足成之其有認爲未當者亦竊以已意附其後凡所去取悉以致用爲規彙輯成書略分十卷名曰古今水利營田輯畧借以質諸國人若夫被塘潮塢方志各有祥記河渠溝洫全史具有專篇其無資於墾溉造產與補救農田者概略而不錄蓋特義各有所主也深山野叟淺陋無書室漏自知不免竊願國內大雅進而教之

鴻泥雜述九卷 李介承著

豐順縣志

卷二十三

藝文一

九

汕頭鑄字局梅縣分局承印

自序云檳嶼嶺山謝公之履未至蛇神牛鬼孔門之口不談若平事非出於飛面穿胸之國人實等寸圓顧方趾之倫在昔涉險好奇不免少見多怪夫登五嶽者侈爲奇談聞九州者鬱其遐想矧騁蹄之行萬里鴻爪之印千方見小井蛙未窺蒼海東來遼豕自恃白頭猥以鐵券桐葉之封聲文荒穢犵鳥蠻花之域言語鉤輻鐵額銅身途逢赤境燐風沸水地出蒼鵝鬼載一車輪迴六道極虞衡所志之異廣山經未有之奇若具入泉出天之能每見鬼哭粟飛之兆江山標其姓氏木石耀其篇章松堅雲泉佛龕獨據石麟金盃山鬼交呵或則零落窮荒山靈泣其泉淵支離象教物怪銘之鼎鐘斯亦天地之不平造化之大悖者矣至如崎行軼事稗乘未收遺俗殊風輶軒莫採王迹已熄猶識前代衣冠世變方殷幾見當門桑海信既往之不可慮過後其輒泯而况朝華未披夕秀已啓粧璣鑄爲堯舜壽陵步學邯鄲人懷陸沉誰哀天問念勞生之行邁感不絕於余心稽當世所見聞事非同於燕說風土伽藍之記搜神博物之書昔之人行役有懷中情所感靡不侈陳事實託著簡編是故庾信哀時賦狸竄蚊蟻之宅屈平憂國託女嬃漁父之詞茲乃老去江湖窮居衡泌棄日惟離蓄念感時聊述舊聞幸長吉嘔盡心肝錦囊猶在陸士衡覆其酒甕甘苦自知已

溫丹銘跋云鴻泥雜述四冊豐順李君介承著中多關於粵事可採入通志古蹟名勝雜錄三門因爲閣出送呈館長賜覽現志館缺少專責徵訪介承好遊能文通古今若延爲潮梅徵訪專員月送舟車旅費必能于志業大有裨益也總編纂丹銘

徐哲東震序云人情有所感發永言成誦而詩興詩之質如是而已聲音以章之詞華以資之而後質有其文文之過質有不存者矣其或徒習熟於矩律敲註於字句而真意竭生氣索夫是之謂文滅質雖其所爲悲憂愉佚若無悖於禮義若有意于生民之休戚譬於笑不樂而哭不哀則所謂僞詩者也然而務外求名者樂趨之爲其可以炫工巧飾形貌而不必本於衷情也故當忠信衰浮華張則僞詩應時而成風會於斯時也有能不囿於風會自得其得不爲無質之文雄雖其詩有差等哉要之僞體非常之士所以卓越千載必自於此無疑也豐順李介丞先生爲人慷慨慕義自負以經世之略老而無所發舒則奇意於著述尤好爲詩積之凡二千首則撰錄若干篇爲卷園詩鈔若干卷徵序於余余觀其詩氣衆高朗絕去矯飾源本樂府諸作尤情深詞麗遂欲贈其儀寂接其言笑領其磊落之致而恨相距數千里之遙也因書所見於簡首以致余之慕思以俟僞儻非常之士論定爲中華民國三十一年七月十九日武進徐震撰

高齋近詩鈔一冊 李介選著 已印

吳履泰序云潮州地濱大海山川清秀自唐以來歷代不乏能文之士以詩名者獨少泊滿清秀世豐順丁中丞雨生及其哲嗣叔雅均能以詩鳴於世固極一時之風雅與叙雅同時而負詩名最盛者首推吾邑曾右丞剛甫剛甫宏通淹博其詩淵懿閒淡似靖節而處末世感歎傷懷過之叔雅卓犖不羣

豐順縣志

卷二十二

藝文一

十

汕頭鑄字局梅縣分局承印

其詩沉鬱蒼茫近放翁而遭坎珂若語酸情過之斯二子者誠潮州詩人崛起之尤者也自是厥後州人士爭自濯磨皆以不學詩無以立爲大成風變雲起舉彥輩出詩風由茲浸盛其間求能踵武前規而磨礪嗣響者以余所知則有後望於滄萍者滄萍外貌柔和而內氣剛勁忠孝肫誠有古人風故發爲詩歌真情佩往纏綏悱惻能使讀者怒然感奮忠孝純忱油然而生非操觚之士所能望其項背也余與滄萍同學殆十年滄萍學詩而余學文余因人事牽擾百無一成滄萍獨能屏除百務邁進不已更之京師受業於順德黃先生之門深得師友淵源其詩卓然成家然滄萍深藏厚積不肯輕以詩示人今年春余偶過滄萍高齋滄萍驟出詩稿一帙悉爲近間所作者相與就正焉或一字未妥必反復推敲求合於古而後已寒夜深宵手一帙互相印証朗誦微吟長詠短諷聲遠四鄰而我兩人不自知其冥會通神也其婦賢者聽之亦爲神往是可見滄萍之詩造詣之深能與古合也邇者滄萍著作日多屬爲去取余以其詩久蘊始發大都可傳之什且滄萍年僅四十其造已大進境止未可量余敢卜其必能與鄉先輩丁曾諸氏後先輝映而望其更能光大之也因樂爲之序

實際統帥法之概述一冊 吳逸志著 已印

自序云民國二十八年秋時抗戰軍輿論兩載矣陸軍大學研究院學員奉令來本戰區見學所定課目有戰區最高級長官實際統帥法如態度判斷決心處置各節蓋欲就實現以參証學理也戰術之要求在配合及發揮術與力之作用以達成戰勝之目的惟力以行術術以助力二者如何運用圓活

非治學理經驗於一爐不爲功統帥之實際上夫端賴於茲且將帥爲軍國精神之中樞亦爲戰力消長之核心古來戰鬥勝敗關於軍隊素質者固多而繫於將帥之優劣者良大拿破倫將烏合之衆一經部署類成勁旅此無他一種偉大精神力所感召固非一切物質力量所可比擬也伯陵將軍精心兵學積有歲時加以追隨 總理 總裁暨陳將軍辭修最久親炙言行所得獨多軍興以來馳騁南北中外交譽今且統數十萬將士爲爭民族生存抗戰於楚贛之曲秉承上官方畧指揮若定迭挫寇鋒夷考其實由其素所樹立者深且堅也將軍一舉一措動合法度一言一行悉有準繩而師古不泥創奇制新不拘放法語其特長足媲美古之名將孫子曰將者國之輔也輔周則國強若將軍者所謂國之輔者非歟逸志得識將軍幾三十年其間三爲部屬朝夕相從近復忝長官部戎幕於其治事治軍頗有見聞之切爰按課目規定各節就廣義之統帥合統御而並論及之別爲十日一曰立身二曰治事三曰治兵四曰賞罰五曰用人六曰計慮七曰態度八曰負責九曰判斷與處置十曰果決而堅忍凡茲所載不過舉其崖略以供參証語云運用之妙存乎一心倘讀者諸君妙心爲用極其戰之能事以禦侮興邦則斯篇雖于將軍之長不能具述而所獲不已多歟

德安萬家嶺大捷迴憶一冊 吳逸志著 已刻

緒言云孫子有云兵者國之大事死生之地存亡之道不可不察也當夫兩軍決鬥彈雨飛空烟塵蔽

目或冒險前驅或嚴陣固守膏血潤草野肝腦塗沙場是所謂死生之地也勝負之數非止關一時榮

豐順縣志

卷二十二

藝文一

十一

前頭鎮字局梅縣分局承印

辱勝者與敗者復是所謂存亡之道也故戰場現象變化紛紜其生死存亡之幾實繫於指揮運用之

妙當一度戰事終結其戰鬥經過情形戰場真實狀態莫不爲人所欲知若強敵侵凌我堅抵抗對壘

交鋒苦戰浴血我獲大捷敵蒙慘敗實足以大快人心而其間戰陣攻取固賴將士忠勇用命然亦有

關繫於此寶貴之經驗乃制勝之門尤足供吾人之觀摩研討張義戰之神威致敵人於死地蓋亦

前事後師之意也民國二十七年七月九日既陷倭酋田俊六分兵南犯時薛伯陵將軍任第一兵團

總司令奉令指揮南潯線軍事首創敵於沙河金官橋東西孤嶺麒麟峯等地復邀擊之於德安萬家

嶺而大捷是役也擬投誠軍官中山泰德筆述松浦師團除留守南潯路正面一小部外戰後未受傷

之官兵得脫者僅二三百名並據俘供此次實爲江南空前之血戰松浦師團遭圍被殲自認爲侵華

作戰之一大失敗敵之創巨痛深於此可見且其始計在峇德安南昌西取長沙包圍武漢經此一戰

其迷夢爲之粉碎自今觀之雖然形勢稍異而自我長期抗戰消耗敵人實力以言則其價值就存因

未可磨滅者也逸志追隨薛公忝長戎幕對寸是役作戰情形每一憶及如昨日事當時伊東師團攻

吾右本間師團攻吾左而松浦師團與吾肉搏於萬家嶺間苦戰竟月廢寢者達旬日就憶公奉 委

座十月六日自鄂中來電有云着該總司令衡奪全盤戰局負責處置務期能以主動擊破一方面敵

人獲得兵力運用之餘裕薛公運用神妙卒聚敵而殲之誠快事也曩者余編南潯綫抗戰迴憶及薛

伯陵將軍實際統帥法之概述兩書關於此戰經過均曾述及一二然語焉未詳深恐歲月久遠光輝

戰績無從窺其全豹每用不釋今年四月間唐師長永良馳書祇余述其去年冬抄奉命出擊北度修水往返萬家嶺憑吊戰場之情形并攝影十六幀見貽展覽之餘當年戰鬥之激烈敵傷亡之慘重歷歷如在目前而戰後年餘敵骸尙暴露又可見當地劫後之荒涼及人民恨敵之深使余重感詳記是役之不能已也因於軍中倥傯之中盡所得之材料刪其秘密及迴憶所及勉將戰鬥之經過戰前敵軍之態勢戰後各方之評論與祝賀誇端分編記述并將唐師長所貽照片刊入其原函與掃蕩報所載憑吊萬家嶺一文均併編入以資印証俾國人一讀此書既景仰我將士之智勇復瞭然于敵軍不察孫子兵者國之大事之訓而黷武自恣終必覆其邦從而益堅必勝信念共勵前修以宏殺敵致果之功達成抗戰建國之任則斯編之出豈僅抑同仇之憤而已耶惟大捷至今閱時兩稔其間軍書旁午材料未暇整理至今搜羅頗感困難兼以屬稿匆遽筆漏必多異時抗戰功成繼此纂爲詳瞻之篇以耀茲光榮戰績尙有賴於專家此余所深望而願讀者有以諒之者也

模型戰術概要一冊 吳逸志著 已刻

弁言云民國二十九年秋時抗戰已三年矣第九戰區設團岳麓山集訓幹部余奉命兼長教育將校滿堂相與以實戰經驗印証軍事學理復本學理併求制勝之方精神煥發興趣橫生洵盛事也惟戰術一門憑地圖上研究雖山川形勢辨於咫尺然限於圖廓不便聚觀就現地探討雖一丘一壑燦列眉目然實施費時短期訓練可一而不可數因折衷二者之間於本團附近闊地爲場劃幅數十幅方

豐順縣志

卷二十三

藝文一

十二

汕頭鎮字局梅縣分局承印

十餘公尺將已淪陷之戰略戰術要點如武昌岳陽崇陽南昌九江德安等處及其附近各種地形分別依圖放大並加修增構築五百至四千分之一之模型戰術凡山川關塞田舍森林道路橋樑之屬皆可鳥瞰無遺教官學員以時列隊臨場研討若履實地戰陣攻取成竹在胸於是往昔圖上現地研究之困難盡祛而二者之利悉兼矣至若名城重鎮淪爲犬羊窟宅千里興思山河莫接一旦顯諸模型觸目驚心因而增同仇之憤堅殺敵之志是又激勵士氣之一助也特將模型造作意義及構築教育諸法編爲模型戰術概要公諸同志以就止焉

抗戰五年我軍戰見戰法之研討 吳逸志著

自序云

戰爭之勝利繫乎戰見之統一與戰法之運用得宜而創造新戰法以適應新時勢亦爲制勝之要訣蓋現代戰爭因各國國情之不同國際情勢之變化致戰見戰法亦各自異趣有甲國行之而效乙國用之而敗者要其旨歸則戰見固須統一尤須與時懋遷往日之所見今日或以爲非不容膠柱鼓瑟坐失機宜而戰法則須明敵軍慣用之技術而日思所以擊破之方不可墨守陳規受制於人今日抗倭戰爭亦可稱爲全體性之戰爭其初因準備未周強弱懸殊不得不用持久戰以空間換時間積小勝爲大勝使敵人陷於泥淖莫由自拔其要在分散敵人之力量不爭一城一地之得失今則已進於殲滅戰之階段一戰畧據點之得失關係甚鉅不容輕易放棄而時間之延長亦與國民經濟有相當

影響故不宜以持久戰爲滿足而須爭須主動斷然攻擊達成殲滅戰之任務福煦元帥曰「國民戰爭首先應努力者爲步步防禦資源之地域其次以全國之解放爲目的而從事戰役此計劃之實行最初當取守勢因其如此始可使新募之兵得以利用地域與時間始可使敵之速戰速決受到嚴重打擊苟能如是則敵必不得已而擴大戰線分散兵力後方連絡線既過長而豕突狼奔又無何等戰果反之我軍則可利用此時間俟新軍訓練純熟確信建立時轉而採取攻勢此實爲國民戰爭應實施之戰術也」此言軍備落後之國家應先採取守勢——持久戰俟軍備完成則轉守爲攻以求殲滅敵人取得勝利故又曰「坐以待敵是爲錯誤若不求攻擊攻擊不可以發生乎即使不發生亦即處於不利之態勢是以無論何時如欲達成戰爭之目的其唯一手段厥爲破壞敵人之兵力不可靜候敵人之攻擊故攻擊之爲物必須出自自動誘導部隊之行動以及實施會戰之行動有如搜索敵人以求會戰之行動一般即爲今日行動之新典據」抗倭以還時逾四紀曠日持久易使士氣消沉故宜發揮如火如荼之攻擊精神時時予敵人以突擊消滅其力量則最後勝利之到來爲時逾近總裁於二十九年四月重慶參謀長會議訓詞謂「今後戰術應有澈底轉變持久抗戰乃是戰略方針而抗戰之戰術仍是要速戰速決」本（三十）年十月第二次南嶽會議訓詞謂「以後作戰指導要取攻勢」其戰見已懸示鵠的深切著明凡我軍人咸宜恪守庶在統一戰見之下早收殲敵制勝之功證以孫子兵聞拙速之說亦可證最高統帥所定戰見允爲金科玉律與古今兵略家若合符契福

無戰爭之力量者即不能生存于世界魯登道夫有言戰爭是民族生活之最高表現一德國國防一書更謂「戰爭已經變成民族生存之一種方式有與和平同樣之權利任何人類或社會之活動要不是對十戰爭之準備有貢獻即無存在之權利斯個人是完全充滿戰爭思想戰爭以外之事儘可全不慮及」基此以觀人類社會欲求生存必於戰爭本能充分發育戰爭法則充分探討戰爭技術充分習練戰爭工具充分準備而後能殺敵致果達到生存之目的 總裁嘗謂「在今日弱肉強食之世界人類因爲互爭生存戰爭終無法避免如無戰爭本能之民族即無生存之可能所以吾人如想保護我中華民族以求永遠繼續生存於世界便非有戰爭之本能不可必有戰爭之本能方可以救亡圖存復興民族所謂戰爭本能最緊要一點即爲善於利用天然來發揮吾人之精神與物質之力量換言之即利用天然來發揮吾人戰鬥精神提高我軍人之人格充實我戰爭之資源」所謂利用天然即是將天地間一切事物胥就戰爭之觀點而加以利用甚至一草一木一禽一獸都有其生存之原理戰鬥之功用其巧於應變善於制敵往往較人類爲精如蜂如蟻其組織之嚴密戰鬥之堅韌蓋有不可想像者故古今名將嘗於自然事物中發現其原理原則而用之於軍事學上此原理原則嘗爲一般人所公認而顧樸不破拿破崙曰「戰略係一種技術此種技術係以任何人皆不許或忘之原則爲基礎者古往今來之名將表面上雖不見遵守任何原則實則彼能將兵術之自然法則與原則熔於一爐也古今名將雖胆量有大小不同勝利大小不一然所以得到勝利者則以此熔

豐順縣志

卷二十三

藝文一

十四

汕頭銘字局梅縣分局承印

於一爐之重耳」所謂將自然法則與原理熔於一爐實爲兵略家制勝之要道江河不廢萬古長流在今日尤宜深切體認也福煦元帥亦曰「戰爭因新兵器而有新形態爲事所必然者而此新形態並不推翻一般永遠不滅之原則且此原則之適用益形強大其特徵亦極顯著但此種研究不應僅諸求過去之教訓且必須加以細心注意」吾人既認定宇宙萬物皆爲戰爭而生則隨時注意隨地注意先觀其粗徐究其精因其已知之理而益窮之以求全乎其極則爲發現之新原理原則至多並可印證以往之理論接之古今中外兵畧家蓋莫不謂然而墨守陳法可戒斯其所以屢見於書也李頤曰「讀書易變通難趙括能讀父書究竟何補實際神而明之存乎其人識時務者在乎俊傑夫豈古板書生所能變乎」葉水心曰「觀衆器者爲良匠觀衆病者爲良醫審觀而後自爲之故無泥古之失」况夫宇宙之大事物之夥其足以供吾人研考者殆不可數計如能博觀約取推陳出新常隨時代適應妙契自然變化庶免泥古之失

今秋與幹訓團同學講述戰見戰法既叙其要旨兼取習見習聞之事物以備新戰法之研究倘亦由近及遠自卑及高之意乎占人一事一物不敢輕忽由格物以致其知則其知也必精語之今日則爲科學精神實驗哲學與墨守雷同異其旨趣茲良集是編計共十六萬餘言亦於統一戰見之外更求戰法之運用得宜並欲於淺近之事物中試求新原理原則之發現義等舉例情同獻曝僅供同學畢業後之參攷兼以補講授之闕略而已神以明之存乎其人運用之妙存乎一心是在好學深思之學

者（民國三十年十二月）

緒論

人類之有鬥爭由來遠矣由個人之爭演爲部落之爭再演而爲國家種族之爭戰爭之範圍愈廣戰鬥之法則愈繁社會文明隨時代而進步戰爭工具亦與日而俱新爭域以戰殺人盈城爭地以戰殺人盈野古今事實斑斑可考我國素稱禮義之邦聖哲立心本矜戰之德以天下爲公循己分以爲制並萬物以爲生播爲教化布爲政令保世滋大實世界和平之先進然孔子有足兵之訓先哲有兵法之傳誠以戡亂禦侮非兵莫屬勝殘去暴止戈爲武戰爭常有義悖各殊不可不辨日本軍閥獨敵國人民發動侵華戰事以暴力爲萬能惟野心之是快竟欲覆我國家滅我民族用意之毒爲禍之酷實人類正義之大厄哉 總戰領事全民從事抗戰以直壯之軍當曲老之卒本國防既定方針執行持久消耗戰畧使敵頭兵挫銳實已奠定勝利基礎然戰鬥爲戰畧行爲亦即戰畧工具非有情到純熟之戰鬥行爲殲滅敵之戰鬥力消滅敵之戰鬥意志應以達又戰勝之目的而貫徹戰畧指導戰鬥則戰術尙焉克勞塞維茲有言「戰爭唯一手段無論爲攻勢爲防勢而決定戰鬪者厥在戰術所以一切戰畧計劃皆以戰術之結果爲目的者蓋以戰術之結果爲勝利根本原因也」福煦元帥亦云「戰畧自體不能存在須賴戰術始能發揮其價值」由此可知戰術爲戰爭之祕鑰得之者勝失之者敗其重要有如此者本戰區各級將士作戰以來本層峯之指示參酌地方之實況運用戰術一本革

豐順縣志

卷二十三

藝文一

十五

汕頭鑄字局梅縣分局承印

命精神所建功績蓋已多矣然現代科學進步戰爭形態複雜福煦元帥謂「戰爭因有新兵器而有新形態爲事所必然者」故戰術非一成不變乃隨時而演進應如何根據殲滅敵人精神與物質之法則而努力于理論上以指導會戰充分發揮攻擊威力以摧敗敵人實爲當前之亟務蓋倭寇經我英勇抗戰已至再衰三竭即以本戰區各次重要戰役戰鬥最劇時我方步槍每日每槍彈藥消耗平均數量言之廿七年南潯戰役日須七十彈廿八年長沙會戰日須四十餘彈至本（三十）年三月上高會戰則僅須三十餘彈矣又如最近第二次長沙會戰在汨羅江長樂街以南地區我軍以一師對敵一師團仍能達成任務凡此不但可觀我官兵作戰之進步亦足證明敵勢之衰頹吾人針對敵我情勢在戰畧方面應即反守爲攻爭取主動而戰術方面則在多方發揮戰鬥力量以遂行戰畧且戰爭之道必以攻爲守其守乃固若拘守陣地以待敵攻則百密之陣不免敗於一疏故克勞塞維茲云「戰術行爲之指導應致人而不致於人」亦貴爭取主動之意也惟思想爲行動之指導必有統一之戰術思想始能妙運戰術以指導戰鬥行爲故統一戰見實爲發揚戰術之前提倭寇裝備頗優技術較嫻是以巧勝者也反觀我國軍隊裝備技術現感未逮欲以巧制巧誠非易易惟有以拙制之彼求速戰速決我則持久消耗彼以錐形突破我則誘敵殲滅彼以機械萬能我則毀路清野凡此皆我過去作戰以拙制巧之明徵語曰「巧者拙之奴」蓋萬巧有窮終制于拙爲理所必然此我抗日戰術之妙諦吾人所當信守者也古今中外戰史兵法至爲浩繁無非示人以原則然歷史不重演戰爭

實況今與古異此與彼殊欲應無窮之變化端在運用之靈活若拘泥於古或故意標新削足適履刻舟求劍不克有濟矣且宇宙萬事萬物迹象綜錯舍本逐末必如治絲益棼終不得其真諦譬之學佛不知明心見性即心即佛日惟敝舌以誦其經苦身以擬其行則學佛日切去佛日遠戰爭亦然虛實奇正無穹如天地不竭如江河錯綜龐雜不可究詰言其作始原亦甚簡昔黃帝征蚩尤軍擬熊羆太公作兵經賴名龍犬孫子之言簡言脫兔蓋本鳥獸之迹以明征戰之事克勞塞維茲曰「戰爭爲二人格鬥之擴大」皆由淺近以悟高深以簡易而御繁複 委座所謂「窮理於事物始生之處」更爲探見本原之論蓋致用之學每在尋常日用之間貴能即物窮理窮理致用故戰法有時而窮能變乃通規矩得之於學變化存之於已探本穹源推陳出新賴乎創造古今名將出奇制勝立功疆場實由於此茲編所述在求抗日戰見之統一殲敵戰法之肆應第戰爭之道包羅萬象語焉難詳殫精發微穹奇應變期乎同志之互相切磋悉心體會當此抗戰臨至決勝階段戰術實握勝利樞機苟能精造妙運奏破虜收京之捷收犁庭掃穴之功則我禮義之邦得以中興世界和平得以保障亦聖哲保世滋大之志也

第一篇 戰見

戰見者爲基於國策之確定及戰術思想之演變對國家現時戰爭所採取行動之一種理解簡言之即對國家作戰之意見而此意見之產生因各人見地之不同理解之差異常致分歧故國家欲確立實行國策之戰法必賴有統一之戰見否則雖有至高至上之國策亦不能達成其目的克勞塞維茲謂「戰爭一切之生活力受唯一思想之指揮」此戰見之所以必須統一也吾國發動神聖民族抗戰於茲五年最高至上之國策早經確定無待論矣茲專就戰見方面分別論列以供研討苟能進而求得統一戰見之樹立尤所深願也

第一章 戰見之重要性

戰見既爲作戰之意見其涵義與戰術思想畧同原人類行爲至爲複雜莫不以思想爲之指導大凡思想正確者其行爲亦以之正確思想統一者其行爲亦以之統一否則在個人爲悖謬乖張倒行逆施在社會爲虛詐相乘此傾彼軋其偏頗紛亂之極必致正義淪亡日月失其明天地易其位矣思想之於行動其關係有如此者況征戰之事一靜一動勝負繫焉勝敗之間個人生死國家存亡於焉以判孫子曰「兵者國之大事死生之地存亡之道不可不察也」斯言警闢可爲惕然戰爭形式不過攻防追退及對陣數種而追退乃攻防所生之變化對陣爲攻防一時之膠着其主要者蓋攻與防而已第兩軍作戰兵員動至千萬戰場廣袤山川阻障戰機瞬息萬變欲使部隊樹立獨立作戰精神各兵種密切協同連繫以捕獲戰機爭取戰果則必賴於適切之戰術思想爲之指導庶乎兵力之運用大小動作之奇正分合均能使戰爭避其所害趨其所利古稱節制之師殆此之謂孫子曰「上下同欲者勝」孟子言「地利不如人和」左傳言「師克在和不在衆」其旨雖不盡在軍旅而作戰意

見實尤貴「同」和之功也夫戰爭指導本於國策雖目的有絕對限制之殊方法有殲滅消耗之別然必以統一之戰見爲其基礎始能齊一步趨集中力量以實現戰爭之預期否則仁智異見向背不一雖有堅甲利兵亦難免失敗史乘所載事實具有可資復按中法之後我勝而屈和日俄之役俄軍敗挫第一次歐戰德將史利芬將軍之長策小毛奇不能澈底執行而有馬爾內之敗德國敗廉第二與俾士麥所遺戰見不合致東西受敵復因朝野意見不一實施潛艇作戰而開罪美國致負全局皆其例也是故戰見之統一所以造成一致之信仰進而齊一其行動不但一國之軍隊應澈底瞭解信守篤行即民衆亦當知其所由共同循率孫子曰「道者令民與上同意也」即此之謂至若戰爭計劃之實質係以戰術之結果爲目的而戰爭勝負之決定又以戰術之結果爲其基因故戰術之要求在統一企圖之下以積極之威力打擊敵人必如此始能貫徹戰略爭取勝利第一次歐戰德軍行殲滅戰於坦能堡戰果赫赫論者謂由興登堡魯登道夫以獨斷專行之精神執行統帥部之意圖所致考其精神之淵源則爲老毛奇元帥戰術思想之所孕育我國向重文輕武勵行軍事教育爲時未久作戰指揮不無缺憾蓋於軍事學術間乏深博之研究戰術思想未能盡同於是信之不堅行自不篤故於作戰要求不免難於達到戰機錯逝戰績不著殊可惜也由此可知偉大之力量生於共同之信仰共同之信仰原於統一之思想故戰見之統一實握戰爭勝負之樞機孫子曰「將聽吾計用之必勝留之將不聽吾計用之必敗去之」戰見之關係若此其可忽乎

豐順縣志

卷一十二

藝文一

十七

汕頭總字局編輯分局承印

第二章 戰術思想之演變

宇宙間萬物之能生存而不滅者莫不有其自衛之上具如虎之有爪牙龜之有甲壳是也因自衛上具不同其戰法亦異吾國古來聖哲常因鳥獸鬥爭之狀而產生新戰術思想如黃帝作龍蛇之軍大公有虎韜豹韜之篇古代陣法有龍陣蛇陣之名者莫不想像萬物搏鬥之情運用其原理以爲戰法之創意此戰術思想之淵源也

惟戰術思想常因時代之演進而遞變拿破崙有言「戰術當十年一變」蓋戰術原素精神方面之戰術思想與物質方面之戰爭工具互爲因果隨時演變其演變之迹世之論者其夥然歸納衆說唯一動一靜之交互嬗遞而已試觀使用弓矢戈矛爲主要武器之戰術以密集之方陣行相對之衝突可謂爲靜態之戰術迨騎兵卽用以輕快之速度與猛烈之衝突爲制勝之方戰術遂由靜態變爲動態嗣後甲騎發明（卽以銅片裝成銅甲附於騎兵身上）戰爭之際甲騎互對動態戰術更見盛行此種甲騎戰術支配歐洲歷史幾七百年迄火器出騎兵之戰術寢衰因火器之盛爲避免火力損害乃採取築城防禦軍隊施行戰鬥常易固着於一地因之戰術亦漸次嬗遞爲靜態泊第一次世界大戰雙方因兵力素質裝備相等軍隊築城力亦均優裕能於短時構築堅固陣地遂至相持四年不能決戰爭勝負之局直至經濟疲困而後休戰靜態戰術思想之發展至此已臻極度近歲歐戰爆發戰爭工其大改舊觀以裝甲代築城以機械化與摩托化人馬以飛機輸送與空中降落代側背包圍而閃電

戰法因而產生是戰術又由靜變而爲動矣細尋其演變常軌不外靜極思動動極思靜以靜制動以動破靜動靜互變如循環之無端若日之昏曉歲之寒暑隨自然之勢往來交互舉凡兵器築城種種之發明慎進遂莫不追隨此戰術思想而產生蓋天地萬物消長盈虛不外動靜之理戰術思想之演變亦復如此即戰見之確立亦以此爲依據此演變之實言戰見者所當察也

第三章 抗日戰見之今昔及其將來

曠觀世界各國人文歷史因其地理環境經濟基礎及思想制度之不同文化亦以之而異概別爲商業文化二者大抵商業文化覓商場求原料重在進取農業文化安土重遷效死勿去篤于保守其影響於戰術主義遂有攻守之殊倭寇最爾小邦商業文化極度發達以侵華爲一貫策略因其擁有優勢之軍備在我國接境復有根據地可掩護其兵力之集中與後續補給之依據故其戰術主義採取速戰速決之殲滅戰企圖一舉而覆我軍然我固深知其國小民貧不適於長期作戰而我地廣人衆物博農業文化發達雖軍備劣勢準備未充然而堅固不拔之民族精神（正氣）宏毅中和之民衆力量足以禦侮救亡爲持久消耗困敵殲敵之計故採取攻勢禦防戰術主義以初期守勢逐次抵抗避免主力決戰俟其攻勢因我抵抗之消耗而達於極限時即轉移主動斷然反攻殲滅敵軍此我抗戰以來所以忍痛犧牲實在誘敵深入以空間換取時間而圖抗戰力量之集中增強並以空間分散敵人兵力以大小適可而止之戰鬥消耗敵人兵力而待敵方之弱形畢露也夫越境進攻乃戰形之

最弱者而敵人以其易於接近欲攫取之目的或於戰場之某方面及某時期對我取得優勢期望大獲成果故不惜斷然行之殊不知我有廣大後方及餘裕時間可自由引退使其企圖撲空而其後方連絡線加長侵略地擴大爲防我義民紛起不能不處處分兵駐守加以疾病死亡及我所予局部抵抗殲滅之結果令敵蒙受不斷之消耗致引起壯丁缺乏國用不足與國際形勢之日趨不利於是其進攻之戰適足以自殺攫奪之土恰用以自陷是非敵人之弱形畢露而我堅固戰形之大彰乎克勞塞維茲云「防禦爲攻防兩戰形中之鞏固者」其論防禦也各分四法（一）守勢軍於敵將進入國境時攻擊之（二）守勢軍於國境附近佔領陣地敵至即轉爲攻勢（三）守者按第二法佔領陣地待敵人實行攻擊而後應之（四）守者其初極端維持其期待之狀態徐徐而退漸次移其抵抗點於內地此法使攻者前進愈深懸軍愈久程途亦愈遼遠其交通線次第延伸後方必須多留衛戍兵以爲守備故攻者兵力因而大減自覺將來已難大破守者乃不得已自行停止前進此即守者發揮主動作戰時也「昔拿破崙以四十五萬人遠征莫斯科經俄軍抵抗消耗歸達國境者爲數無多即第四防禦法之成例故我抗戰開始即以持久消耗戰畧以對敵之速戰速決殲滅戰略經浙滬之正規戰而後逐漸向內地引退在廣大平原展開運動戰同時並策動廣大之游擊戰敵經此意外消耗自知速決無望乃改爲速和速結進佔武漢以求解決對華事件後知此着難售復變爲以戰養戰在戰略上取守勢戰術上取攻勢我洞察敵情知其攻勢極點已達因採用殲滅消耗併由戰畧經台

兒莊萬家嶺長沙粵北桂南贛北及第二次長沙會戰各次誘敵殲滅之結果敵之攻勢不但已達頂點且循降弧下降而陷於「鈍兵挫銳屈力殫貨」之境再竭三衰勢所然也而我則一面抗戰一面建國軍事既愈戰愈強政治復興突飛猛進凡此敵之由銳而鈍我之轉弱為強皆我戰畧預期之效果戰見指導適切之所致也惟敵至今日雖採守勢戰畧而於政畧方面則企圖攻勢之進展力求於佔領區域樹立經濟政治之偽組織攫取我之人力物力財力以支持其國力並利用我之人力物力財力以消耗我國力期實現其「以戰養戰以華制華」之迷夢倘我仍株守初期戰畧以為持久之鞏固戰形可恃而消極到底坐視敵人安然鞏固戰形迭成以華制華以戰養戰之局勢是坐失機宜自貽大害實大背攻勢防禦之本旨誠以戰爭方畧以守勢始者必以攻勢終以持久始者必以速決勝克氏云「至守者之勢增至極點其所期待之利益無可復加時則決戰一端在守者已為富務之急此等宜於決行變易守勢行動之時機惟能就事實大體察知於未然耳」又云「守勢作戰自然之進行必始於守勢而終於攻勢」蓋戰爭之最終目的在殲滅敵人之戰鬥力始足以消滅其戰鬥意志今敵勞師遠襲侵入過深由優勢降為均勢再降而為劣勢復因國際形勢緊張樹敵日衆為回顧老巢敷衍軸心國家勢將抽調侵華軍隊在此狀態實我由守勢轉取攻勢之良機故殲滅戰畧乃我抗日戰術思想必然之新趨向吾人戰見當循此確定而一致努力實行乃可

第二篇 戰法

豐順縣志

卷二十二

藝文一

十九

汕頭韓字局梅縣分局承印

引言

戰法者指揮軍隊作戰以求達成戰勝目的之方法也其範圍甚廣所應考慮之事亦至繁——舉凡行軍宿營戰鬥諸動作敵我兩方兵力之大小部隊素質裝備之優劣各兵種之配備協同交通通訊補給衛生之連絡設施以及平原山嶽湖沼河川各種地形之特質等皆為研究之對象就原則言戰法有古今戰畧無古今換言之即戰略原則無論古今中外皆無二致中國古來大兵學家姜太公黃石公孫吳司馬言「彼已」「虛實」「奇正」「分合」至今無以易也再如外國兵家亞歷山大拿破崙毛奇等言用兵方法名詞雖異原則實同拿翁謂「不攻人而攻於人為兵家大忌」與孫子所謂「致人而不致於人」意義如出一轍此例甚多不可勝舉可見戰畧原則中外無別也至於戰術方面則有其時代性時代不斷進化戰法亦隨之而有變更如橫隊戰法變為縱隊戰法密集戰法變為疏開戰法平面戰法變為立體戰法以戰爭時代言之在點的戰爭時代單槍匹馬以個人決鬥方式而分勝負為時不過數小時至線的戰爭時代突破一線即可使敵軍瓦解時間不過半日乃至一日至面的戰爭時代為數線陣地縱深火網欲事突破必經若干之頓挫莫大之犧牲其時間由日而月而年或延至數年之久迄於現代飛機大砲戰車潛艇等兵器日新月異戰爭之形態遂由平面而成立體由海底而至天空因科學技術之發達而促進兵器之改良因裝備築城之進步復促成戰法之變化其間循環變遷互為因果有不期然而然者也戰法既隨時代而演變故於運用上必須闢一嶄新之

途徑乃能適合戰場之實況

自我發動全民長期抗戰以來吾人本夙昔之兵法學理與夫歷次戰役血汗所換得之經驗教訓隨時隨地巧爲運用五年之間愈抗愈奮愈戰愈強使頑敵創鉅痛深陷入泥淖不能自拔其國力消耗殆盡尤爲致命之傷乃敵閥企圖欺騙世界挽回危局於是又喚出所謂「百年戰爭」「長期戰爭」等口號——卽其策畧在政治上則力求於佔領區內樹立其軍事政治經濟諸組織攫取我之人力物力財力以支持其國力實現其「以戰養戰以華制華」之迷夢在軍事上則謀佔我華北之面華中之線華南之點以目前形勢而論其戰略取守勢而戰術取攻勢運用「以攻爲守」之原則以圖鞏固其佔領區域擴展各據點之外圍而達其第一步日滿一元化第二步中日滿一元化之目的

我軍爲欲殲滅敵人驅敵出境以收復領土主權達成抗戰建國任務無論戰畧戰術均應取絕對攻勢惟以國軍戰力遜敵如戰略戰術開始卽取攻勢則頗多不利故戰畧用持久消耗戰術爲局部速戰速決依戰術上之局部速戰速決不斷消耗並減低敵人戰力使敵反強爲弱同時不斷增強並提高我之戰力使我轉弱爲強待敵之戰力因消耗而與我平衡或不如我時再實施殲滅戰畧以獲取最後之勝利或依戰術上之局部速戰速決不斷消耗疲憊敵之人源及物源使其兵困乏經濟竭竭不勝戰爭之苦而自趨於崩潰我則乘其敵轉移攻勢以殲滅之此乃弱國對強國侵略之作戰原理故全面抗戰實行彈簧戰畧以確實消耗其力量而打破其「以戰養戰」之迷夢實行機動攻擊以

豐順縣志

卷二十三

藝文一

二十

汕頭鑄字局梅縣分局承印

澈底擊破其主力而粉碎其「以攻爲守」之詭謀則敵雖頑強亦未有不日趨崩潰也

本篇所述之作戰方法係基於敵之慣用戰法與我忠勇將士血肉換來之寶貴經驗教訓而成多係創意之作顧戰爭之道虛實奇正變幻萬端而運用之妙則存乎一心我最高統帥訓示「用兵作戰不拘泥原則」陳將軍辭修云「因時因地因人因事因物之不同而各制其宜臨機應變絕對不可株守成法用得其當雖一草一木皆爲勝敵之利器」蔣將軍伯陵有言「長沙會戰我軍不呆守陣地不死用方案」皆重審度機宜肆應適切願我袍澤詳加研討共奮神武抗戰前途實利賴之
(以下均爲有關軍事機密在抗戰時期未便發表故闕)

現代軍人一冊 吳逸志著 已出版

爲將與治兵一冊 吳逸志著 已出版

集訓意義一冊 吳逸志著 已出版

對同盟軍作戰之建議 吳逸志著 已出版

國家盛衰之理 吳逸志著 在印刷中

天涯鴻爪集一卷 王楚材著 未刊

惠陽許壽仁題詞云亂離身世各飄萍感誦瑤篇欲涕零漸上旅居人獨夜謝樓別句酒初醒勢形案牘存清興游戲文章寓正經留得去思佳話在天涯鴻雪記長亭

環清王家驥題詞云文章爾雅數吾宗屈指誰踞上峯老手斲輪繩祖武真傳衣鉢踵遺蹤
開篇滿紙盡琳琅化作氤氲字字香信手拈來皆妙諦嬉游笑罵亦文章
玄黃血戰渾閒事海角天涯興倍濃眼界寬時詩力健一杯酣飲更從容
環清王韶生題詞云放翁格律澹迥健白傅情懷世共和半百功名留海岱卅年醫效滿天涯雄關尙
憶終童史黃絹新成幼婦詞佳句盛傳編邑乘風流儒雅况相師

柳州年譜補訂一卷 王韶生撰

自序云柳州年譜向有文安禮編訂本載粵雅堂叢書與呂大防所編之韓文年譜並錄蓋即後人所
稱韓柳年所譜也惟原書僅以考訂二公文章成稿之年月爲主對於事實未免忽畧昔予與氏有言
誦其詩讀其書不知其人可乎是以論其世也韓柳聲名滿天下然知二公生平之志事者蓋寡不有
闡關何知惟懷發幽德於潛光望北辰而拱立余曷敢不勉焉韓公年譜其後洪興祖爲之補訂昌黎
之志事顯矣惟柳州懷抱利器遠竄南服一斥不復賞恨而終論者每以其黨附叔父多所貶損雖
賢如畏廬老人亦不免持偏激之論至以氓之詩來相所附其他則又何說夫士君子之立身自有本
末終始當其斧柯假手雷雨經綸造福蒼生利濟天下固不必拘牽舊文因喻失義也不幸而觸怒時
宰遂謫湖南效屈子之芳非懷賈生之雅潔著書自遣筆下千言弔水登山半籠百態其詞亦闔與矣
嗟呼此蓋不得志於時者之所爲也余昔在燕京閒散無事檢拾陳編成柳州年譜補訂一卷今因
豐順縣志 卷二十二 藝文一 二十一

汕頭鑄字局梅縣分局承印

刊佈有日謹著其大概於此云庚午孟夏序

岳雪廬叢稿 王韶生著 已刊

自序云余自肄業上庠治中國文學禮事碩德耆儒捧手受教輾轉南北九後六年顧以學術疎淺平
日於考據典章之學尙有所缺遺惟詩歌文史之言則略有創獲譬若火之始燃泉之始流清而易挹
明而未融未足以華國也卒業後逼於課事偶有所作成於俄頃豈復能覃思精研迨後還海南行掌
教端蒙得以餘暇涉獵西洋文學一時翻譯詩歌頗夥始知學問之事非優閒者不足以語此自維生
平篤於性情其見於篇什者稱心而出哀樂過人幾不知文生於情情生於文此正所謂玩物喪志乃
米儒之所切戒者也浮海歸來還讀我書於行篋中檢取舊作駢散文及詩詞稿百首請友人劉勉峯
潘學增兩君代爲校閱去其泰甚付之奇刻分贈親友俾知余十年來爲學之甘苦而生平志事亦於
此可攷見焉非敢云敝帚自珍也

懷冰文錄二卷 王韶生著 已刊

林礪儒序云吾友韶生富於教育興趣之文學者也頃輯其作品成懷冰文錄屬余序其卷首讀其文
品業不一然其材多取諸民族思想情趣史實其志則在誘掖後生喚起民衆蓋文之用在洞察人生
之精微而其機則發乎性情之自動故嗜文者苟不徒耽想像而欲公其心思情感於羣衆則未有不
與教育滙流者韶生殆其人歟抑吾聞人生之義複而隨其用變而妙觀之者或由科學或由文藝或

內省個人或周知社會胥可得其一相而難窮其萬殊韶生殆取道乎文學而傾於內省者因其所是而是之惡可言其非邪因其所非而非之又惡可言是盡於斯邪在昔文人狃相輕之習固乎傳統之見冀得四海皆準之論而視立言爲曠代之舉卒之求全而愈見其偏務通而益增其蔽徒沮言論之銳氣而窒思想之生機今者治學之分工細而真理之相對性已大白於天下言者惟表其所見而俟讀者之理會初不必期其勝於人而取於人韶生之錄其文殆此意歟韶生曩畢業於北平師範大學今又與余共事勤勸大學交遊將十稔故序其文義不貢諛辭民國二十四年五月十一日

自序云昔休甯戴君有言學有三難博博難識斷難精審難余何人斯遠足以語此而列於著作之林耶此集所載多屬少作要爲余十年來學問慾遺留下之一爪一鱗然撰述之稿不自愛惜間亦有散佚者矣去歲從姪兆堅歸自北海慈惠付梓爰將昔日曾發表之文稿擇其愜當者都爲上下兩卷約九萬言請友人劉冕羣何傳三樊伯珊三君校閱一過付之剞劂以誌余之用力如此自維生平學問病在蕪雜粗淺未有專門名家之業勤苦而無所成是則余之罪也夫書既殺青承林礪儒院長作序介紹楊壽昌教授暨友人吳三立先生署端不啻百朋之錫是又所謂德音勿忘者也中華民國廿四年五月十三日晨王韶生日序於廣州粵華 廬

國學概要 上下兩卷 王韶生撰 已刊

曹子建詩注一卷 王韶生箋 未刊

豐順縣志 卷二十三 藝文一

二十二

汕頭鑄字局梅縣分局承印

中國文學家評傳四卷 王韶生編纂 未刊

全國警政考察記一冊 丁培慈撰 已刊

南洋考察記一冊 丁培慈撰 已刊

微積分論 李銘鑒譯 已刊

普通力學 李銘鑒撰 未刊

半純函數之波氏方向論一冊 李國平著 中山大學印行 已刊

案此書分論文十五篇係英文印行

準解析函數族論一冊 李國平著

案是書係法文印行旋經法國巴黎大學泰斗波列盧氏編入函數叢書

近代函數論一冊 李國平著 法文印行

近代複變數函數論片段 李國平著

自序云源邈流分百家競爽複變數函數論未易言也四十年來類書蔚起凡一枝一節足供後學探索鑽研者胥有專書爲之索引法國波列盧成拉蒙特豫利亞四君所其集尤著也今欲爲統崇之作集諸家大成求無遺漏則卷帙之繁事彌年載一人之力其誰克堪揮亦何庸乎或者欲以寥寥短篇統其全豹又欲暗示學者隨其武步意謂不過爾爾不失之偏注則失之瑣屑如賬簿如手冊尋讀既

竟所知者不過甲定理云云乙定理云云而已吾所以不善冷到提茲來之書者此也余從事於純
函數論者有年而寡所獲迄最近始悟向之失在偏而銳輒欲分析函數論諸部門求其異同相因之
所在與夫演變之跡從而生問題新方法焉恨未有得遂爲是編必亦失之偏且碎焉可知也故不敢
不名之曰片段所以明其不誣之意爾吾嘗思之複變數函數論乃一系統之全故無別于古代近代
也近代古代云者乃貸自史家爲敘述之詳畧計而已必欲強調何年以上屬于古代何年于下屬于
近代豈惟不能抑亦可哂此猶吾之生也自少至長形貌變異識見漸增而內審我之所以爲我者因
屹然無別於今昔今取某年以後之我曰近我而獨論之忘我之所以爲我與夫某某年以前之我也
則亦妄矣昔有問者曰數學諸門以何者爲最深余愕然曰學無所謂深淺也亦有系統之完缺與夫
範圍之廣狹而已故夫數學書籍間有以初等高等名者乃教育家之所爲非數學本身所具有此不
可不察也國家方典科學草創吾人不可無卓然自主之志以新開其基爲來者倡率若徒徇故轍誘
掖後進偶有得焉輒囂然自足奚以闢徑而獨立嘗謂爲學之道必有一塵不染之心胸獨立千載之
氣概使感情不發則已發則中節然後繼之以博覽窮究積之歲月以培其理智養得此心靈活活地
于是乎觸物興思見小知大此開新之道而非一朝一夕之事也不此之圖而以映燈燭之末光爲榮
則何所見之陋而所志之卑如斯耶複變函數論之興也迄今且二百年其始也求所以推廣微積分
學而已一八一四年法人柯西始立解析函數論之雛形又三十二年而其義始備至一八五七年而
豐順縣志

卷二十二

藝文一

二十三

油頭鎮字局編印分局承印

殘數定理出焉厥後曾曲曾利阿普格希密繼之以法李曼華而斯達斯與其徒奇立斯奈免施創絃
克魯米因繼之以德約至一八八〇年前後此豫利亞所稱第一時期者也爰逮一八七九年而俾加
氏定理出解析函數孤立超性異點之性質始漸明一八八一年而邦家來之福氏函數出精圓函數
論始漸臻其極而單值化之理論生焉一八九二年哈特末之羣級數之異點論出一八九四年而波
列盧之普通單函論出一八九六年而有波列盧之俾加氏定理簡單證法複變數函數論遂日入於
光輝之域此由一八八〇年前後至上世紀之末豫利亞所稱爲第二時期者也迄一八九八年波列
盧始發刊其函數論叢書遂使實變數函數論與複變數函數論並進而相成德國亦有柯比加拉第
阿承接本曼邦加萊之遺緒時至今日承先啓後四十餘年複變數函數論之支流益紛紛矣此豫利
亞所稱爲第三時期者也從茲更四十年吾又安知其極雖然吾誠有慨乎當世承波列盧哈特來加
拉第阿之緒者乃不如前此吾所以誠誠懇懇願與國人共勉毋爲習見所囿宜思有以自奮者也本
編分爲三部其一爲單複變數解析函數之基本性質其二爲方法論其三爲主要問題之解決余所
以持此敘述方式者其由有二欲顯示斯學之一貫性質此其一欲顯示專門研究之途徑此其二余
誠淺薄才不足以副其志但願與發奮有爲立志高遠之青年共勉求進而已是爲序三十年

葛曙自序豐順縣治舊隸海陽名豐政都明季幾爲盜藪我朝定鼎里人吳少師六奇乘時效順倡義立功潢池之衆漸以底定百年以來涵濡沐浴於聖天子之澤民皆秉來教詩書向之憑持險阻者消歸無有於戲盛矣然距海城二百里層巒疊嶂兀然大險大寶坤坑雙髻諸山出產銀鉛礦徒聚伏百弊萌生其界於揭陽大埔嘉應犬牙相錯者各州縣又每以鞭長莫及爲憾前制憲鄂公巡邊見之乾隆三年請割四州縣地建立新邑廷議允准天子錫今名設官司牧復發帑金造城垣築關隘備兵汛建學宮積倉粟置先農社稷及忠孝節義等祠蓋所以保衛而教養之者如此其至越五年癸亥十二月余自香山赴洩斯士院憲諄諄勸諭以豐治初開規制未定人心未洽其必實心安輯之余奉命抵任民豐土宜苦無舊籍可考一切工程惟縣署倉庫而已餘皆未建洩民之誼即鳩工庀材次第興築闢二載各工始竣而余亦將調任以去然余於此益憂舊籍之無徵而有不得辭者縣必有志所重民事也無志則疆與何以攷建置何以稽賦役職官選舉人物及民俗純漓人文優劣舉無可核是欲治民而無其資即夙夜勤勞而因地因人之不講其何以言德意而奏治理况豐岩邑也治又新造百度甫創民志未同尤不可不急爲表彰以備採擇余不文勿勝厥任願承乏茲邑亦有年矣曩者一程竭蹶且到任日淺不及周知今荷皇仁德威廣播四境寧謐聽治之暇采覽曩日多適又奉調新寧豐志之纂尙可諉爲異日事乎由是別其封域考其典章察其民物取海揭嘉大四州縣原志擇其地與人與事之今隸豐順者彙而輯焉益以年來巡陞度陌訪之故老得之遺聞隨時隨處之所見聞者薈萃而爲一編寧質毋華寧簡毋濫疑者以年來巡陞度陌訪之故老得之遺聞隨時隨處之所見聞者薈萃而爲一編

豐順縣志

卷二十二

藝文一

二十四

汕頭縣字局梅縣分局承印

續修豐順縣志八卷

吳鵬總纂

邑令許普麟訂定

邑令王承鑒序云豐順之有志舊矣自乾隆十一年前葛公曙創修焉始知割分海揭嘉大四邑所由來與夫山川土田賦役戶口之分合一時纂輯成書爲化民勸俗之助者雖創而實因也彼時屬內大半皆未設縣以前海揭嘉大原志所有未嘗附會妄參故因之易尙非創之難而事實亦因之見少惟是傳之久其中不少異同輿廢端賴守斯土者及時詳徵博訪續輯其書以見由庶而富而教之盛不似初時建邑依原志而錄舊章也同治四年前邑令查公侃見葛志代遠年湮搜求典物有蠹蝕偏存者有漂漶全無存者亦謹釐定其舊譜填補其殘缺並未卽邑事邑人略增一二是謂志因而易者不又見其不易哉乃者光緒八年邑令許君普濟下車未久適奉道憲張府憲朱於行以修府志必先修縣志飭卽編輯成帙繳府查存而許君曾籌捐經費諭邑副貢生吳鵬等主其事跡其品學兼優於筆削之權宜可以獨操乃抑之不敢自是功仍歸於原編事必衷乎公論一切爲之考詳而義正蒐佚而

訂詒視葛志增益甚富顧成焉而未即刊許君於十年三月卸篆以去予即接篆斯邑首取所修而閱之何得復贅一詞然猶恐網漏一二事愈參鄉賢耆老之定評以全許君興修之功即以專治有斯土之責夫豐邑雖僻處偏隅而千嶂如屏雙溪似帶秀靈之氣蔚爲樸厚之風一時民俗吏人才起日新月盛詎不足增史乘光故自葛志距今百四十餘稔特一重修而予繼許君前後經營已審與夫取辦倉猝者不同是因也而不營創也雖乎易乎後來者官相守而勿替復閱時而增修也可光緒十年

藝文一 文徵文類

戮鱷魚文

宋陳亮佐

已亥歲予於潮州建昌黎先生祠堂作招韓詞載鱷魚事以旌之後又圖其魚爲之贊凡好事者即以授之俾天下之人知韓之道不爲妄也明年夏郡之境止地曰萬山村曰硫磺張氏子年始十六與其母濯于江渚倏忽鱷魚尾去其母號之弗能救泊中流則食無餘予聞而傷之且謂天子聖武王澤昭洽刑不僭賞不濫海內海外罔不率俾昆蟲草木裕如也鱷魚何悍焉而肆毒任虐之如是是不可不爲之思也命縣邑李公詔郡吏楊勛擊小舟操巨網馳往捕之咸謂予曰彼不可捕也穴深淵遊駭浪非人力之所能加也予則不然復之曰方今普天率土靡不臣妾山川陰陽之神奉天威命晦明風雨弗敢逾也鱷魚恃遠與險毒茲民物律殺人者死今魚食人也又何如焉昔昌黎文公投之以文則引而避是則鱷之有知也若之何而逐之姑行焉必有主之者矣苟不能及予當請於帝躬與鱷魚決二吏既往即以予言告知也

豐順縣志

卷二十三

藝文一

二十五

汕頭錦字局梅縣分局承印

之是日乃投網輒止伏不能舉由是左右前後刀者凡百夫曳之以出緘其吻械其足檻以巨舟順流而至閩郡聞之悉曰是必妄也安有食人之魚形越數丈而能獲之者焉既見之則駭而喜且曰生於世有百歲者矣凡上下水中或見其降伏旁窺之狀雖相遠百步而不敢抗今二吏捕之猶拾芥焉實古今之所未見聞也向非公之義洽於民公之令嚴於吏自誠而不欺也又安能殲巨害乎大憲宣王者之刑威焉予始慎之終得之又豈韓愈逐之於前小子戮之於後不爲過也既而鳴鼓召吏告之以罪誅其首以烹之辭曰水之怪則曰惡兮魚之悍則曰鱷兮二者之異不可度兮張氏之子年方弱兮尾而食之胡爲虐兮斃母氏俾何託兮予實命吏顏斯怍兮害而弗去道將索兮夙夜思之哀民瘼兮越越二吏行思恪兮矯矯巨尾迎而博兮獲而獻之俾人樂兮鳴鼓召衆春而斯兮而今以後津其廓兮

季雨南橋記

明黃一道上陽人進士

季雨橋四門橋於隄以達於大道者也新之者邑判會稽季侯也名若者志侯德也曷爲志民之生生爲稼穡歲嘉靖戊子旱黎民阻飢已甚存又旱百姓喁喁命繫旦夕吾侯憂之畢力賑救躬以爲禱既而二月晦乙未雨侯禱益虔三月戊戌大雨雨竟弗息民爰有生意稼事悉興命以還續而橋成以時民因志之不忘也或者曰雨天也而曰季不亦虛乎余曰是未知天人之攸徵者也匹夫匹婦一念之善若影響况吾侯爲百姓請命精神邈通者明神可達矣反珍而和夫豈誣哉橋因故址以石梁者二廣踰尋而高僅丈道狹而潮激隄跛爲淵城基胥淪而橋亦就圯侯患而拓之梁石增故之一高廣倍之用金爲兩者

若干爲工若干日惟侯自區畫費不妄而制有經由是水道寬平橋安而城孔固維以經久役雖微而所關非細有可書者侯名本字德明別號彭山爲名進士御史改判揭陽因併書之

敬社序

明羅萬傑上陽人進士

傳曰敬德之聚也能敬必有德夫子以善交許晏平仲而稱久而敬之則敬也者乃交友中第一義也君子無不敬也敬身爲大則友也者吾人之第二身也能敬則爲真身爲大身爲天地依賴之身爲萬劫不壞之身不能敬則爲渺身爲幻身爲垢穢叢集之身爲露電速化之身可不慎歟當知敬之一字上接危微精一之傳下逮濂洛關閩莫不凜爲師保奉若蓍龜吾黨爲學靜而操存動而省察內不放逸外絕狎侮與夫持恭淑世忠君愛親無非此物此志而敬業樂羣親師益友又其餘也晚近風嬗性命之朋絕聞勢利之交迭興翻雲覆雨靡不鮮終所謂披肝瀝胆仗義執言者祇以便其私也而一二憤世嫉俗者流塞裳高舉如猿獨跳生峻龍門死吊青蠅則復往往少出門之功失他山之助究且與比匪逐臭之倫同類共義袁石公云古今只四倫大抵缺朋友信斯言也則易演麗澤詩咏嚶鳴皆爲迂談而管鮑雷陳之鬼不幾擲掄人於地下耶故今日而有士焉敦篤行誼砥礪名譽講世好於墳塋聯異姓爲壻篋亦猶行古之道也大上道德其次文藝總不離乎敬邑諸友訂文會之盟以敬名社于長子基升與焉因爲弁其端以詔之若此

苦竹山房草序

羅萬傑

豐順縣志

卷二十二

藝文一

二十六

汕頭韓字局梅縣分局承印

趙子幼文良其所著詩文若干卷題曰苦竹山房草託予猶孫轉示予且以序言見屬予視北舊業久已逖荒烏敢謬相然贊以重予過第聞幼文爲人事親孝處友恭高義薄雲錦心映日其至性純有過人處發而爲詩歌古文辭真篤古澹淹貫典雅時而烟雲澄霽時而雨雪霏微時而伸筇雍容時而扁鼓淒冽要以抒寫其胸中之誠然而發揮乎性情之所不容已非乞靈風華倩妝月露者所能窺其涯涘也幼文之詩文幼文之至性爲之也予壯歲罹難落髮空山鏟跡銷聲謝絕塵世者三十餘年於茲矣不知幼文何所聞見而跡我於山舍間執禮甚卑時值予他出竟不獲面與盡而歸歸時猶喃喃道中不置也豈以予雖毫猶足以語斐然之業乎抑別有所取乎予以爲文章一道可以鑄金石而泣鬼神針芥水乳往往不謀而合其聲光氣韻因以卓立於六通四闢之途而孤行於尋常行墨之外非苟爲已也以幼文之博學偉才歷覽名勝當必有灑然於懷抱間不盡洩不止也異日出其吉光片羽於以齋敝廊廟鼓吹休明庶幾觀面見之又何孜孜然索予枯稿寂寞之言以弁簡首耶失序三都者不足以重三都而三都之賦自足爲人世所重則予雖無言可也

祭孫戒菴文

羅萬傑

士不幸而生衰俗值亂世乃能知幾識微潔身高蹈茹芝拾橡鹿豕爲羣蟬蛻污泥之中嚼然不滓跡雖近放而心則逾苦噫亦綦難矣惟吾戒菴沉姿厚質慧性淵衷童子時岸然自異弱冠與予同遊泮才名藉甚予每遜弗如顧棘戰屢躓回翔膠序者十有餘年迨壬午始捷鄉闈公車北上聞京師戒嚴會場改

期遂回軫南邁嗣是而國運滄桑家園蕩析固已絕意進取丘壑日怡築一畝之宮長齋佛前日與田僧野叟焚修功課樹藝種植耳絕輪蹄之音目鮮紛華之色若將終身焉予嘗有詩壽翁云靜裏生涯資竹樹間中經濟課雲烟蓋實錄也翁每過余山中輒留數晨夕劇談闊論皆世外事未嘗置榮枯得失於齒頰間也今春小女下歸於翁之長郎予聞翁動定矍鑠殊其爲之色喜不意雲輶遽迅蚤迎翁歸道山矣嗚呼痛哉自喪亂來士大夫惜於驚飈遽靈之交加站脚不定從風而靡比比然也孰能誓墓劇名弢光藏采作泉石膏肱乎予皇皇求友得翁一人志同道合以爲末後一段有所倚伏獲脫塵囂凡鎮而今已矣嗟夫世之人徒見翁隱居獨善淡泊銘心僅目之爲高人爲清士而不知翁忠君愛國之誠悲天憫人之感蘊結於中而偶發抒於長林豐草之間嶽崎歷落之際也故以逃禪佞佛富蒼梧鼎湖之悲以鐘魚唄梵當黍離麥秀之謠以衲子田夫當新亭對泣之侶其一段隱衷苦志翁自知之而不欲人知之予亦心喻之而不欲對翁明言之而今始向翁一述之若夫世運之中陂家貲之盈虧子孫之賢愚功名之顯晦壽世之延促如浮雲春夢轉盼成空翁已能了死生忘人言矣予亦何必以種種俗諦曉曉然更相慰籍而混化者之聽哉

霜吟自序

明謝元汴澄海人寄居大田祖

歲何以暮凡歲之烟雲草樹川巒泉石無不暮也自墮地至於老死無日不有暮也暮何獨於歲自海立山飛雷暗石言星宇日蝕無非感者感何獨於歲暮奚感於暮奚暮於歲噫歲暮如是其可感也夫我所

豐順縣志

卷二十三

藝文一

二十七

汕頭鎮字局梅縣分局承印

居什窮山短水以我處之山若加而窮水若加而短龍賓虎僕咸隸奔走則山雖窮水雖短而我胸浩落若有奇山怪石棲壑筆端者感不生於山水而生於歲并小生於歲而生於暮噫歲暮如是其可感也夫每笑韓愈送窮窮何可送則暮何可感余悲夫送窮者而不自悲其悲自視視古人富貴何事然胸有物焉抑而不吐必生狂疾曹鄴所云必爲顛爲沴爲早死人也於是執筆爲酒祇爲脯勞而祭之俾我筆陷紙不活則感不生而歲暮詩可以無作自此四十七年以後於古人或庶幾焉雖窮山短水安知非洞庭彭蠡王屋外方在於門而左門而右乎

案元汴於己丑五月奉命監軍募兵平遠聯絡諸草澤爲援贛恢閩之策癸巳郝尙久反正復與李士浮羅萬傑賴其肯陰相聯絡謀響應尙久敗乃奉母避居十豐順之大田坵塘授徒以食自名所居曰霜山草堂霜吟所出作者復有燼言放言和陶諸集更謀鳩集仲坑山礦徒爲再起義兵之計庚子復一至廣州觀察知永厝已亡諸義兵亦盡陷歸乃奉母還潮州攷癸巳元汴年四十有一居七年迄辛丑年已四十八矣自序所云四十七年以後一語蓋庚子自廣州歸來知明祚已無恢復之望至此作一結束也梁佩蘭謂其古文別開蠶叢爲古人所不能爲惠士奇刊其文入三家文選餘詳見古跡類

陳言疏

清吳六奇湯山人

竊臣廣東潮州人也濱海愚弁不敢言天下事惟就事言事直陳今日海濱戰守之急務實切國家之大政者如揭陽克復之後臣卽陳善後之策已蒙督臣李率奏批行不敢復瀆天聽矣惟是海逆鄭成功未

卽一旦撲滅蓋據海澄廈門銅山等處爲島寨而以澎湖浯州金門南澳等處爲退步諸地皆在海中或周圍百里數十里有山有田有人所居者皆食賊之食官賊之官其黨類滋蔓恃有大船沿海劫掠上至江南溫台下至潮惠高雷等處結紱揚帆去來莫測爲今之計必於沿海地方凡賊船所到之處各設重兵守禦以絕賊刼糧之路必於福興漳泉潮揭等處附近賊寨之所製造船隻招募慣熟水道之人有家眷爲質者使之操舟戰守已備賊中之內亂自生然後乘風破浪犁庭掃穴彼島台之賊無不追蹤逐北矣若船取於他州使船非本地之人則港門水道不熟必悞大事此萬萬不可者且置船之策不惟今日勦賊急用卽鄭逆撲滅之後尙慮海賊時時竊發亦必有備乃可無患如先年海賊遠不具述近如袁八老之後卽有桂竹老又有李魁奇劉香老等寇爲患不絕彼時沿海遊寨尙有官兵又有瞭哨兵船卽如南澳先年設副總兵一員內有廣營福營又有防倭一營今爲僞侯陳豹所踞則今日置船招募以圖撲滅復此疆土不可不亟爲綢繆也然造船之見人言所必同者而臣所言置船須得其地用船須得其人乃治海急務萬不可無此人此船者竊慕之見尙有可採伏乞皇敕議施行

招撫南澳疏

吳六奇

竊維南澳一島原屬廣東潮州饒平境上與閩之廈門銅山久爲鄭逆盤踞巢穴康熙二年五月臣奉上旨會勦無功兢兢待罪乃多方用心以圖必得至本年十一月初四日據臣標署守備管中軍遊擊事部瑞稟稱本月初二日據署守備管中軍守備事李青稟報有南澳僞鎮杜輝遣長髮差官林星初一夜從

豐順縣志

卷二十二

藝文一

二十八

汕頭鎮字局編修分局承印

馬頭山登岸潛至汎內前來見青稟欲見臣有議大事之舉事干緊急機會端差林恩護送林星到臣臣卽隨喚林星面見繳杜輝上鎮海將軍王國光小劄一摺據稱杜輝願以南澳投誠立功等情時將軍臣王國光安輯部臣華善同內差往省西巡臣乃令臣標隨征都司歐亮効用官陳忠林恩帶林星赴見安輯部臣陳一炳鎮海副統臣吳大壽臣段應舉會議給牌符與杜輝印信文書於初六早由黃崗直至南澳面見杜輝仍給牌一張付與歐亮與輯部差官吳必興駕船泊於橫山同接消息刻限回報去後初九日據歐亮稟稱初八日杜輝又差林星同効用官陳忠林恩回來口稱欲與臣面會有書一封交陳忠等投上亮同輯部差官帶林星見輯部兩副都統及潮州鎮道府館於公議堂會議約十一日前去相會等情臣於十一日會同安輯部臣陳一炳副都統臣吳大壽臣段應舉齊到黃岡俟至十三日據瞭望兵望見南澳有大船五隻前來又據大城所千總張祐馳馬來報稱杜輝親到安與臣相會臣卽時同安輯部副都統臣前去途間遇澳差林星稟稱各要單騎不用多人等語臣見杜輝心尙猶豫立撥部劄參將管大城所守備事吳漢中軍守備李青先上杜輝之船以安其心杜輝亦帶親兵百餘人登岸至馬頭山時副都統臣吳大壽帶正白旗噶叭叶李章京副都統臣段應舉帶鑲藍旗李代子單騎前去仍撥趙山山大朱甲喇各官帶八旗官兵同臣下中軍遊擊鄒瑞部劄都司簽書李焜隨征戎旗守備張魁蔡鳳陳龍千總朱樑張祐各帶官兵劄營橫山砲台及在馬頭高山背後防護臣則帶部劄都司僉書曾蘭同安輯部臣陳一炳副都統臣吳大壽臣段應舉筆帖式臣江惟祥單騎至馬頭山下相會據杜輝口說鄭錦雖

敗銅山尙要整理大船燒紅彝夾板思復金門廈門有牌調輝輝見鄭家之人骨肉自殘願以南澳獻地
爲功非有兵馬所逼卽有兵馬輝亦能當一面等語時臣等諭以利害勸之再三乃要臣等給示差官前
去南澳張掛令兵民削髮約十六日繳僞敕印先送家眷過黃岡容輝收拾在後帶兵民集全來又稱官
兵有五千大船四十隻中船百餘隻民有二萬何以安插等語至申時彼此起身而回然後吳漢李青
俱各回來十四日臣等會商卽給示各送袍帽靴帶令差歐亮等齎送前去並監督兵民削髮去後十八
日據歐亮稟稱見杜輝十六日掛示兵民剃頭立要渡海因十六十七兩日大風難渡今杜輝先遣長子
杜國琛帶僞印關防牌劄并杜輝胞弟與僞坐營中軍家眷先到黃岡杜輝欲將澳民渡盡然後將家眷
并各將兵丁家口盡上大船載往揭陽縣內居住等情臣與安輯部臣陳一炳副都統吳天壽臣段應舉
江筆帖式趙固山朱甲喇并八旗官兵中軍遊擊鄒瑞等各將領齊到橫山割營其長子杜國琛年一十
四歲同僞參軍錢青陳珍齎僞蕩湖將軍銀印一顆僞牌劄五十張當公賬房隨交安輯部臣陳一炳
收訖其子并各家眷臣卽備用民伕搬進黃岡城內着千總朱樸劉勝張祐將各將領房展及兵房撥空
與住此日來到兵民男婦已有千餘二十一日臣接杜輝手書內稱二十日將輝家眷及將領兵眷載入
揭陽安插其士民眷口亦令隨船載入黃岡其澳城民房或存或燬乞迅委官料理等情并與輯部都統
諸臣各書一封是日安輯部臣卽令江筆式潮州府知府朱微璧前往揭陽縣預撥房屋其澳城去留臣
就近呈請平藩將軍督提諸臣會議裁奪去後二十三日據歐亮自南澳回來稟稱亮二十壹日本差同
豐順縣志

卷二十三

藝文一

二十九

汕頭鎮字局梅縣分局承印

輯部副都統各差官一員蒙交袍帽靴十副齎往南澳要杜輝前來剃髮以便疏報等因亮遵依前去值
狂風大作坐船桅斷舵失輪破入水飄至南澳後沙地方潮水攔淺方得登岸到澳而輝已於二十夜開
船去揭陽矣等情臣同時面副都統吳天壽據揭陽炮台水師遊擊李培基報稱杜輝有家眷船四十隻
兵船三十隻俱入揭陽港內等情二十九日據潮州府咨呈內稱同筆帖式江親到揭陽撥出房屋五百
餘間不足又撥出東南門內二街民房並大頭目衙門四十餘所俱已齊備又知府自捐糧米五百石暨
家伙等物俟應安插具報在案同日又據歐亮稟稱杜輝於二十八日親帶大小將領到安輯部臣衙門
遵制剃髮訖等情查先渡過僞將楊世燭等二十餘名臣各給袍帽靴帶馬匹各將領家口共一千七百
餘口臣撥給屋米安插在黃岡城內居住渡過民間婦女一萬餘口每日臣給米三升五升不等聽其四
處居住俱經塘報平藩將軍督提在案其杜輝所帶官兵家口船隻軍器開列造冊呈送平藩將軍督提
輯部諸臣題報外以廿載踞澳之逆寇大師未曾壓境而杜輝一旦統衆輸誠各携家屬及兵民眷口棄
澳盡歸朝廷之德化仰祈皇上崇傳鼓勵來人然此乃仰賴皇上齊大之洪福而平南王臣尙可喜鎮海
將軍臣王國光協鎮將軍臣沈永忠督臣盧崇峻撫臣盧興祖提臣楊遇明之密諭招徠潮州鎮臣黃應
傑安輯部華善鳳籌方畧與部臣陳一炳筆帖式臣江維祥宣布皇仁副都統臣吳天壽臣段應舉單騎
不避危險之力也臣雖竭盡心力派屋撥船給發袍帽靴帶馬匹豬酒糧米不惜已私以報朝廷萬一分
所當然何敢言功惟臣下標員如隨征都司歐亮渡海四次捨命涉險如部割參將管大城所守備事吳

漢曙守備管中軍守備事李青身先虎口如署守備管中軍游擊事鄒瑞童統勦勞千總劉勝朱樑張祐部剖都司僉書李焜曾蘭王隨征都司陳利守備張魁蔡鳳陳龍林馥效用官陳忠林恩等靡不竭力奔馳共圖報効以紓皇上南顧之憂也緣後恭報南澳偽鎮報誠情形字多逾格伏乞睿鑒恩宥施行

再報招撫疏

吳六奇

案照偽將軍鄭夢蛟等率衆投誠業經稟報外康熙三年二月廿四日有偽前隨征都督僉事陳六言自銅山駕船一隻前來繳偽關防一顆偽牌一張隨行兵丁一十九名家眷廿七口三月初四日有偽都督毛興偽副將毛玉陳勝林岑陳好李祐林宗等據稱三月初一日自銅山與偽伯洪旭黃廷欲送鄭錦去台灣一同開船方得駕船五隻帶到兵丁三百五十五名家眷四百七十七口繳偽關防二顆偽牌二張前來投誠三月十三日有偽都督張堯天偽杜進林亮張東據稱同洪旭黃廷送鄭錦至金門駕船二隻兵丁七十七名家眷五十八口繳偽關防五顆偽牌十張前來投誠各等情到臣經逐一驗明各給袍帽靴帶通共給過緞袍一十四領布袍廿一領帽廿五頂靴廿五雙計帶到兵丁眷屬共一千一百八十五口臣各給食米菜銀暫行安插解赴鎮海將軍臣王國光安輯部臣華善陳一炳驗明遵制剃髮通報牛藩協鎮將軍督撫提鎮諸臣在案今照銅山逆賊俱已削髮登岸止有鄭錦洪旭黃廷雖潛遁海外難逃福建靖藩總督二臣之勝算銅山逆城現福建靖藩總督兩臣親率大帥進勦平燬全海無寇臣汛守邊海招引投誠實叨福建靖藩總督搗巢之功廣東平藩將軍督撫提督輯部護都統鎮道府館縣諸臣德威之力也緣照康熙二年十一月南澳偽鎮杜輝吳傑投誠起至三年三月偽鎮張堯天等投誠止前後總計招過偽將軍偽鎮將共一百八十七員兵丁四千三百五十四名家眷三千八百九十四名渡過百姓男婦三萬餘口駕來大小戰船九十七隻臣逐一驗明造冊繳赴鎮海將軍臣王國光安輯部華善陳一炳查照存案外至於應請各偽鎮偽將職銜鼓勵優異之典及編氓安插歸農與調撥入伍充兵之例平藩將軍督撫提督輯部諸臣自有公疏無容臣贅也臣前後給過袍帽靴馬食米菜銀少稱臣分函散開報惟是臣之標下前疏開列有名將領始終竭勞不敢少怠至饒平知縣劉鴻業捐米五百石協心料理提督臣差隨征守備厲逢祥能與投誠官兵周旋安慰宣布當事諸臣愛待之心功實不少自此海不揚波邊鋒無警誠我皇上一統無疆之福萬年有道之長也緣後再報投誠事理如此具本專差齎捧謹

題請別調疏

吳六奇

竊臣粵之潮人也爲因海寇披猖屢犯潮疆先帝鑒臣微勞愚忠賜臣敕印特命鎮守潮之饒平地方以備勦禦臣受事至今十有一載鞠躬盡瘁罔敢有遺餘力茲海上逆寇如廈門銅山浯嶼等處皆一切犁掃而南澳全島業已來歸即碣口蘇利背恩抗命自干天討亦以伏誅瀕海之地靡不蕩平內安外攘永紓朝廷南顧則饒平加設之鎮應可議裁者况臣乃潮人不可久守疆土向因邊疆未靖所欲言而不敢言者今幸地方無事可以披陳愚悃以仰天眷臣之任內叨蒙皇恩加臣三次官銜兩次賞賚策援招撫

又蒙記功記錄受恩最深圖報宜切以臣有餘之力當報罔極之恩伏乞皇上將臣調任別省饒平地方併歸潮鎮使人地得當經制有定朝廷官人之典歸於劃一可爲天下後世鑒德成憲臣復得竭犬馬之力馳驅於外以盡捐糜報國之忱也爲此具本專差守備蔡鳳和齎謹題

上藩督將軍揭

吳六奇

爲乞採末議題留道官以固海邦鎖鑰事切照潮州巡道一官爲邊海封疆所繫最重凡地方之吏治民風寇賊奸宄以及衝蠹豪橫悉賴整綱肅紀執法彈壓以內鞏金湯而外靖山海蓋緣督撫憲台越在廣肇去潮不啻千里即惠州守道亦千里而遙雖節制之權無遠弗屆而封疆緩急請命維艱非得風憲衙門駐茲海國上以奉宣憲令下以懾服人心則封疆不無叵測之虞此自古以來因地設官至意也茲職聞邸報見嶺東巡道一員及南韶羅定嶺西海北共五道概在議裁奉有敕下督撫確議歸併之旨竊謂他道皆在內地潮道獨在邊陲似應分別議留者職身在地方爲地方起見不能默默故敢僭陳末議仰祈憲台俯察蕤蕤倘屬可採伏乞題留俾海邦重地得固鎖鑰社稷生靈益永賴無疆矣

招周黃洪三鎮書

吳六奇

閩海諸公雄居島上以懷舊主之恩而守不臣之節矢志孤忠不佞仰之久矣矧以麾下之英風高誼而不僅一方彼美之思者每悵邊疆遙隔聲氣未通且以向者同舟將士同爾一心志在擊楫言不投機故未敢致尺一於麾下也茲者麾下共事之人內而家庭骨肉外稱十城腹心者皆已次第來歸身膺清朝爵祿之榮將棄帥主如孤注矣况廈門金門已失守南澳鎮將復統衆歸潮此亦苦海無邊回頭是岸之一日也度麾下之意尙猶遲疑未能自決者或以舟師不忍遠離閩土非所東居則東粵十州瘁地惟任所擇者愚然肯來山河帶礪固無疆惟休也粵之藩督將軍靡不引領以待麾下豈特我二三同事之翹企已哉去就之機惟麾下早自裁決焉

招杜吳二鎮書

吳六奇

今日四海一家向背之勢不待明者而後決乃二三豪傑尙依戀島上徘徊觀望者不過因前諸重鎮未忍舍舟登陸遲疑未決耳茲者鷺門鄭黃周陳諸翁已決計來歸鄭親翁此月初八躬率舟師進入泉港約藩督諸上台十五抵泉十八薙髮不佞探報已確此正豪傑乘時各就功名之會也况鷺門諸翁投誠於閩爵土固自有限恐未得人人而尊顯之若我粵當事日虛爵位以待且不靳以五鼎請之於朝如忠勇侯陳翁已膺寵命繼此非兩台其誰也况日者將軍提督正爲南澳之役而來旦夕可抵界上兩台若幡然改圖惠然至止則將軍提督之欣然起敬尤爲百倍安有不極力汲引與藩督會題以遂台臺之大願者此中終始之事皆不佞一力擔承決然無誤萬勿復再徘徊坐失事機以負不佞披瀝相告之誠是所望也倘荷慨諾即惠好音併遣的人過我定議臨楮翹企不盡

祭羅吏部夫人文

吳六奇

維坤儀之嶽降兮粹質娟娟珠潤榕水兮玉種藍田挺金枝於名苑兮輝寶婺于星躔美嬌阿洲之淑兮

蘭儀肅穆芳傳閨閣之秀兮慈問昭宣嬪嫔翁而作配兮相夫子以爲度方賢年而桂折兮甫弱冠而臚傳名高斗北兮身近日邊文貴京洛之紙兮政握天官之銓賴函贊于闔內兮斯升華子帝前乃滄桑之忽變兮棄軒冕而逃禪既蘿衣而薜帶兮漱流枕石靈亦耽蔬而絕綺兮燕處儼然看佳允之六翻兮將高翔于九天喜蘭玉之濟濟兮復瓜瓞之綿綿遡家慶之駢集兮由母德之獨賢既歌蘋藻雞鳴之什兮載誦麟趾膠木之篇徵音足嗣乎千古兮眉壽富齊乎百年何瑤池之促駕兮遂鸞馭以蹕蹕嗟莖臭之芸香兮望瑤光而弗輝忽聞訃而心惻兮搗蕪沫而涕漣誼關婚媾之戚兮忱託楮帛之鎮恤論褒之寵錫兮慰慈懷於九泉靈有知而不寐兮共來格乎几筵

募修鳳凰山大平寺引

吳啓鎮

地有名山必有勝刹以潮人談潮勝則鳳凰山其最著層巒疊翠瀟烟樓雲景難筆罄昔年先君澄鏡巡行覩其山川佳勝買山建寺名之曰大平蓋指我朝定明季之亂除寇安民自此大平之義也召僧住守祝國庇民廿餘年於斯矣歲月既深棟宇傾頽僧照吾者懼勝蹟之不修有墮先人之盛意愀然謀于余而新之余不才棄書學劍奉天子命守濱海斯夕斯孽孽者增雉堞嚴斥埃阻勉職司保守疆土未遑他務惟寺之建也越禍亂興大平成久矣長治之洪基特著斯名以昭示來茲倅後之人顧名思義知功德之隆感慕於無已則於國家不無小補何敢聽其廢墮第力獨難成倘荷同心慨然樂助則名山重輝勝刹再煥咸拭目以觀大平矣

豐順縣志

卷二十二

藝文

三十二

汕頭鎮字局梅縣分局承印

禁開礦疏

陝西道監察御史 景日珍 何南堂 同奏

題爲開礦無益事臣伏聞邸抄見護理江西巡撫贛南道臣徐題爲循例開礦等事奉旨開開礦事情甚無益於地方嗣後有請開採者俱着不准行胡爾等免其處分欽此仰見聖明無遠不照雖古帝王明目遠聰無以加茲臣昔任廣東高要令訪得海陽縣之仲坑山商民何錫奉文開礦一事該地負山面海不比江西南源尚居腹地何錫雖稱鉛錫實多銀砂游手之民一聞招採四方雲集撫臣前題連陽縣民搖雜處開礦聚集亡命爲地方隱憂况仲坑山距省千有餘里較連陽更屬邊遠竊思年景有豐歉地產有盈絀山陬海濱奸民勾引保無藉端滋擾爲地方害之事此種情形我皇上聞開礦事情其屬無益固已洞鑒如神無庸臣言之矣所不勝駭異者何錫乃普寧縣棍徒垂涎礦利從前扼於地方之查察尙知顧忌自奉部文准其開採公然號召醜類漫山滿谷果係殷實善良必不肯託足其間近聞聚散不常明來暗去黨羽不下十餘萬以狡黠之徒倚負嶠之勢竊劫姦淫無所不有有司過問便云阻撓雖潮鎮重兵可資彈壓然海疆重地營利各有專汎徒衆兵寡豈能到處防閑種種俱多未便伏乞敕下督撫會查仲坑山現在開採情形若何酌議停止其聚集多人或猝難驅逐如何陸續解散限於月日聽其出山不許再入待其散盡永爲封閉庶嶺海獲束救寧之益絕意外之虞至何錫呈每年進銀五萬兩今開採三年尙未完半已屬玩誤乃云止缺餉銀一萬更屬悖謬且已自認五萬之數胆云嗣後每年認餉一萬六千多寡懸殊完全任意豈以部文爲不足憑開採年月爲無可稽耶何錫每年獲利不下八九萬兩除完公

外尚多羨餘自奉奢侈廣行結納乃故意欠餉藉口補解希圖展延以遂其壟斷之計假公濟私罔上肥已情罪昭著並請敕部嚴查追其欠項使無賴奸徒知有法紀則地方懲多事之人即地方享無事之福矣

案何錫具呈內務府准開仲坑山號排冒墩二處鉛礦情願遞年進銀五萬兩以十年為期進銀百萬兩嗣以山空礦少每年解銀二萬復請開長樂之劍公坑以補缺餉項三四年間礦徒嘯聚經臺臣糾參康熙四十三年封禁何錫庚死獄中

重修揭陽縣序

羅國珍 上陽人舉人
昆陽知縣

古者有國史有閭史其閭史即今之志也雖云史之支流然一時紀載百年之是非以之俯仰古今燦若列眉其採之大史存為國是謂可以方言忽之哉江淹曰修史之難無出以志蓋志者所以維直道而信今傳後也任已則刻徇人則濫惟刻與濫是滋偽也若之何言焉可傳傳焉可信耶揭處海濱秦漢間潮皆揭地至宋宣和卜治玉塞而邑仍以名建置來有聲東粵舊矣閱歲五百有奇修之修也僅一再見明季時事變遷地成戰壘其不為狐宅茂草者幾何矣且也蕩蕩之應傷乃民隱滂沱之災時切禾稼蠹粉蝸涎之際猶有間邑乘而執筆從事者乎我朝重熙累洽百渡維新邑侯鄭廉水先生以良史來宰是邦握機而化吹薰以字浸浸乎瘳瘳之起矣乃執掌公餘留心文獻慨然以志事為已任遂屏局延訪或斷簡之猶存或老成之未謝博採宏蒐補其缺莖其蕪明其微闡其函不佚舊不侈新體裁既具屬余成編安事也是則先生志也由一邑以之天下懲於是焉勸於是焉觀政於是焉為先生之化成固于茲觀吉光之片羽矣

豐順縣志

卷二十三

藝文一

三十三

汕頭鎮字局梅縣分局承印

游豐溪記

葛祖亮 浙江人

環豐城皆溪也夾流於萬山之間為一邑勝概其發源有二一自縣南豐田嶂蜿蜒而東復折而西北一自西南言嶺諸山盤曲而西亦會合於西北紆迴奔注過下湯出產溪入於隘隄之大河蓋幾二百里云溪多石骨峻峭布列舸艇難行豐民每以鮮舟楫而多負擔為勞然灌溉者于斯綆汲者于斯有自然之美利世享而未之知也城西數十武溪有沙渚約六七畝上為墟市以一四七為期民間日用飲食於是乎在肩摩駢集四方羣赴而貿易焉圩下即邑人所稱湯田也周廣畝許怪石星羅若蹲獅若立鵠者游魚之聚泳臥虎之馴伏中有溫泉宛然列鼎而炊者一二十坎或同釜沸或如噴雪清和而薄霧氤氲微風而輕烟繚繞霜晨雪夕莫之或異凡士民之朝而沐暮而浴以浣以濯者咸就給焉且其泉能療諸疾有利無害斯誠取之無盡藏用之無窮期山川之靈異造物之特奇者也夫豐當明季為羣盜淵藪士女不遑寧處遑問流泉我朝定鼎邑人吳少師起而廓清之國家愷澤覃敷大化翔洽百年於茲猶虞海揭嘉埔之偏隅漸摩未遍割為新邑設官建治以永保斯民今者山高可仰泉清可汲豐之人得以暇日邀游溪光雲影之間其可不知所自哉余每因稽理工程之餘徘徊溪上萬山疊翠掩映清流顧而樂之又

嘗尋寶寺之桃玩龍山之月訪太陽古榕而不能數之至也若夫韓策之雲銀瓶之雪淨水之鐘揭嶺之泉存諸想像而未嘗一至其地然則二載以來所爲且暮優游而忘倦者非此清溪白石有以豁旅情而助逸興也耶既以自快而并爲豐之居逢名勝而生際熙皞者慶也因記其大畧以誌不忘若此

豐順縣志序

潮惠嘉道楊國棟襄平人

郡邑之志史之遺意也史之體春秋之變也春秋比事屬詞其體嚴其旨微一字之中褒貶寓焉大史公作史記嚴春秋之法爲年表爲月表爲人事爲本紀爲列傳非春秋之體也而一代之規模具焉此創舉也孟堅以下諸人無能出其範圍者誠以繼之者易創之者難也志之筆史筆也而其用史之根柢也周禮大史採民風而登諸天府凡廣谷大川之異制剛柔燥濕之異宜男女穀擾之異俗皆按攷圖籍調劑損益以制其典章肆於時夏至于志則一州一邑之綱領具焉自建置沿革以及人物草木鳥獸無不畢賅俾守土者得以攷藏書而察治忽其所關巨矣世宗憲皇帝詔修天下通志實周禮采風問俗是也我皇上深仁翔洽薄海淪肌列數圖貢度地居民二年冬特元前制憲鄂公之請以海陽之豐政都僻處萬山明代宵小竊發隆慶初設通判治崇正時又增置豐順營本朝定鼎于藩田設巡檢一員駐劄但此地崇山峻嶺徵員不足資彈壓而海陽又輟長莫及因准予海陽揭陽大埔嘉應四州縣之中設豐順一縣令一尉一城垣署廟營汛壇壝悉如成制五年之間邑令兩更田疇戶役草創經營於邑制未遑焉八年癸亥葛君曙來令茲邑至之日咨訪民俗考定禮儀設險防匪無或不當民已欣欣然歌孔途矣越二年

豐順縣志

卷二十二

藝文一

三十四

汕頭鎮字局梅縣分局承印

以邑之有文獻所繫實爲出治之本固不可一日無而邑係新設志須創始與考成而刪定纂修者雖易迥殊惟葛君古學史才積蘊有素且銳志力行乃取郡邑各志及軼見於他說凡屬提封之內者搜羅殘簡採輯舊聞訂魚魯之訛正亥承之辨去疑存信勒成一書分其屬類次其更秩別山川之險要攷人物之挺生稽諸古蹟辨其土風一披閱而晰若觀火故曰爲天下者爲之於堂上此物此志也凡四閱月稿成屬序予予竊思余恭承寵命觀察二郡易俗移風有志未逮而上憲殷殷求治屬望彌深予承乏茲土冀得與良有司鼓舞振作以報厚意而葛君蒞任未久即能洞察治本以志爲敷政之源毅然身任其存心於政事民瘼者可勝道哉余覽志豐巖邑也其地險阻其民樸質有理學之芳規有節義詩文之碩彥其流風餘韻足以廉頑而立懦至于釐賦役而慎催科崇典禮以正風俗庇財用謹關梁望氣稔繁祥異凡樽節愛養以臻於王道之隆者均于是書操其要焉後之君子居是邦國是編張弛損益之宜講讓型仁之道油然而生而朝廷亦得收良吏化民成俗之效其爲功且與史等予故樂爲一言以告吏茲土者

羅鎮瑾永思圖贊

舉人羅松樑上陽人

彼何人斯鸞停鵲峙天官派孫封圖支裔生平襟期瀟灑樂只今則冠帶加身肅容備禮捧盤獻盃鞠躬謹備是胡爲不解衣盤礴徜徉自喜乃莊爾容慎爾止其心蓋曰我視如在優游杖履畢生事存終身永矢我將以荐其時食者貽後人作個樣子

羅庸菴萬傑像讚

賜進士出身
大僕寺少卿 梁應龍 海陽人

松栢富寒後凋乃見混濁之世清士自彰吾庸翁文品擅長南宮早捷史部垂芳掌蘭臺章奏之權心存
公愼膺河南典試之任職重衡量今者解組回籍既遜崇岡謝簪纓而弗顧託樵採以何傷入山女深下
求無慚於幽獨歌詩却聘上告無罪於先王於戲夷齊首陽高臥日月爭光若翁之清風亮節又奚難與
之韻頡

藝文二 文徵文類

邑人李唐介承甫編纂

丁日昌

黎園曾文正公祠引

庚午冬日昌扶持先慈靈輜南歸路過江甯公冒雪刺小舟來迎至下榻握手痛哭悲不能自已深談三日夜始解纜言別詎首別甫一年而公遽歸道山水無見面期耶園中構一廬奉公栗主於其中公生平足跡雖未至嶺南然子瞻所謂神在天下猶水之在地中公庶幾來格來享真不負日昌瓣香之誠矣乎

善堂序

丁日昌

世運之隆替由於風俗之美惡非一朝一夕所能致故古者家有塾黨有庠遂有序婦人妊時令婦誦詩道正事而又每歲孟春道人以木鐸循於路以振發勸戒之善其自孩提成童而至長老自朝廷都邑以至里黨所聞無一非仁義道德之實所見無一非禮樂刑政孝弟忠信之事化之之篤如此異行者有誅異言者有禁教之之嚴又如此當是之時風俗醇厚野人遊女行誼皆確然可信不致迷入歧途豈非百姓生而皆善習俗不期美而自美哉要在教之化之者不憚煩瑣邪則防之善則引之使趨向歸於一是耳潮州自韓文公教化後民始知學子瞻蘇氏稱潮之士篤於文行延及齊民號稱易治殆非虛語迨至近代薛中離以理學著翁仁夫以事業著郭仲常以忠節著鄉里間東身自好之士指不勝屈聞故老傳言鄉宦中有由捷徑而進者雖聲勢赫奕平民至必與爲婚姻漸染薰陶有海濱鄒魯之稱嗚呼何其盛

豐順縣志

卷二十四

藝文二

一

前項諸字局梅縣分局承印

也何其盛也嘉道間始染漳泉械鬥之習視人命如草芥蜂屯蟻雜喧呼號令郡約計每日夷傷至數千百人因而田疇荒學校毀既失其所以爲善更失其所以爲教風俗之弊於斯爲甚比幸械鬥稍稍衰息而異端復發鼓其間蚩蚩者趨之若鶩淫僞之習熾則橫逆之念驟發而不可遏是以今年四月有風吹寮揭竿之變夫以失養失教之民侈然自肆浸淫至數十年之久既無人師爲之範圍曲成而又異端邪說引誘其聰明紛惑其耳目譬猶疴瘋之夫元氣久虧而又憂思攻其內風邪襲其外疾安得不起然則潮民之日背於善日趨於不善夫固固然而無足怪者前一二年同志中即有倡爲善堂之說者以刻送善書勸人行善去惡爲務既而傍有阻之者謂潮人習與性成無爲善之念無行善之力議遂中止今年冬復有申明請者諸賢大吏各助以貲與言與力同志者皆踴躍從事定爲條目十一則其大旨以宣講聖諭使人人知異端之當黜正學之當崇爲首端而拯飢寒卹孤獨施醫藥戒鴉片明果報禍福之說亦附以行議未一月輒有規模聞者見者咸嘖嘖以爲盛事然則向之謂潮人習染過深無爲善之念與爲善之力安於爲不善而不安於爲善其言豈可盡信與古之異端但執其一偏以陷溺人心未嘗強人以必從也今則有勢力助其氣餒復用其小惠小忠之術以要結人心使庸夫視之若類於古之有道者然故從者愈衆其可憂也愈深若彼所爲小忠小惠我舉而爲之而更於果報禍福之念動其中則無論有識與否其不肯舍近而就遠舍吉而就凶固灼然明矣夫果報禍福之說儒者不談然潮人習染既深驟進以正說不謀利明道不計功譬如尋尺之木而欲度之爲棟樑一葦之舟而欲乘之以浮江海力必

不任事亦不濟易曰積善之家必有余慶積不善之家必有余殃然則聖人教人亦未嘗不兼言禍福司馬子長所謂議卑而易行近已而習變相類此物此志也自今以後善堂日推日廣從善者日見日多粗者既能求其精者淺者既習求其深者更引而進之於道不以小善自封先之以小學始基正矣繼之以大學體用宏矣其出而任民物邦社之務則不屑屑於富貴利祿而以正己正人濟民利物爲先其處而在鄉黨草野則獎善類端趨向使愚夫婦皆知善之當爲不善之當去而不爲異端邪說所淫蠱若是則信道篤成材廣風俗美世運隆矣是在勉而進之已否則僅以小惠補苴目前固亦當世之所希而余追維邇治遐想先民輒俯仰留連歎歎大息而不能自己者抑獨何哉抑獨何哉至於經費未充其施未遠則有望於豪傑之士光緒六年

上蘇撫李宮保請假書

丁日昌

日昌受事以來無一事不荷裁成無一時不蒙訓誨所以屢遇洋務棘手之事皆得上稟指南致免傾軋然洋人性情反覆變詐萬端領事雖有十餘國而交涉輻輳之事以英國爲最多尤以英領事巴夏禮爲最難諧際余賦性褊急每見各國照會無理挾制中國何以爲必委屈羈縻輒追維從前所以致此之由與後此所以制之之術而不得其解至於廢寢忘餐歎歎大息不禁興匈奴未滅何以家爲之歎當巴夏禮到滬之日正某受事之秋該領事意氣甚張要求之事不一而足某多方搪抵雖無一事遂其所欲而大致尙未決裂所幸本年以來洋淫濱窩藏匪黨業已肅清城內洋兵所佔宮廟城門業已交還洋淫濱

豐順縣志

卷二十四

藝文二

一一

汕頭鎮字局梅縣分局承印

賭場洋人收費以鉅萬計業已禁絕吳淞口俄英各國所買炮台地基業已清理小輪船進內地逃捐漏稅業已禁止高昌廟洋檢險口糧不資業已改復楚軍營制其餘電線鐵路海關抽釐會審鳳山馬路各事亦皆一一婉行阻止法言巽語唇敝舌焦每恨徒以口舌相爭雖非正本清源之策而其勢不能不暫出於此則亦不能不相安於無可如何之秋而當夫理喻勢禁之俱窮怨毒中積和蘊外流氣降血騰陽伏陰戰受病之深實由於此日昌早欲請假調養徒以巴夏禮在此不敢遣後人以難刻下巴夏禮已到東洋各事亦漸順手而某心跳頭暈之症日甚若不趕緊醫調誠恐一成怔忡則此生遂成廢棄矧值時事艱難人才消乏某敢不珍惜其身以副國士之知備他日之用惟有歷訴始末以明受病求代之故並非同於規避取巧者不然某若病軀戀棧顧內循享其甘而不任其苦未嘗不可以苟延旦夕尸位素餐而坐是泄沓成風積重難返非惟負憲台陳紀振綱之責望亦且失立身行己之初心自維年力尙強但得盡心調醫數月必可痊愈屆時再當趨叩鈴轅聽候驅策無論冒鋒鏑禦魑魅均不敢辭士窮志短烏病鳴哀瞻望龍門悚懣曷已

復莫子偲書

丁日昌

良儔一別山川間之所思日久白雲淞綿頃承惠書知布帆安穩止吉勝常甚善其善擬造尊齋雨阻不果悵悵而返想君子宏修遐詣學爲紳儒介然之志孤秀神崖確乎之操獨師懷抱既謝榮於簪紱彌樂志於園林陳書十篋思娛更適頓首一書俗轉貞鶴立清標欽遲曷已迴憶昨者高賢枉駕下榻敝衙

歷旬有二四月維夏百卉具腓小園拓地層紗時霽新竹倚牆綠甍一室幽鳥微哢鎮靜碧山時於此間得少佳趣落落霞想擊破處仲之壺灑灑烟雲揮盡君房之墨藉以送日樂哉樂哉至如來書云云實則過蒙推許夫具龍驤之姿建鷹揚之績新玄黃之日月拯蒼黎於水火將使休烈垂於千春詎止崇階班於五等以蒙視之嗟乎後矣某崎嶇戎馬適會遭際受任非恆良欲澡雪精神區別風烈無如懲乾沒吏居小當位封狼居胥力未副心每語所知坐是憤歎結轡於下肝火熾作頃請假治病文字已出老莊告退山水方滋偷遂所願良復佳耳要以天下安危爲心者必不以一官去留爲重非我素交孰明本懷來書又云欲爲鄙人校訂拙集信如新言益增頽汗古來賢達類不著書匡坐雅談縱橫王霸迹其設施大失故步託之空言見之行事亮有間矣拙著數篇指切時務凡所命意實事求是遠計工拙迴欲廁之作者之林竊恐騰夫千秋之笑吾家敬禮定文當時何如後世自有子雲假如麟生自所撰著必也名山異書再讀十年曠世逸才盡交四海雲雷經綸粗有成就龍螭外物略具端倪然後藻繪道義模範金石諒之來哲庶無媿詞承君厚愛故敢貢忱時當炎伏大火未流貴體善調想無虧損令子無恙請勿繫懷因病獲暇奉教不遠藉作芳訊青鳥明之

留李縣主李洪毓呈

丁日昌

爲好官難得僉乞詳准借寇以順輿情事竊照豐順地瘠民貧兼以兵燹之後十室九空全賴賢父母加意撫綏庶幾元氣漸復民可安生幸本年一月間李縣主奉委到任愛民如子嫉惡如仇豐順舊差本極

豐順縣志

卷二十四

藝文二

二

汕頭鑄字局梅縣分局承印

兇肆符檄所至豺虎生風驟突叫囂盈千累百李縣主嚴加裁革有犯必懲棒枷不致在戶雞犬亦覺恬然民之得安其生者一也豐順民情好訟歹徒訟棍往往懲惠原呈株連無已李縣主訪拿惡棍有誣告善良者必嚴加懲辦獄訟息而後禮教興稂莠除而後嘉禾植民之得安其生者二也從前縣主每審一案排衙有費值堂有費案未審結而兩造已受累無窮李縣主案不輕准准必速結一切堂規雜費裁革無餘此心幾同懸鏡兩袖惟有清風民之得安其生者三也從前無賴紳衿往往內串門閭外通差役擇肥而噬朋比爲奸李縣主洞悉前情凡非公而至之紳一概謝絕不見豪強斂迹庭戶肅然民之得安其生者四也縣屬經賊匪蹂躪之後盜竊尤多從前事主報案不惟案不能破而差役尙且索費不貲李縣主夜間巡查嚴加躡緝屋角少穿墉之歎村鄉無吠犬之驚民之得安其生者五也從前胥役催糧每多浮費官困於拖延民累於飛灑李縣主則按圖索驥窮戶亦願輸將撫字心勞而催科政亦不拙民之得安其生者六也其餘考試則拔取其才端本則栽培義學雖蒞任僅及三月而善政美不勝書百姓水深火熱之餘殆如飢之得食寒之得衣飲水思源未嘗不感激涕零幸憲天之委任得人生死而骨肉之也茲聞瓜代有期卸肩在即民情繾綣物望依依在大憲用心猶矜後賢未必不勝前賢在蒼生望澤如春生手或難同熟手伏念河內許借寇徇穎川終來黃霸雖古之聖君賢相未嘗不俯從民望緩彼星移况豐順素稱苦累官皆視爲畏途某等所以匍匐遠來哀籲階前者實因數十年無此好官故願稍緩須臾冀觀德化之成又冀大憲勸勉誥誡良吏不致初終異轍將見懦立頑廉聞風興起豈僅區區瘠土數

十萬人歌舞大德而已籲懇逾格恩施據情轉詳大憲無任悚惶待命之至

木蘭代父從軍賦

以題爲韻

王顯朝 錫侯

俠女風雄軍書火速愾敵君王情深骨肉不甘折臂衰翁託諸同心健僕揮鞭而去看來玉手纖纖擐甲而前望到花容簇簇日慘兮風寒天陰兮氣肅孰意美人善戰鼎定江山竟教孃子能軍兵皆草木當夫戎興突厥兵點可汗邊防士卒募召軍官百萬家妻子耶孃牽衣頓足數十道東南西北市馬買鞍大丈夫此行直比焚舟而濟我國家無恙誰能立壁而觀按戶口而徵兵愁絕衰齡老父下粧臺而執戟竟傳嬌女名蘭是蓋質木英雄天生孝愛歎龍鐘兮庭闈惜髮齡兮弟妹忍包羞於沙漠情也何安惟替父於疆場理差無礙換紅羅而鐵甲何妨女飾男裝易黃耆而金閨幾著李儋桃代去矣乎粉腿花顏珠拋淚雨暮黑水而日黃河親戎旂而執桴鼓刀霜耀日頻翻雲母之車弓月橫秋朔簇僕姑之弩無那將軍百熱戰血盈腔居然壯士十年冰心破虜塞旗斬將豈因望石而懷夫葱嶺燕關亦常陟山而望父以知領應似燕馬果如龍蓮步涉灘流之水金鞍歷首宿之峯言旋歸千里馳驅堪借御論功績尙書郎焉用榮封當年免混雌雄勇斯爲孝此後粉銷金甲戰則請從人歸暮雨日返斜曛願開弟笑倒家翁姊妹迎來刀環尙撫猪羊享就玉乳猶醺未改朱顏賽雪依然鳳髻籠雲不識兒童只信士皆可將俄驚火伴那知女亦能軍士有技擅文壇胸羅武庫軍國事悉尊綬倫紀中自深縉幕軍門日耀依然裘帶風流而夏風清何待閑閑調護直欲帶金奉而泥可封關豈徒吮墨濡毫人堪作賦也哉

豐順縣志

卷一十四

藝文二

四

汕頭韓字局南縣分局承印

韓碑賦

以平知世有段文長爲韻

王顯朝

韓吏部萬古才名三唐黼黻從軍而志切匡勳奉詔而忠宣綸綍論功勳則筆無偏阿銘金石而辭尤奇崛當日文成破體歎服應皆于今碑倒空山欽崇莫不昔元利之平淮西也度官都統帝賜大旗懸武則爪牙能赴儀曹則筆硯相隨佇看司馬行軍草欽知勇共義元臣縛賊迅掃羆熊五十年長戈利矛一朝帖服十四萬追亡逐北百世猶知其時海宇風清天門日麗入廟獻功登朝親帝隊則辨其先後功則分其次第非無凱歌露布遍示羣工尙次石刻金銘流傳萬世而公也乍聽天言舞蹈稽首繼退清肅辟除箕帚淋漓大筆光騰萬丈之芒點竄經文製創一人之手擬諸湯盤孔鼎絕世應無飾以鰲負螭螭後復誰有孰知句奇語重俗眼難明銷骨鑠金讒言頓亂因李愬之誇功命文昌而改換非寶劍之沉淵等良材之入鑿遂使字青石赤難覩陸離頓教繩曳砂磨不成片段然而字雖滅於刪削文實燦乎星雲非僅碑誌蟲魚言皆瑄屑非若碑書鸚鵡體裂紛紜非同碑寫曹娥字猶待解非等碑傳神禹畫竟難分萬本爭書炳炳乎一朝鉅典千言可誦煌煌乎百代高文迄今韓江係姓韓木揚芳韓山拱秀韓水流長謁韓祠而會友拜韓廟而薰香孰不誦韓文而知功勳之炳煥想韓碑而懷氣象之光昌

答黃公度書

丁惠康

閉門讀書忽荷賜書首致殷勤中述世變循誦未竟不知涕之何從也楊子雲云世治則庸夫高枕而有餘世亂則聖哲馳驚而不足今之世果何世乎而所謂聖哲者吾未見其能馳驚也斯何說歟康頻歲以

來奔走江南北卽所識洞微之士相與論及左右大都有神龍見首之歎然康以暇日徵諸先生所習游者則亦以大臣閹門當爲憂懼之色至其憂愁抑鬱一發于詩以咀彙之離騷效英雄之種菜康固有以知公之未能忘情於斯世也此其志亦大可哀矣但近事以來黨禁稍解康竊欲竭其耄耄之愚惟公所以自處者擇大吏之資依之幕府凡天下措注皆吾之所設施策之上也否則移寓上海斟酌人才內而聯絡大江三湘之志士外而號召南洋各埠之巨商厚集一中央最有勢力之樞紐策之中也大丈夫志士當堂堂正正永垂不朽之業失此小圖後將何及畏首畏尾身其誰幾哉康志大才疎白不一當自分無用而乃來教辱之以世好許之以同聲將所謂不羈之士與牛驥同皂良醫多門以繩若引年者耶然人之相知貴相知心康轉徙頻年匪懷利祿特以民族凋殘世變搶攘不自揣量思效綿薄以爲海上縮八達四衝之穀實人材所盛衰消長之機飄泊自甘迂疎寡效遂至於此既而長沙張公辱一日之知過采虛聲賞其文采謬舉以充大學教習之選康報之曰人各有能有不能至教習者屹屹窮年徐徐云爾漢青無日頭白可期無能爲役也若乃風舉鸞發任重道遠一日千里凌厲無前雖以不才猶能自勉張公未及報而家中克問至矣既衡恤屏居塊然獨處而西林尙魯復連發兩電逼促人川不知其託任云何實以不能而止此中心踴焉能不爲長者一吐之乎比得朋友書皆勸而良願變敢不勉自抑制以任艱難姑於暇日稍窺報紙見徵君辟士累版連篇大半爲清議所不容夫曰經濟特科而以勸充選是猶棄周鼎而寶康瓠若砥砭之與美玉哀哉豈謂秦之無人乎凡所陳說都不能罄心中仍有千言萬語必須傾注於左右者兼以久別爲憾私冀台從得少留須臾之間康於臘月中更可出汕暢談也

豐順縣志

卷二十四

藝文二

五

汕頭總字局梅縣分局承印

再復黃公度書

丁惠康

康竊不自揆妄有陳說狂言謬論不知云何已發而悔辱公書不以爲怪而一若以爲可教也者此固與人爲善之心亦見虛懷若谷之意詩云采芣采芣無以下體貞執事之謂矣承示謂上體爲數年前夙心然康期謂尤宜于今若戊戌以前康亦以自取封疆之說進今公亦自知聲名有異於前矣故必陽避其名而陰圖其實康嘗綜觀中外士大夫甲午以前與甲午以後爲兩人與庚子以後又爲兩人近自極尋常之督撫皆知西政之當仿效練洋操聘東人遣學生接踵而起而獨不敢露章一言公於上者恐爲世所不悅于己利祿有妨故也若明與之言吾之奇才異能可以佐君爲理然決不望君之保奏彼內之可以據高官外之可以得美譽人情何樂而不爲如其吾道果窮所如不合則天壤之大未見鴛鴦之無所以飛翔江湖之深不聞鯨鯨之無所以游泳大丈夫者所貴其可動可靜能屈能伸凡事當操之於已而不必受制于人此則移寓上海之說也來書所慮固在意中然康所謂移寓者盡室而行極負而至還海濱而處耳立足已定一意與官場決絕昂藏事業由吾做出公仍得以此表見於當世者時日無幾焉能首鼠兩端供後生幾次之描畫耶公此時有所不給似無從并教人之理但姑懸此說遲之歲月可耳承詢鄙人將來舉動若何非公相愛之深決不及此康竊有數說於此公不欲聞僕固將自言之况公已極意關垂復何能自安緘默謹臚陳其說乞公鑒之康四方奔走自付精力果力都不讓人至于函牘往還

指切事情搖筆如非斯須脫稿不假思索略無凝滯少讀董生天人三策對東坡神宗萬言書尤所酷好至於流涕故自爲文亦頗相類獨惜仁而不吝辯論之才尤乏肆應極意欲從更生一游窺其辭氣奮發辯才無礙之指飲冰聞有此意亦遂逼促東渡謂必於僕有益往復相問外間藉藉頗有知者流言至於京師某君切言其不可康粗報之曰夫朝廷之士往而不復返山林之流入而不能出明殊趣也今則滄海橫流淪胥以溺亡種之慘無間賢愚焚如之悲奚論貴賤避世避地已無可逃僞馬爲牛又安能免雖欲如管幻安之居北海王薏齋之伏船山顧可得耶若遨遊京師求賢取友則中朝士氣亦煥可知素衣染緇徒自穢耳至於上海則人多言維議論紛囂無所統一其成敗亦畧可觀矣揆君之意所不忍言者恐其犯不韙之名以召禍耳不知近封疆大吏紛遣學生東游負笈不聞以此結吏議也卽文人學士采其上風勸爲紀載亦未見以此列彈章也如康徵末曾何足云康行年三十五矣日暮途遠又問何世自以名公之後不能與草木同腐其志節卓然又不肯隨俗俯仰博鄉里善人之稱君顧以此厚望於僕毋乃與僕私心相刺謬乎辱承知心聊備述之企一定證焉

覆鄧悅民邑侯書

陳期昌占頭人

竊奉憲諭飭勘豐埔交界荷竹基下童子拜上擇兩縣適中要地建築卡房並召工匠估價以憑興建等因遵于二月二十日遣赴潭江邀同當地商民吳壽山暨工匠地保協貴差前往該處河干上下踏勘當擇定韓江西岸童子拜上土名菴子前跌牛石磯頭地勢寬平扼要與東岸筆石相對上距黃竹基約里

豐順縣志

卷二十四

藝文二

六

汕頭鎮字局梅縣分局承印

許並無人家風水干碍踞高瞰下一望瞭然江漲不浸兼磯下避風尤便泊船卽飭工匠丈量於建卡房兩間外尙有餘地卡房每間內空計闊一丈深一丈二尺橫過包牆二丈二尺七寸前後檐包牆一丈六尺八寸屋頂兩莪各出一尺八寸需用桁樑共二十九枝枋八十四塊前後跳樑六枝門三副瓦七千塊石灰一千斤牆基用灰築其上層用坭因土牆受風易壞外俱用灰方能耐久約須二百工每工包價銀六錢八分另列清單呈核惟因某距該地三四十里誠恐照料不及查商民吳壽山素屬勤慎稟將建築一應事宜付伊經理應請將軍開價銀給領俾資購建現值農忙工料待集俟春種後天氣晴朗約經半月便可造竣此係本道鎮府勸辦要公關係兩縣公女應請函商大埔縣主會銜出示曉諭當地居民勿生疑阻俾免周章抑有請者凡事欲圖終必先慎始撥兵駐卡房本爲綏靖地方要政顧籌端於十餘里空虛之地聚兵五十名之多游手安閒若不嚴加約束恐生事端况樵蘇婦女往來不少似爲預爲顧慮否恐將以衛商適以擾民天下事興一利必有一弊隨之防範未容不周竊謂駐兵不在多止撥二十名以半數住巡船半數住卡房已足張聲勢而保交通尤必有弁日常川鈴轄方免散無所紀而策治安此雖杞人之憂要不妨預爲籌及也

題鄭伯霖遺照

鄭家蘭

維公之學名重於庠維公之望譽隆於鄉維公之德子孫蕃昌維公之澤俎豆馨香維公之貌公之神亦藉妙繪以垂於久長後之人見而思望而拜誰不肅敬而徬徨

告韓江治河處書

王 峰

韓江上游合汀贛嘉三河遠水迢迢如長鯨之吸其勢自高瀉下飛流電激澎湃於鯉渚瀦積於象潭近
燕峯青遠涵空碧雖王宰之妙筆疑莫能描海陽城北平堤六百九十四丈宛若齊虹潮之水患蓋惟此
堤崩決爲巨夫人皆知之矣而卒無有善其後者良可歎也溯自有明宏治八年乙卯大水城北堤決城
崩二百餘丈至清康熙二十九年庚辰冬十一月馬王廟鐘自鳴越三日復鳴明年東北堤皆潰蓋辛巳
夏六月也時巨浸十八日云五十七年戊戌夏八月朔水漲北門東南廂江東諸堤皆潰秋八月颶風大
作城北新築之堤復決方其決也奔流至澄屬之沙汕以口狹不能若尾閭之快洩洄瀾鴻落二日始逆
浙而上至揭陽駛過黃岐山城邑沮沒於洪濤中混茫浩渺若洞庭然其遠山之峭峙者隱隱若君山之
浮於黃玻璃面橫流疾趨普甯凡經水患處求其得免飽蛟魚腹而葬鯨沙者杳無人焉今潮汕鐵道所
經見于郊野間沙壅若培塿者卽昔陽侯波臣肆虐橫行之遺跡也此蓋耳諸父老相傳較郡志而詳者
也至今猶令人不寒而慄憶光緒丁亥秋倅自閩歸由汕全潮及民國羈旅鵬湖書院兩度降水警予北
堤動搖恐淪澤國人多登山而得無恙者幸也今汕頭海口較昔狹隘不啻什佰而東門以下河身之高
於城中街道或逾尺尋或逾尋丈不等萬一不幸重罹浩劫則四邑之人徒嘆微禹其爲害可勝言哉懲
前毖後有心人寧不爲之顧慮哉貴處治河頻年不輟上殊巨矣力亦痛矣願卜游未治而上游沙又流
至蓋籌一勞永逸之策以抗河伯而除民生之巨害耶其策維何亦唯於金山山根起連土展築接至竹
篙山山根止橫廣比長半之高與原堤平或增二三尺大患已除而堤面平坦亦可以爲市場期約逾時
可告成功野老思之審矣特率筆爲陳苟是究是圖則四邑民生感歌再造而食報享名亦與韓水同爲
無窮韓公驅鯨除害功不懸絕矣願置郡迄今已歷四朝而守土者皆見不及此抑規數有定而奇功
待人立歟噫民溺猶已吾于執事有厚望焉

自助兩等小學堂出洋募捐册序

吳伯齡式書

李君介丞吾豐傑士也其志趣高尚其懷抱偉大其學識尤精微深湛故其受外界激刺也亦最先而最
甚平居嘗持改良社會主義故與邦人士接以至誠相激射以合羣愛國之義相勸勉歲甲辰自兩廣學
務練習所畢業歸與同事創辦縣學務公所君既少得憑藉遂持大刀闊斧出其鑿山通道之手段使僻
遠瘠苦之豐順不數月而有師範館之出現而有高等官小學堂之成立復于東北兩區之交創辦兩等
小學堂籌款購地建築開學皆自力担任囑余題額曰自助兩等公學自助云者因欲剷除社會依賴之
劣根性而造成一部獨立自營之大國民也越年君任師範館事竣且辭去學務公所事歸而自任校務
以土木未竟經費無着之學堂欲以空拳赤手而維持之其困難詎堪言狀於是君力瘁矣吾嶺東迷信
神權酬神演戲往往擲巨貲不惜至與言興學育才之事則掉頭反走此由於小民圖目前而不知遠大
吾嶺東人之不幸非吾豐一邑然也全利用小民迷信釀多數人之金鐵飽其私囊不惟不公益之是圖
反以破壞公益者其罪可勝誅哉新渡口者吾邑北勝一方輪出品之總匯也好商民盡利用小民迷信

於是演出品有酬神演戲之捐雖小民歲出五百餘金其實每年演戲之需不及其半餘悉中飽最可恨者值演戲之時開場聚賭百弊叢生鬥毆已有所聞盜竊因而益熾是其中飽金錢之罪小其妨害社會治安之罪實大也夫以小民終年勞勩之膏血而以購此莫大之患害苟儘數提充學堂經費則以除弊爲興利事莫有便於此者君因具稟提學司請其札縣勸撥三分之二用作伙助蓋知積習之久未能一朝變革故以和平將之恐過驟不免惹起反感也而孰意君之所謂弊乃若輩之所謂利若輩知有利惟恐損其利君欲待之以和平若輩且大起反對造謠煽惑挑別稟中叙事一二語以爲他日將盡一社之森林種植而皆抽之之證愚氓無識眩於昏說風潮遽漲甚至遍張揭帖欲以五百金購君之頭顱余聞而笑之曰如此好頭顱乃僅五百金其價值毋乃大廉耶君則曰吾之頭顱價值非若輩之所知吾惟期終有以達吾之的已耳因函告反對者曰諸君而念及吾之頭顱乎欲取則竟取之願吾有一言竊願諸君垂聽者今日國勢岌岌非興學育才而謀所以振興之策吾與諸君不死於國內之亂必死於外國之陵均一死也吾輩既以身許國豈猶他他視視而畏死者即以辦學死諸君之手則吾輩有人前仆後繼以今日之感情而激其一往無前之氣而學堂且因是而發達則又受諸君之賜多矣嗟呼熱誠之言一字一淚一字一血腦筋苟未受病安有不聞之而而淚交迸者耶無如冥頑不靈一意破壞愚民益受其惑而君益窘余是以嘆吾國民程度之低而知今日辦學之難也若輩且得意揚言曰自助學堂曰今其消滅矣君曰否否款項既絀則校舍雖不能不漸停其建築而學務安不能不謀其廣續也於是增聘

豐順縣志

卷二十四

藝文二

八

仙頭鎮字局梅縣分局承印

教員添招學生補置教育品以至堂中應用一切米鹽凌雜仍汲汲不遑其意一若終無籌法即犧牲私產在所不計此非激於若輩之冒意也蓋其高尚之志趣偉大之懷抱固有若是之百折不撓始終畢貫者也正月十一日君因組織教育會來縣與余抵足暢談達兩晝夜及於此事余乃愀然告之曰君之志則誠堅君之事恐難繼爲問君今年有私產可以犧牲明年將犧牲誰之私產也明年有私產可以犧牲又明年又將犧牲誰之私產也夫所貴乎自助者謂不自助則他力將無所施耳非謂既自助則不必借夫他力也往者大埔張君六士嘉應江君柏堅往南洋各埠勸募學費嘗得巨款而歸而嘉應邱慶廷捐五千元福建胡子春捐三千元蓋南洋風氣大開咸知救國莫先於興學興學必資於巨款君苟踵張江諸君而往吾知華僑同胞輕財好義不分畛域如胡連司者蓋不乏人一旦感君之熱誠偉論安在不慨然樂助也君曰然吾之欲爲是行也決矣今且不得不行吾將備捐冊君其爲我序之余曰諸余雖不文余能紀實焉爰述君之行誼及其所以遠行求助之由弁諸冊首以諭我海外同胞之樂助自助者

光緒

三十三年

爲劉兼專員擬五區建設計劃書緒言

李唐

竊維戰時吏治以補助軍事爲急務整頓吏治以貫徹軍民合作爲標準民爲邦本設官所以治民軍戰所以保邦其道一也若但徵用民力而不求補給民力非所以爲治也祇求軍自爲戰而不謀因地利策民力爲軍戰之助坐使民力地利不克盡其用非善而用戰者也故必治民之吏能使民與軍戰合力並

擇其地之利民之強者從而策動之使能相需爲用而後保土制敵收復失地乃有切實把握今五區九縣濱海之地淪陷殆盡敵久踞之而封鎖我海外交通方且耽耽逐逐日謀進優勢不能不就我掌握區與淪陷區之間對敵劃一反封鎖線以控制之必使掌握區線內之經濟資源糧食物力自由流通線外淪陷區之民衆日用所必需之柴炭與我掌握區民衆所必需之油鹽特別開放互換俾兩得其益惟要以貨易貨庶國幣不致外流並指定韓江揭陽兩處爲互易地設立關卡以統制之杜絕仇貨之輸入私販之偷運此則內以疏通掌握區民衆之生計外面勾緝我淪陷區民衆使傾心內向之一道也夫淪陷區之地猶吾地也淪陷區之民猶吾民也既淪陷之地與民固我所必爭在掌握區之民與地尤勢所必固必借地以衛民借民力以使之自衛並使自衛之民力大險之地利與軍事發生密切合作庶幾以守則固以戰則克賈生曰治天下者至纖至悉也胡林翼言纖悉不遺便是經天緯地之奇才程子謂司馬光爲腳踏實地步人深思其故道在本抗戰建國之旨樹建縣抗敵之基亦至明矣本署駐在豐順地當抗敵之最前線爲鞏固掌握區計爲恢復淪陷區計應以天險四塞之豐順爲中樞以饒平之上饒爲左翼以揭陽之河婆爲右翼河婆北接五華安流上饒北連大埔之漳溪九子峯二地皆險峻叢莽與豐順之崇山疊嶂東西連亘所有各該地區又皆民俗強悍樂於戰鬥夙有秦人驅鐵之風而民間之私槍俱多若加以組織而策動之必於大軍抗敵恢潮之計大有裨益在豐言豐擬先就豐順中樞遵照抗建方畧擬具建縣抗敵計劃在豐行試辦薪收軍民合作之實效畧分八綱二十九日定爲逐步中心工作分

豐順縣志

卷二十四

藝文一

九

汕頭縣字局梅縣分局承印

別緩急先後督勸豐順吏民設立建設促進委員會從事實施俟辦有頭緒再推行各縣並於河婆上饒兩縣分設特務機關以資推動或先將保安部隊分撥兩地派參謀副官先事聯絡各該地民衆預爲之備茲列舉綱目分條說明之

爲李氏抱一堂致李崧甫省長詞

李唐

仕宦以至疆吏富貴而歸故鄉固昔賢所稱爲寵交遊光宗族者茲我崧甫宗長中邦碩德名世耆英開府安徽作九州之牧伯分符淮泗總一道之官司布農桑孝弟之條革胥吏之弊存懷忘佩聞羊不欺輿誦久騰於皖江政聲曾流聞韓水昔由巡道陞長外藩邇以勳名超遷國府張蒼主計天下無出納之私牛宏秘書開皇有明備之典斯誠國家之樞棟宗族之鳳麟也矧郎君官貴握符印者六人村冕家傳守州郡者累葉椒蕃曲沃實出桐封李邕中州原同本本今者追懷遠祖言邁舊基慶遠之衣錦還鄉子重之旌麾在道宗人等溯本根之與共感枝葉之相維望青蓋而思傾幸白駒之能繫元暉適野同姓皆遠近來迎疏廣高年合族更親疏會食際茲黃花滿徑晚節流香白雲在天歸船無恙誦行葦之什能勿嘖筵唱大風之歌何妨擊筑爰申歡頌聊表親情

自序

吳桂芳

昔汪容甫自序生平比况孝標而劉孝標感懷身世又以敬通自擬慨望千秋能勿灑淚蕭條累代恨不同時此蓋文人學士之恆情而其藻采之工芳聞之遠輒令人低徊勿已潘岳有言揚清風於上烈垂令

聞而不已想佩聲之遺響若鏗鏘之在耳僕維小省瞻懷既往臨川悲嘆爰捫拾生平事實以作序言藉謠來者非敢云比擬容甫孝標也僕世居莘坡系出延陵董帷苦讀馬帳云設年甫及冠卽設館於環清鄉抗顏論道鐫史銘經未忘功名涉獵時藝取青紫如拾芥裁狂簡而述作新知彌永舊雨難忘道重西賓誼深東道春秋代謝寒暑六更此一時也迨夫科舉廢棄學制頒行百年人計教育爲先文教所關潮流是適爰離梓里負笈穗垣肄業於兩廣師範平時對於心理教育之科倫理修身之說聲光電化之學飛潛動植之篇莫不加以講論條貫博聞而強記之卒後創辦豐順官立小學及執教揭陽官立師範不嫌薪俸薄不辭跋涉之勞祇知以開通風氣培育人才是務如是者約七八年菜根可咬陋巷仍居此一時也辛亥光復百度維新潮流鼓盪人知尚武其時邑之陳君勵吾出任粵軍團長挽縮軍需乃應命視事飛籌挽粟效其微勞士飽馬騰增其鼓舞竹頭木屑廢物是珍白石清泉廉隅是祇營務之暇研究戰畧油然而興作育將才之思因商之陳君保送邑中俊士入雷埔陸軍小學肄業伏櫪而識騏驥開路每伏驂驅志在千里心雄萬丈此一時也癸丑革命民黨星散龍氏入粵肆其兇鋒因襁褓而去買舟云旋重以書生結習難忘教育生涯可樂復於汕頭創辦法政講習所及迴瀾中學迄今畢業生徒置身通顯者非鮮矣民七之歲僕感於本邑中學獨付闕如乃命駕言歸創辦縣立中學檣樓華露以啓山林經之營之敢云勞瘁目受任以來瞬二十一載及年逾花甲有三始獲告休刊礎成器寶宗國之璠璣桃李揚芬被春風於芳甸河汾講學致功烈者有人洙泗傳經衍大義者幾輩遠瞻前哲佇俟將來此又一時

豐順縣志

卷二十四

藝文二

十

汕頭錄字局梅縣分局承印

豐聲雜誌序

吳梓子

周禮小史掌邦國之誌誌者記也國有史省縣有志族有譜皆源流本本有綱領條目以載團體之事實其體例謹嚴與雜誌之隨意撰錄者不同然類以相從事必徵實足資人事之考鏡益羣治之進化一也余於民國七年秋承邑人俞與丁君雲波回縣創辦中學課暇之餘時勗諸生以中學學生爲社會中堅人物應負達己達人之責而諸生亦怵然於邑屬風氣之閉塞謀所以祛其蔽牖其明宜先從事於社會教育比年如組織演講團設半夜義學通俗週刊圖書報社等事均不辭勞苦次第舉行春間復搜集近來所作筆記分門別類名曰豐聲雜誌以爲豐邑有聲之始洵余付災梨並徵言以弁其端余維凡一團體之組合其間皆有緣起與經過及一切事理之商榷環境之對象斯篇雖人各一篇記載似無系統然所載多已經之事實與將來之希望則載塞不通之山谷經此聲之震撼而激達則謂爲豐邑中校有價值之小史可也若曰吾黨多才欲以文學炫耀於世是則安敢謹序

希聖樓記

吳逸志

湘北大捷之明年倭寇畏威蜷服四境寧謐本戰區雄師百萬雲屯湘鄂贛三省號令明肅旌旗蔽日最

高統帥蔣公精選將校以時講武乃於嶽麓書院遺址設團訓練自領團長司令長官薛公伯陵副之余時方以戰區戎幕兼總教育奉命祇懼夙夜籌策始底于成曩昔院宇之頽廢者皆葺而新之荒榛蔓草之礙人行者皆鋤而去之建大禮堂於廣場之中巍然與羣峯爭勝焉計前後所費近二十萬金更以餘材構小樓於孔廟之右取周子語顏曰希聖樓前樓欄蔭蔽槐柳扶疎翠色逼人將以餘暇讀書論兵其中以遠慕古昔名將之遺風近接先聖羣經之統緒與二三十從容講學實如朱張當年故事不亦足以怡性情而長德業也哉若夫春日載陽山色明麗池潮接席浮沙映碧摩挲禹碑則思食肉而勉紹禹蹟其或秋林落葉丹楓舒紅龍吟萬壑馬肥塞草撫劍長鳴則思策杖長征飲血長城茲亦先聖昔賢式遏寇虐之遺志也昔范文正喜談兵好誦韋蘇州兵衛森畫戟燕寢凝清香之句而記岳陽樓則惓惓於先憂後樂之感是蓋胸懷寧靜一心君國故忙中能閒憂樂應節燕寢凝香畫戟森嚴不啻爲茲樓而詠而先憂後樂東坡以爲聖人復起不易斯言亦猶希聖所取義乎於戲一樓之居未廣也而屹然特立之觀縱橫上下之度古今聖賢之情滙焉後之覽者其乃有會于中悠然而起仰止景行之意歟

湯田吳氏誦序

吳逸志

我中華民族繁衍滋大垂五千年光榮之歷史雄峙東亞擁一千一百餘萬平方公里之土地悠久發皇世罕倫比夷考其故蓋由於敦鄉里尚宗法基層既固團結以堅西人以個人爲本位以家庭爲基幹身家之上即爲國家鮮敬宗收族之義即家庭之中利害較然親親之恩瀉焉莫講賈誼所謂借父纒鋤應

豐順縣志

卷二十四

藝文二

十一

汕頭銘字局梅縣分局承印

有德色母取箕帚立而誦語其習近之夫以我民族德性之尊而又申之以宗法先賢之葆固血胤恢宏子姓之旨湛然深著昔周公弔二叔之不咸故封建宗親以屏藩周召穆公思周德之不類故糾合宗親以成周而作詩曰棠棣之華鄂不韡韡凡今之人莫如兄弟友于之義情見乎辭宗法之密亦至周而極盛詩曰大邦維藩宗子維城無俾城壞無獨斯畏要其旨歸則維藩維城之說皆所以圖民族捍衛國家今天下爲公封建雖廢然異族侵陵國家危急民族主義之發皇實有賴于宗法之維繫故國父孫公欲因家族以成國族基層固植百足不僇其鞏固族類之旨蓋與周召之屏藩宗親相同先聖後聖其揆一也吾吳氏之宅處豐順蓋四百年于茲華蓋盤纏以啓山林而有尺寸之地吾先祖之創業維艱也豐順於粵爲巖邑奇峯聳秀碧水澄清山川形勝人秉靈氣而生故多慷慨恢奇之士如大力將軍六奇公之英武天縱即其著者吾嘗周遊世界歷四十餘國求曩日所謂虬髯公者渺不可得歸而讀史志亦鮮大力將軍之偉信乎嶺表雄風直薄海嶠而吾豐順適閩粵之衝山川磅礴而鬱積其鍾靈毓秀誕降英傑蓋爲理所必然曾文正論人才之優劣以鄉氣多者爲勝豐順之士類多質直好義有古秦晉之風其所樹立往往出乎庸俗之表吳氏自泰伯虞仲二公以後世以禮讓爲高季札公振其餘風以播於揚越之間豐順之裔承其徽烈亦嘗以文章風義輔導於世武功彪炳者尤不可一二數足徵山川人文之關乎造化而宗功祖德之培育庇廕所繫尤鉅緬懷前烈雖不奮發興起以思如何秉承列祖列宗之彝訓而發揚光大之如何砥礪我民族固有之德性以獻身於國家如何方可保我生生不息之子孫以蕃

衍國家民族之生命其所以奉慰先靈者蓋莫大乎是矣慨我鼎革以還喪亂頻仍湯田廬墓類危者再賴我祖宗呵護之靈諸父老兄弟捍衛之力幸保無恙不圖倭寇侵擾中原板蕩敵機肆虐慘絕人寰我族祠宇被燬者有之丁口罹難者有之數百年來生食歌哭之地竟遭豺虎蹂躪之毒言念及此令人髮指逸志長湘鄂贛戰區戎幕驅百萬之師抗敵大江南北四載于茲其中總安之役上高之役兩度長沙起暴日既陷英屬香港美屬菲律賓復乘勢二犯長沙志在必得乃為我衆殲數萬大捷空前不但抗戰勝利已操左券抑使世界反軸心同盟為之鞏固人類正義為之伸張即克威揚以保先人丘壟免子孫奴倖或亦有當尊親弗辱之義歟惟因軍書旁午不獲遍歸故鄉與族中父老把酒叙齒明辨昭穆申述葆固族類之義兼宏敬宗收族之規如范文正當年故事而譜牒之作關係數百年來繼承宗法尊尊親親禮所敦尚亦未克有所盡力不無疚允當益勵前操期宣徽猷而與諸父老兄弟共踐繼志述事之旨茲當族譜將成謹攝其要旨弁於端而在事諸公之精神將事義例謹嚴尤能折衷歐蘇二家之長雖岷山歸氏想亦未能逾此茲又重可感也持此以垂經訓修傳示來禰則吾豐順吳氏之烈光其在足以啓佑後人大之為國族組成之基礎小亦足促以進民族之團結於國家民族所繫匪輕孰謂宗法制度至今日而可廢乎世有知言者當不河漢斯言三十一月

家老伯母彭太夫人八秩開一頌

張心源

豐順縣志

卷二十四

藝文二

十二

汕頭縣字局梅縣分局承印

北堂護草厥長靈芝賢哉慈母溫惠為師和九畫扶哲嗣攸資長豐之日封鮮不私古稀晉一舞綵嬉嬉壽添海屋禱祝期頤桂蘭馥郁嘉客盈門誕膺大慶於臯樂胥

范蔚宗與甥姪書書後

徐名鴻

范蔚宗造後漢書未卒而身亡故自敘之文未著今載書端而名自敘者乃蔚宗獄中與甥姪書其例非遷固之舊矣蔚宗展美才而造復漢自謂可勝班固其志然矣力則未也孟堅閱博蔚宗精深二氏之才實難軒輊然班氏諸志包載孔多後人著作莫能與比范之論贊則小品耳雖有奇才傑思亦無足稱范不及班正由於此乃蔚宗抱此區區自高而不讓相輕之習未除已見之明未富也雖然君子長報仕安發憤利餘而蔚宗致甥姪吐氣獄中稱志求知二人所同任安固是知已甥姪亦非俗人盡心而道不患其過雖有求當不足怪也吾於茲書得言之焉以意為主以文傳意蓋秉筆之極則也六朝之士乃嘗失之蔚宗得之且為言之斯蔚宗所以自高也已

讀柳宗元與韓愈論史官書書後

徐名鴻

嘗讀昌黎評臣佛骨諸篇喜其理直而辭壯及見答劉秀才論史官書則竊怪之以為崖岸若昌黎而竟出此其言之非由中耶抑別有所為耶相知如柳州乃亦為辭以駁之甚矣守窮之難也昌黎雖齟齬一生進退莫得一當然直道而行豈依阿竊名者比若誠苟安而忘道者憲宗實錄何以成哉昌黎作史官為時甚暫答劉秀才書守約之言耳所謂人禍大刑者憂譴畏讒之詞不得不然非果有所憾也自古掌

國史者類尸位素餐昌黎爲史時淺力微非可厚責而柳州望之也深故責之也厚豈徒以文辭相高而已哉唯柳州而後可責昌黎唯昌黎而後可受柳州之責吾以柳州書比之評臣論焉

民教館題壁

吳思存

本館創建之始擇址於城內何家祠瓦屋數椽因陋就簡賴邑人士逸志楚材伯偉諸君捐贈圖籍規模畧具迨邑侯劉君來長是邦政通人和百廢具舉以化民成俗莫急於社會教育因就安墩書院舊址鳩工庀材興築新館經營數月於焉告成凡禮堂宿舍閱讀藏書展覽之室咸備環境清寂花木掩映邦人士顧而樂之升其堂觀革命事蹟則抒懷舊之蓄念焉入其室觀圖書滿架則興興修之德焉若夫環顧衆山聳翠雙溪滙合州原錦繡大氣磅礴輒寄其無窮之遐思竊願我豐邑人文之蔚起斯民之康樂焉使吾豐人果由是而薰陶漸染發揚蹈厲配合抗建大業共臻大同邇治豈不美哉思存備員是間瞬閱六載既乏建樹常凜素餐用誌其梗概於此以俟世之君子第一任館長吳振聲第二任館長張大紀第三任館長莘城吳思存並記

組設豐順縣教育會啟

譚愚生

桃紅柳綠風景不殊疏雨冷烟寂寥常感相彼烏矣猶求嚶聲樂噪風土不忘其本願採衆長則美抒已見則細非集思無以廣益非合羣難求進化同人等爲維護文化推動教育爰有組設縣教育會之建議也吾豐野分牛女地號鵬湖巍峨銅鼓激灑溫泉靈秀萃代有聞人博雅幹才燁燁足頌粵自民國城鄉

豐順縣志

卷二十四

藝文二

十三

汕頭韓字局梅縣分局承印

學校已啓其端迄至今茲專門人才數亦不少充車聯駟幾不足以載廣廈接榱或不足以容然因無鎔裁遠於實用未普勸課殊其科撰以故不能文質相扶朱藍共妍或則尊隱而沒其聲華或則涉抑而逸在布衣考成已往策勵將來非有縮攝何能導清源於前振芳塵於後况寇氛尙熾僭偽未消殺敵圖存匹夫有責蓋時至抗戰建國不獨士林富同仇敵愾凡屬華胄應共謀興復吾人已聞鋒鏑幸未流離救國救鄉責無旁貸務祈磨厲以須其矢厥志化衰茶不振之風標循名責實之誼始終條理各相慕習明恥教戰蔚爲風氣庶幾挽頽波於已逝作砥柱於中流詩曰風雨如晦雞鳴不已聞我夏聲復興民族豐順縣教育會之設此物此志也謹疏緣起尙乞贊成此啓

譚氏族譜跋

譚愚生

譚氏舊譜余未之見得見者爲舉人譚益盛手編稿本益盛在清代雍乾間人稱譚夫子任浙江於潛縣歷十餘年而致仕者也其所爲譜序言之後詳列體例引經據傳考訂不厭煩絮撰著之勞於斯可見惜未付之剞劂耳又其所爲譜擇譚氏優秀者系以小傳傳末署益盛誌其無署名者蓋出族人所續僅及世系以瑩耳按我譚氏明洪武初年入縣境初居大槌社繁其歧分異其居住遷大田者蕃衍較速傳至我堯公爲十二世祖公頂平若鳩膚白似雪十指纖纖甲黑如漆蓋異相也（據益盛原譜）我譚氏家業實至公而始宏大公以郡庠生馳贈文林郎生平課兒庭訓詩禮外不及一奇行曲說（益盛原譜載）其子若孫承先緒挹清芬讀書不敢懈怠於是父子文魁公孫文魁一門輝映而父子及孫相承食餽

及代以諸生蜚聲譽舍者又其裔孫也顧此皆屬前代光華已等夢裏明月矣惟其間閱時七世人數不及現在之多而住大田鄉僻文化陶冶機緣較少然而凡我堯公子孫皆以不讀書爲可恥可見沈浸漸漬教育淵源一本諸父兄也我譚氏服官者以禹公子孫譚變爲最先至我堯公子孫從政頗足述者有如斯穎公年近古稀歷瀾山涉沙漠至甘肅爲撫番廳甘肅高寒重裘猶冷公忘其年高而不以爲遠有如紫蟾公爲鄱陽令後超遷守四川甯遠州過二峽上夔州溯江而上而不以爲險而其父嵩鵬公則於鄉試中式後年已強仕授福建和平歷任福安壽寧羅源清流歸化等縣久離鄉井飽閱世故而不以爲苦可見我譚氏先輩當時能服役任事者又皆從讀書磨練而出也余觀家鄉山水今猶是泓深聳翠也特魚龍寂寞幾使猿鶴笑人不禁有所思也因作譚氏族譜跋借以激勵我譚氏族人愚生譚炳堃跋

張炳初先生八十

譚愚生

芳草不同氣而皆悅於人宮曲不同音而皆成其美至於廊廟山林各異其趣及顯其能皆足振頤風勵薄俗若

張先生炳初者身小服貂冕行不乘華軒直山林牧晦之士足稱頌焉 先生承通德系出清門惇敘任卹族鄰咸欽其才高（其弟爲筱淵張心源）友于情篤故不止孝於其親慈於其子也少年發篋雅肄宵三天性聰穎冠羣挺奇藝期絕妙殖學思究東觀之藏游欲有方育才求培梓桑之秀蓋寒畯坐擁歷六十年滄海桑田方域時變電光石火世事不常 先生則年年作嫁歷綬殷勤矻矻窮經味腴盡

豐順縣志

卷二十一 藝文二

十四

汕頭縣字局梅縣分局承印

藹歌出金石原憲非必憂貧居沒蓬蒿仲蔚偏耽隱遁况復胸無雜念等童子之下帷視有良苗異趙岐之寶餅醇醪酖酒次公能狂甘杞黃精東坡所嗜茲以比擬復相近也是以寥落自甘歷星霜不渝節詔華易得欣桃李之敷榮豈非僑士子有裨教育者歟夫研探學藝者鄙夷瀾濁崇修道義者膺受多福昏默足以定神清靜足以守形方今世俗澆漓人競功利修養如 先生不同末俗先世典型賴以不墜善哉雅化庶幾益彰宜天假之年神貺之禎也一子四孫不離膝下庭階日永蘭桂斯馨其宗人禽飛爲不佞舊友以其八秩攬揆之辰馳書索叙時則黍谷春回東風解凍地獻英華人樂和暖肆筵已設衆賓醉止麥邱之祝足介繁祉也

來今兩軒雅集序

王詒生

流觴曲水逸事播於蘭亭置酒高堂古詩徵於樂府園名桃李謫仙序春宴之篇池傍芙蓉公幹著夜遊之句况復負笈下里同舍六年嚶鳴聞求友之聲攻錯藉他山之助瑚璉之器琢磨賴以良工樛櫟之材斧斤施乎巨匠昔者康成東去承經學於扶風中立南歸受心傳於明道射劉昆之菟首共習禮容賦王式之驪歌轉增別緒華筵試啓聊開北海之樽勝地偕臨其載東園之酒維時曠曠烟景柳色青青潭拖風光花陰窈窕春禽弄韵挾好風而俱來朝雨如酥掃輕塵其若洗清談客坐暢正始之玄風侍立崇階聆石渠之緒論蘭陵祭酒德星聚於一隅樓下生生物望屬乎中外欣開錦宴上瑤璫之春盤醉倒金樽進葡萄之美酒和羹品味小試和梅隔坐聞歌恍同折柳峨冠芒屨東門祖餞之圖春水綠波南浦送行

之賦憶昔關山赴道京洛借游學歷三條科程四部北庠聽講經神私淑於鄭君東序論文師說服膺於
吏憲曉風殘月酣歌柳永之詞漢魏秦碑默識雋雄之字立宗樹義慕莊周齊物之文命意遺詞悟班固
幽通之旨學海無涯猶須孟管前修未遠敢事遲疑日夫田山歸去卜易道之東行靈恩遠來知禮宗之
南衍抗懷占哲甯讓當仁猶冀鹿洞鵝湖不忘講學鯉書雁帛時寄相思雖春秋代序漸凋鏡裏之顏而
惠敏交遊猶識夢中之路爪留泥雪鴻飛甯計乎東西冀奮天池鵬運各圖於南北謹序

嶺學祠記

王韶生

秦楚之際五嶺以南固猶是蠻烟瘴雨之鄉不特與中土比自魏晉以還北人之流寓南中者日夥披荆
斬棘鑿井耕田漸積且成樂土其後謫宦師儒南來者曉喻其父兄教誨我子弟口講指授品彙甄陶咸
有助於文化此易所謂離明之地也余嘗考之古史尙想見之焉張文襄公督粵之歲首建茲祠以奉祭
祝並配以此邦之耆獻與平名宦之有學行者位其先後以次序立廟得祀典之義余往過之未嘗不肅
然起敬吾聞嶺學源流以二陳爲大若白沙之心性澈悟蘭甫之文行密栗其影響於當世其鉅所嘆息
者則嗣響不作墜緒茫茫若涉巨川而水濟抑又何也富有明之世陽明學派開佈大下而有浙中王門
楚中王門江右王門之分說者謂其人赤手可搏龍蛇亦足見其意氣之盛乾嘉之際樸學之盛晚派矣
派相繼踵起標樹一幟齊足並馳惟二先生之學獨不獲好敏求古之士而稱說之此則嶺學之阨也人
室升當豈徒嘆大雅之不作也遂書而爲之記

豐順縣志

卷二十四

藝文二

十五

汕頭鎮字局梅縣分局承印

譚琅玉哀詞

王韶生

嗚呼琅玉而竟然耶天道無親常與善人夫何奪吾琅玉之速也吾自北來遊學京師務記覽爲詞章居
常益自刻苦時國內鼎沸歲無寧日數月音訊一至追念昔遊不勝有晦明隔歲之感迨去夏南歸聞琅
玉不幸短命死矣傷哉猶憶內寅春往訪余友愚生於大田讀易樓爲文酒之會琅玉其猶子也朝夕過
從執子姪禮意殊親暱叩其所學知方治文選杜詩賞奇析異摘艷摺華每云樂此不疲愚生精內典持
論妙義環生與余談論冲澹澹沱琅玉未嘗不屏息諦聽焉夏五月余還海北行道出鮑江更訪愚生於
碧石中學留連竟日碧石面海屹立泉石清奇詭狀殊形如蹲虎怒馬石罅生小松幹屈柯橫伸張似猿
臂山巔石屋渠渠遙望窗簾明淨則寄宿之精舍也斯時琅玉從其叔父讀書山中意態閒雅親余至責
者相餉坐間偶向余論及國難其見解不爲庸衆所囿警動沈著心甚異之願以其年稚不欲遽告之繁
曠之理以觸其憂傷庶抑漫應之而已夫琅玉秉承家學氣質純粹其用力於學甚勤論事特達信乎能
免斯世之累使天假以年得優遊學問則將來造詣甯有涯涘琅玉既逝愚生哭之慟至不能展視其
遺墨聞童子呼叔聲不覺潸然流涕合爲詞哀之庶塞愚生之悲而存琅玉於不死也其詞曰頭角關發
何嶄然兮鬼神幽遠嗇其年兮巖巖其業霜露泫之兮禮彼瑤魂山顛水湄兮含哀致敬以寫余悲兮

藝文三 文徵詩類

邑人李唐介丞甫編纂

和薛內登黃歧山原韻

明黃一道

步入層巒翠徑微爲梯苔倚轉紆遲懸崖風細雲猶甲古木春深葉作旗牛首誰憐他日淚鶯花莫負此時危興餘却苦三農早龍臥何緣吸墨池

感遇

羅萬傑 邑人進士

青青磧底松倒懸蒼崖壁歲寒含宿露獨立無人側上有烏鵲棲下有驚湍激念茲霜雪深况復寒暑積勁質久難靡孤根諒不易所嗟匠石稀一顧三歎息

答邑令敦勸出山二首

羅萬傑

竹馬迎來冬日溫條風遠拂曉山村首陽亦屬周疆土敦道食薇不是恩
一掃浮氛今已清幾家雞犬月中行道人已合孤峯頂臥聽康衢擊壤聲

贈黃藥山僧

羅萬傑

小縛團蕉竹澗邊此心何事不悠然貪他清味耐他苦黃藥山中住十年

奉使荆回宿萬安僧舍次壁間韻

羅萬傑

征衣猶帶洞庭沙閱盡殘冬未見家野寺寒燈獨臥處關心一夜到梅花

豐順縣志

卷二十五

藝文三

一

汕頭籌字局梅縣分局承印

山中答友人

羅萬傑

故園松菊近如何三徑依然擬再過芳草迷離啼鳥歇晚山潑灑夕陽多千秋姓並江東隱一線騷留崖北歌爲問滄浪垂釣者羊裘久矣換漁蓑

入山寄諸眷屬

羅萬傑

幾年塵土混衣冠大澤棲遲夢已閑破釜昔曾聞頂簪搏鐺今竊效陳搏孤踪冷比飛鴻爪去志迅如落澗湍從此黃岐峯頂月清宵應各照團圓

山居雜詩

羅萬傑

杖藜望入晚烟空碧嶺蒼苔指顧中短後應隨拾栗老長歌不數採芝翁
欲沾村釀餉山樵短樹槎枒漸柱瓢習慣念成枯寂僻經旬不赴野人招

葛布舟中風雨

何仕家 邑人舉人

世路多艱涉孤帆黑夜開濛濛蘆荻岸漂泊水大崖苦海從心渡驚波拂面來自憐形影弔誰識濟時才
案仕家與羅萬傑李士淳郭之奇結陶社不忘明室羅李郭諸公皆
魁義謀匡復仕家擬於吳六齋不能行其志觀此詩可見其鬱鬱矣

閉曠行

潘 耒 次朝 翰林
吳江人

潮郡綿萬山客程多山行路逢探樵者畧訊諸山名指點最深處雲中有銀坑盜採昔無禁贏糧走疲氓
尋苗斷巖腹排砂出精英鎔冶爛成餅朱提遜光晶貧兒可暴富利源啓紛爭攘奪或相殺盜賊滋縱橫

小利乃大害官長豈不明處脂有餘潤欲禁焉得成賢哉今大守（謂張如堅）清廉莫與京始至嶺以利峻拒如堅賊決策遣封閉塞爭銷姦萌居民始安塔梓鼓寂不鳴我聞重大忌斯人信邦英遠臣在天末雅操能冰清或言山澤藏大地之奇贏方今急治財自計謀金主何不條便宜官採輸額征嗚呼此厲階毒蠱不可嬰地產有時盡國課恆取盈朝幘稅牘糜爛如沸羹丁男化亡命去弄黃池兵富國在本計錐刀非所營端人恥言利宏羊竟富烹此語合洗耳勿言賢守驚

案府志仲坑山採礦康熙四十三年奉旨封閉張克巖字均齋於是年任潮州府執行閉礦潘耒博學鴻詞科翰林爲顧炎武徐乾學高弟刻炎武日知錄詩文集以落職遊嶺表至潮州著有潮州雜詩手書一冊贈海陽陳廷明礦行即作於張守封仲坑山礦時也觀賢哉今太守句自注謂張均齋可見今從陳鈺古瀛詩苑采錄以其關於邑屬掌故參上卷景日診禁礦疏目見

陷隍道中有感

潮州知府 林杭學 字宇武 江寧人

落漢鳴泉

余志貞 澄海人 進士侍讀學士

藍田削壁見飛泉隱隱晴虹百丈懸朱子石函留洞字秦皇古戍浮烽烟無邊珠玉因風灑不盡琴箏鎖日傳最喜源頭多勝概於今流水滿前川

秋日遊藍定庵

羅國珍 舉人

豐順縣志

卷二十一 藝文三

二

汕頭總字局梅縣分局承印

逐鳥尋僧去寒隨客路深香依嵐裏靄潛徹水中音疎圃半生意平蕪一片心閒來秋日語霽色滿江陰

藍田山居寄友

陳海春 邑人

藍田山南南山麓茅葦數家連烟竹白雲秋曉不歸山清泉盤崕出谿谷自苦山深住無鄰山堂午夢驚猿鹿平生喜爲詩酒歡今我何以慰幽獨雲水感君心迹素寒霜念我鬢髮蒼燈相對聽檝檝明月何時談夙昔一枕桐聲今到帷午夜心逐南飛鶴

東門城樓玩月

吳之駿 邑人

冰輪初上最宜人影徹東樓分外新蒨屋冷涵如在水碧欄高立若無鄰風過翠竹偏生韻烟散蒼松別有神最愛山城清夜裏玉壺誰與倚秋旻

南山寺聞鐘聲

張大光 邑人

竹搖清影瘦孤岑古寺蒼涼一望深滿座曇花空俗諦半窗明月印禪心浮生癡夢憑誰喚幾點疎鐘出遠林何事景陽樓下立始知稱人世有知音

五顯求禱雨

張大光

峨峨顯顯自天開嶽立層霄靜不同老幹數枝雄海嶼團雲幾處護崇臺神威不許商羊舞大力能教旱魃摧應是天心憐瘠土故令斥鹵盡滋培

過逸老菴

羅松樸 邑人

夕陽停過棹，徑到僧家蛙噪。一池水風搖幾樹鴉，晴嵐當座翠野竹拂階斜。見說晚香好，猶來就桂花。

羅松標

土牆鄰獨樹，結宇依南坡。山向門前起，泉流廚下過。村童知識少，行客旅情多。入夜峯頭月，清光滿澗阿。

葛祖亮浙江人

癸亥臘八豐順山行

鷄唱行人發，風寒路絕蹤。溪雲籠曉日，山黛鎖層松。涉澗流聲細，登高嶺勢重。斜陽開晚景，蒼翠滿前峯。

葛祖亮

豐順卽事

百里封疆建置新，萬山深處闢孤城。心勞作堵經營久，望切移風案牘清。鞭撲不煩官署冷，倉箱有獲室家盈。浴沂舊事多真樂，閒訪溫泉遣我情。

吉嶺關落成

葛祖亮

雄關當嶺勢，從巖扼要東西設。險同鳥道千盤穿，絕頂螺峯萬疊繞。晴空工興農隙耕無害，守固嚴疆事有終。半載經營成可樂，且凭禪榻聽松風。

豐順山行

葛 輿浙江人

行盡羊腸道，崎嶇跬步逢。兩山如踞虎，一徑儼蟠龍。澗水飛危壁，松濤起遠峯。計程方百里，層折幾千重。

豐溪

葛 輿

雨足郊原潤，溪流一派橫。水高洲漸沒，磯激浪難平。芳草相連碧，浮鷗逐水輕。春來多逸興，倚杖遠含情。

豐順縣志 卷二十五

藝文三

三

汕頭鎮字局梅縣分局承印

過吉嶺關大雷雨

邑令葛 曙浙江人進士

霹靂動空谷，風號萬壑同。泉聲怒危石，雨勢倒層山。避濕雉棲木，銜泥客度關。此中有清味，興僕莫云艱。

山行見茶花

葛 曙

開落空山裏，無言對朔風。清溪爲照影，脉脉素心同。

舟次烏石塘

葛 曙

殘霞川上動，暝色滿前山。何處清歌發，漁舟唱晚還。

產溪曉發

葛 曙

高峯初上日，霜冷一溪烟。密篠開幽徑，層坡結小廛。趁墟人起早，爭渡語喧傳。自得宦遊趣，誰言此地偏。

山中夜行口號

葛 曙

深巖月黑怪鳥啼，風搜石穴聲長嘶。倚崔老樹屹森立，下臨百尺瀑溪僕夫足。繭不能進千山萬山方端倪，我行顧此三嘆自惟。土養物功莫齊，磊磊頑石將焉用。山如有靈還自詆，安得五丁擘巨掌削平峻嶺成。町畦春和雨足催布穀，草淺泥深牛健犁。山靈顧我應大笑，活此一方窮蒸黎。

將去豐順留贈江子上明府

葛 曙

董學千巖重節簪，雨膏三農仍弊室。兩載愧操刀，何幸循良代羣占。撫字勞都人，應寄語報我樂名郊。

普濟橋

邑令王鳳翥

溪分左右滙流城橋駕飛虹一水橫三月柳晴鋪絮過三月到此橋七星潭浴瀉濤鳴橋七眼水門石臺雁齒波
涵影屋接魚鱗市有聲兩岸誕登真普濟孝廉化治變風清

魁星樓

樓在鵬湖書院中

王承鑒

英才濟濟萃膠庠樓對魁星盛氣昌千嶂烟霞輝鳥革雙溪襟帶煥鴻章朱衣點筆文司命黃甲題名斗
射光此日雲梯登一望西園翰墨撲懷香

鵬湖破賊歌

鄒清華邑人

鎮日喧闐謀弭盜聲聲警盜且到盜魁姓古擬黃巾身穿紅袍戴胡帽驚動城中文武官焚香頂祝叩
皇天神靈默降籙爾衆道茲小醜何能為中夜雷雨欲傾壁千尺浪花擊賊領張炮炮聲轟倭忽殲逆
(賊因溪漲不能過橋軍民奮擊擒斬殆盡)普濟橋連血刃紅文峯塔下溪流赤(雙螺口團勇截賊
後路首尾夾擊)東路瀾漫賊復來東關有門賊欲開那知仙洞三鄉鼓(仙洞上中下三鄉皆奮力擊
賊)霹靂從天賊胆摧須臾四而凱歌起一朝渠魁撲滅矣壯士論功歸長官官說威靈神所使吁嗟乎
巨逆湮大義伸莫道無神自有神君不見八公山下秦軍哭萬道疑兵皆草木

千里思

彭景雲邑

千里思乃在大漠北北風吹起關河黑紛紛大雪滿刀頭山月夜夜照顏色古井水北斗極委在西窗窗
下纖連理枝雙飛翼千里思長相憶

豐順縣志

卷二 藝文三

四

汕頭鎮字局梅縣分局承印

折楊柳

彭景雲

折楊柳折得一枝春一枝不足惜千里贈行人妾作楊柳樹君作楊柳絲君絲未能絕妾樹復生枝君子
行未已是妾斷腸時君亦折我亦折折得本尋常枝枝折盡心頭血

當窗織

彭景雲

當窗織不聞機聲長歎息自言家住小長干丈夫十八征河北爾來三歲已有餘盜賊未平歸未得妾身
堂上奉舅姑年年織爲他人飾自食力食力到何時春風楊柳復依依欲寄迴文杳無路不知鹿瘦是亦
非一日機杼兩日歇兩日由來不成衣當窗織得幾時完君子行役尚未歸

贈茶亭菴長老

二首之一

彭景雲

色空無礙是真禪智慧胸中別有天塵世難逢三嘯士大雄喜得一金蟬曾餐香積袈裟換已吸西江衣
鉢傳階下菩提今止發疎風明月自年年

和陳棠谿儀部集弔古四律

丁日昌

到底奸雄死亦愁分香枉自托風流罵嘲能使公千古疑信難憑土一坵好色心同謀漢急賦詩才比用
兵優遺碑廢瓦沙淘盡留得文王二字不銷流
酒酣擊筑亦高風亭長歸來狀不同到此心餘烹狗憾至今人說斬蛇功三分雲氣亡秦楚十萬難聲憶
沛豐第一生平負心事酬恩項伯竟無終歌風臺

鷓鴣啼罷霸圖灰鹿散人稀半綠苔仇怨機深尤物出笑啼情盡敵兵來似聞避世心猶捧誰見懸門眼
自開天要亡吳偏命永甬東應不再徘徊姑蘇臺

圯陵喬木尚蒼蒼易水前頭事渺茫去國如何輕樂殺愛才從古遜昭王自售馬骨臣心壯夜現龍鱗敵
祚長試向臺前一迴首鞭絲當日幾人忙黃金臺

送吳小瀛秋試

有序

丁日昌

吳小瀛秀才相別三十年矣茲以秋試過揭陽縱談往事恍在夢中詢當日侶舊多半物故其兄梅菴
明經亦歿十餘年矣燈前相對爲之慨然君明日即附輪入省口占是篇送行

憶昔與君共窗讀夜夜書聲出茅屋鄰翁驚醒不得眠况復長吟歌當哭君今彈鋏嘆無魚我未能謀慙
食肉蒼顏白髮忽相見尙未聞聲先拭目風塵飄泊幾經秋說着元方涕泗流當時壇坫爭牛耳此日零
落歸山邱卞玉銷埋誰人貢醉中時常踏破窰門前柳樹幾成圍迴首卅年真一夢沉沉風雨夜如年酒
酣拔劍且烹鮮聞道龍門猶未遠鵬鵬擊水真三千輪船明日如飛去惆悵今朝送君處

陷隍道中

丁日昌

肩輿遠出書橋西密密人家傍柳堤一路山光迎客笑半林鳩鳥背人啼園蔬破甲香猶濕野笋丁添綠
未齊自笑勞勞緣底事浮生鎖日寄輪蹄

過言嶺關

丁日昌

豐順縣志

卷二十五

藝文三

五

汕頭總字局梅縣分局承印

薄暮驅車過邑門炊烟滿眼日黃昏有懷欲向秋風訴落葉蕭蕭嶺不言

贈王玉山前輩

丁日昌

廿載多餘夢想頻廬山一見面猶真人如海上三秋月花似江城遍地春澤國宦遊空遠思山門送別倍
留神絮園漸作家園樂又遇黃花兩度新

答雨生中丞見贈原韻

王琳玉山莊清人

雨餘海市見頻頻翠阜重樓亦似真過去事如前夜月半開花已十分春雲中鷄犬誰能識鏡裏烟霞倍
有神前後故人應得句園蔬初綠晚晴新

詠一大紅

王琳

又見花開一丈紅層層發出貫當中牡丹縱擅花王號畢竟輸他正直工

題丁中丞日昌花園聽泉小榭

吳翀博衡湯田人

閒居榭上似空山泉響非徒如佩環枕畔琴聲連蛩韻恍疑仙樂奏人間

憶昔

丁乃潛原名惠聲

寶帶春燈照萬釘趨班衙鼓記曾聽南烹苦笋牽歸夢一再徂年改歲星
世家官樣最清臚獸鎖遍釘擬上都有蓬門謝膏沬曉吹紅撥引光奴
樛棟摧墜歲亦徂憐才此意世今無竹林再到應非昔惆悵黃公舊酒壚

和風轉蕙泛崇蘭恰與騷情對倚欄曲沼已平渾廿載拂條剪葉再留看

與內子孫言言聯句

丁乃潛

牆陰障日綠還移又見輕輪作羽儀笛裏梅花吹不落詞樽前芍藥贈將離雲腰到枕香初熟言石髮窺
廉晚更垂取次琅玕勤手植詞炎天待雨看紛披言

青蠅篇

丁乃潛

天怒知我生不辰時未抵冬寒嚴凝是有鴻逸避繳矰二百餘年見未曾大廷廣座來青蠅彼譖人者是
爾能於時蜂蠆毒相仍履霜知堅懷兢兢雖有善者力弗勝孔鸞將傳喚欲磨上窺帝旨欽克承下畏民
碧如薄冰湯之銘盤與日新鑒國趨勢羣浮興吾國奈何不自仁大哉皇言世所稱判別忠奸猶淄澠何
來蜚語想憑陵白日殿上飛蒼鷹良工不藏鳳鳥懲酒血鍛羽墮股肱北冥沉昏浪層層雄狐專城意自
矜朝有黃金暮百朋恩威所至愛與憎久矣官方無叙澄北方宜言熒惑升夜犯南斗光生稜孳呼號
龍馭升王母踏波亦上騰嗣皇冲齡天命膺以直燭奸如引繩射工含沙失依憑帝諭策免不敢丞吁嗟
青蠅兮將索爾枯魚之肆毋觀觀兮垂天之鵬案此篇本事甚明可作詩史

叔雅芝有日矣凄然感賦

丁乃潛

天涯昆季各徂年述事誰與肯構先計日首途兄北上讀碑同飯寺東偏胥僂別後增貧病甫里歸來問
海田更向寅南悟圓寂斷魂蘿月自啼鵲

豐順縣志

卷二十五

藝文三

六

汕頭總字局梅縣分局承印

中郎舊業付終窮書劍飄零更雨風坐看故邱成棋木至今遺恨視焦桐衝風病羽飛常退旅客羈懷歲
始空垂老一攀原上墓殘灰猶熱紙錢紅

感事

丁惠康叔雅

披髮繭足行遑遑有人流涕哀江南眼前所見皆餘子大宙之亂何時戢

迴風詞留別日本諸寓公

丁惠康

日暮思君苦未來飛紅狼籍舊亭臺沉沉遠夢迷千劫慘慘新詞賦八哀心比枯桐疑半死淚如殘蠟漸
成灰至關人老愁何極窈窕春星望幾回

此去風雲方百變側身天地竟何之行吟芳草無歸路倚偏銀屏繫所思最有溫柔聲一握是他幽怨亂
千絲轆轤水夕頻懷抱詎獨西風黯別離

手按殘紅不忍看輕寒無賴倚闌干陰晴未定天如醉疾迷方淚易彈舊恨尊前歌昔昔新愁簾外雨
潺潺傷心思婦遶西夢冷怯空閨人未還

一作遊車似不
如用唐人句爲雅

艱難行路黯魂銷帝遣巫陽賦大招愁雨愁風才易盡傷春傷別意無聊相看鏡匣驚消瘦暗繫香囊慰
寂寥獨自思量自延佇碧城十二總迢迢

簡幼陵

丁惠康

侯官嚴幼陵觀察示余舊作二篇多推言新理遞擅之故與所謂天演論多有合者反覆把翫有感於

心率賦一章

莊生論名理亡羊以路歧殊途不同歸諸子竟紛馳陶唐已日遠述者無官尼混沌竅未鑿坐使氓蚩蚩
陳篇獵糲糲挾策空嘵嘵聞道乃大笑高論請卑之邯鄲恥學步嫖母仇西施督人喪迷方龍川歎風痺
詎解古聖賢集益何常師天子嗟失官所守在四夷妙理無隱爾天壤光昭垂達人貴先覺後獲務爾思
寶藏燦琳琅空返慙波斯觥觥嚴夫子神解如一時近嗟大道喪遠懷古人悲發憤逞宿慧寢饋侈新知
猶恐衆人醉盡爲餉糟醕鈎沉託豪素索隱窮攀追幾繆梳日櫛一掃糠與粃廉衢啓迺軫腐臭化神奇
震盪充九垓日月曜兩儀君山論子雲必傳信無疑猶怪大元經聲牙將誰欺三夢參九據其神乃支離
法言更模擬覆瓿自忸怩終焉繡繁悅羊質蒙虎皮視君絕標諦太放瑰瑋辭豈不走且僵微言諒非私
余生晚聞道久矣坐井窺始讀天演論口沫而手抵孺子喜可教終聆述懷詩感君無盡意諷詠入肝脾
精進雖未能瞋勉不知疲長轡聘修途常慮逼崦嵫或佛終恐後祝君爲起衰女得同化人掩袂涕漣漣

北上留別諸昆季

進士吳世驥

十五名場角藝時出門骨肉未離爲憐小子勞親送偏得難兄有弟知廿一韶華初閱歷九年京國漫
棲遲那堪舊事重回憶客思鄉愁縮鬢絲余自十五先夫小試補弟子員嗣任省赴郡省費兄偕二十一歲
赴廷試始獨口而長兄亦冠幸梅州留京九年歷影隨則不暇過憶矣

題扇畫

李廷桂

雲樹蒼茫大渡頭淡烟微雨撲孤舟一篙春漲隨南去迴首花明對客愁

豐順縣志

卷二十一

藝文三

七

汕頭總字局梅縣分局承印

題培文塔詩後

吳亦材舉人馬平縣知縣

羣公作賦欲摩空馳聘爭誇筆陣雄自是潮東金管好一校端正插墮東

自從臣鶴與皇羲此筆流傳共數枝造物不容陳腐染頻頻倒影滌江湄

七月初得四男捷南宮欽點主報

吳亦材

猶是天涯落窠身除書初捧舊銜敢言名下無虛士孰是生來卽責人萬里輪蹄愁托鉢八年鄉夢繞

慈親節衣指日來歸省遠大無忘囑咐頻

次象州龍笠初二兄九日登文昌閣原韻

吳亦材

雲樹蒼蒼水國秋黃花解笑逐臣遊偏教別緒縈南浦不遺風光到小樓適參家眷東歸三徑猶荒懷舊侶九天

排翮看英流良辰勝會全辜負空嘆問白居了頭

重遊泮水寄黎輔菴同年

並序

吳亦材

壬辰十月爲我輩遊泮之年甲子重逢實人生難得之事大台內入僕感辰星靈光猶存君真碩果不
有新詠誰憶舊緣爰綴數言錄呈訂可

宮牆佳氣繞氤氲記我初來是小春屈指忽經過甲子問年依舊又壬辰堂開奎壁星同聚士慶風雲運
轉新難得今朝青紫會膠庠一對白頭人

六十年前賦采芹重來無復舊同羣當時謬許金門客督學爲金仙日猶懷鯉對文題是他日獨立二句題文一領朝衣慚

作吏八司華髮幸隨人寄言鑣鏢礮溪叟愛惜精神壯我軍

海軍衙門

陳期昌

海疆不靖武備荒中原陸沉心慘傷將軍下令習海戰士卒胆懾心皇皇憶昔俞威勇莫當海上得意軍
騰驤三百年來都無事胡爲小醜復跳梁中土承平久兵刃無鋒芒曩時說偃武今日空望洋利砲連環
號子母船堅鐵甲殊餘腥我軍未諳練被驅走羣羊要塞失右臂始事籌邊防海軍設衙門將士選材良
大旗落日照桴鼓隨風颺從今加操練兵氣豈不揚嗟哉安得后羿擅神技一射九日翻扶桑

火車行

陳期昌

憶昔來京閱九載但乘火輪船渡海天津水曲泛扁舟通舟起早駕驚駘驟車遇雨行路難旅客苦坐愁
危殆嗟哉歲月竟如流今我來斯事多改何意新製火輪車走陸如飛捷百倍塘沽抵津津抵都五六百
里頃刻待中朝創始立法良利國便民經濟在西人巧妙原可階所貴能不惜財賄客來勸作火車行我
愧才疎乏文采微聞列子行御風憑虛憶造非爲功驂鸞駕鶴託仙侶乘槎登梯誇豪雄往事杳冥不足
信理想幻言總皆空何如火車一日行千里蜿蜒游龍翩驚鴻機車前導資火力煤烟簇簇凌蒼穹俄頃
十輪百輪動輾轉展轉真神工絕類常山之蛇勢首尾相應皆靈通鐵軸連接似踵武羣動有如百足虫
裝運貨物計鈞石萬磅千磅任積壓多多益善重無嫌一里二里聯絡繹座位分等復分房布置妥貼成
規格行客端坐車廂中安舒更逾乘輪泊直向軌道行長驅平平蕩蕩無偏窄越山穿洞水通橋險阻胥
豐順縣志 卷二十五 藝文三 八 汕頭鎮字局梅縣分局承印

望銅鼓嶂

陳期昌

銅鼓突兀雲霄間衆山纍纍四面環我欲登臨一憑眺蠶叢鳥道難躋攀春來遙望草碧色常有白雲籠
半山積雨剛晴霧霧散雲如絮帽披螺髮瀑布高飛疑落漢五里十里聞淙潺秋來一色極天淨皎皎山
日看斑斕浮嵐卓午生岫谷若遠若近攬松關雲爾薄暮微茫合林木隱約夕陽殷東山月照光一片雙
峯潔白樹如珊瑚盤曲綿亘青天外其下皆不通塵闕吁嗟乎具此名勝何寂寞都緣置散在簫間但見土
石嵯峨立任俗人相嘲訕倘有逸客騷人喜題咏生色豈止陰那堪乃不得與羅浮相輝耀無怪寥落
插人寰吁嗟乎銅鼓崔巍廣大終不朽何妨任爾樵夫牧豎相往還

曾剛父主政贈玫瑰露酒雙樽索以詩報奉答

陳期昌

何期貞一酒如泉酌我雙樽抵萬錢惟我無才非玉局使君是九霞仙

文章扶漢倍豪雄如此醇醪醺釀同奇語警人醒客醉瓣香還爲祝南豐

蒙惠殊感
展前尤佩

丁叔雅肄業南學欲南歸賦此留之

秋深夜靜擁衾寒留滯京華信是難記否桓榮十五載家園不住住長安
蟾宮記織未知名漫道嬋娟大有情料得桂花香散處此中心事對秋明

溫泉

吳其瀚

一派豐溪水滔滔去不窮石泉通火氣野店醉春風入夜連雲湧凌晨散霧同相看真不厭半雨半晴中

水仙花二首

吳其瀚

滿大欲雪暮雲涼顧影遙憐水一方冷艷却羞矜絕色微馨偏欲壓羣芳漫將銀蒜爭相擬好作冰消合
自障安得蕭山三百本藝來銅洗遍書堂

冰心玉骨淨無瑕女史從來好夢奢可有瓊漿酬寂寞似聞瑤珮亂交加蓬山縹緲曾尋約水國清寒便是家我本幽人結幽賞焚香靜對興偏除

書新池鄉胡烈婦事

吳其瀚

乾坤正氣塞四維不鍾男子鍾女兒吾豐有鄉曰新池轟轟烈烈婦心所儀烈婦系出紫湯支白歸胡生樂
倡隨燕婉初夏新結褵方期伯鸞案齊眉吁嗟時命不可知秋風摧折連理枝百年伉儷棄如遺相依四
月竟長離肝摧腸斷雙淚垂自傷薄命志難移守義漫詠柏舟詩相從地下復何時妾狗夫兮夫莫悲同
穴之義妾所期咬舌舌斷命如絲血流涔涔神自怡珠沉玉碎殞須臾烈風勁節事尤奇君不見文叔妻
豐順縣志 卷二十五 文藝三 九 汕頭諸字局梅縣分局承印

贈魏滋峴邑侯素和七古一首

吳其瀚

茅齋隱几似南郭葉落閒階喧鳥雀叩門剝啄人何來謂有新詩慰寂寞新詩六首連城珍珠璣燦爛光
紛綸自來能吏皆風雅聊將餘事作詩人豐城最爾萬山僻賢侯管領風生腋清儉齊呼顧建康任真不
減陶彭澤憶昨公來方下車門風未息憂池魚神明父母兩無愧於今赤子馴擾鋤政通人和俗一變有
加無己心忘倦崇學餘杭范甯賢擬將小子裁狂狷（設立小學）我亦慙慙念梓桑喝人期共立甘棠
文貞事業家傳在大才小用公何妨豈知才大心愈小治若烹鮮戒騷擾鬼蜮洞照豚魚孚無冤休歌秦
吉了願公努力崇令名秋月長皎銀河清鄙人迹疏心轉密傾耳竊聽絃歌聲吁嗟乎我讀公詩引領望
關心民瘼非鋪張佇看流澤將與雙溪水共長

攬勝亭懷古七古一首

吳其瀚

飛泉嶺上草萋萋策杖尋幽聞鳥啼道是鄭公讀書處亭名攬勝親留題鄭公久抱匡時具不願朝廷竟
南渡歸來卜築藍田莊生徒祁祁趨若鶩故人相訪喜相過晦翁墨迹崖上摩落漢鳴泉四大字至今好
事猶搜羅吁嗟乎摩詰網川居陶令柴桑宅古來名士都是泥鴻留爪迹亭荒人遠渺難尋斜陽照處空
山碧

感事雜詩效白香山新樂府四首

吳其濬

盜如毛

盜如毛盜多人困心焦勞外有侮兮內多故橫流滄海何滔滔自古閭閻無遠見有業易安否思變但教一飽下波瀾寒迫饑驅乃搆煽邇來饑饉已頻年旱澇災深勢蔓延生計日窮窮則盜豺狼蛇蝎相糾纏粵中之害賄尤虐盡把黃金填大壑財空產蕩苦無聊烏合蟻屯圖劫掠劫掠夫如何南塘夜出多（見晉書祖逖傳）晝伏宵動如鼠黠突然平地生風波憶昔道咸之間最多盜無如今日宛然衽席藏干戈紛紛藉藉何會何名難指數焉鴟終日搏攫誰設羅盜如毛毛猶可刪盜難弭弭盜之權孰主是堂堂大營門安得兵如水涓滴不塞成江河羣流狂奔海波起杞人之憂亦大矣

託教門

託教門教門紛紛勢何張一國之人半若狂藉問予胡然道是我弱而彼强天下遁逃此淵藪一遊其門卽虎狼虎狼不可馴彼教休相親耶蘇何人羣然奉之爲聖神教有異名無異實試讀其書蟲唧唧初因遊歷到中華當時教禁嚴如律豈料如今蠅蠖蟻附競爭先彼自牢籠我投苙如鷄鵲雀獺鵠魚人情擾擾誰安集况復憑權藉勢起狂瀾構禍尋讎興萬端狐假虎威手可炙弱肉强食心尤寒吁嗟乎堯舜至今四千數百載大道觥觥書史在杏壇教主滙羣言日月光明增異彩九州四海荷甄陶百世師之母或改胡爲王路平平舍不由蠶叢荆棘滿眼愁惟天有主上有帝此外一切皆浮漚

豐順縣志

卷二十五

藝文三

十

汕頭鑄字局梅縣分局承印

困輸將

困輸將輸將困在勞兵卒處處邊疆常調發連年戰守幾時休閭閻鼠雀俱羅掘困輸將困在償款多年年按額等催科黃金易盡債難足虛牝空填奈若何奈若何空嘆息我欲言之淚霑臆下民有脂膏竭蹶亦云極邇復徵斂煩焚如火煎迫止供之外復悉索件繫條分垂定式可憐搜刮到雞豚下至窮櫓避不得若論收效在天家十居一二焉裨國自笑我生真不辰皇天不雨金四海何由春藉問輸將久困果何因誰爲天子封疆之大臣

均權利

均權利均則無貧財用途富氏富國何策良消長盈虛宜措意自昔豐亨豫泰朝此權此利皆無墜年來利柄歸四夷中國堂堂如漏卮罌粟有花最流毒彌縫尙借茶與絲瀟日印茶多且美我利彼奪伊胡底餘貨區區奚足言此涸彼盈如逝水人多出少判天淵大利未興安有多何况頻年索地善居奇處處膏腴彼得之公法不行私智逞優勝紕敗我又何能爲均權利有利無權焉得均傷哉逼處皆強鄰四萬萬人惟患貧

記三都學校草木

王惠和

庭中有丹桂枝葉恆疑種自十年前抽芽不吐葉昨歲始發華連年更結子客至話吉祥把酒賀物喜予意不謂然此乃物之理荔實歲兩周松鬣星一紀嘉植無速成苗振將稿死不見木槿花朝榮夕卽靡

堂前夢幽蘭翹翹似鳳尾敗葉亂周遮穴根聚螻蟻不花亦不榮棄置等凡卉那知得氣深開吐萼鮮鮮
願君牽帷裳勿遺如葑菲

去歲菊花開片片白如雪今歲菊數盆點驗猩猩血豈效時世妝實抱高士節花樣固不同匪惟澗而涅
還富守清素保我冰霜潔

雙雙玉蘭萬鬱鬱與簷齊狂風大無賴吹倒不生莖幸餘一株在開落趁烏啼月明清露下時時聞木樨
階下梧桐樹森森四五株歲晚霜葉落挺立枝相扶其中一株妙頭未轉盤紆直尋而枉尺胡爲與衆殊
豈是欲巢鳳先學作龍雛

芭蕉種窗前長夜戰風雨却喜綠陰濃巧障日亭午有時學草書筆勢趁飛舞庇覆木芙蓉每尋花城主
異卉有難冠團團映日紅枝葉巧相對簪珥獨稱雄客來多乞種搓手忙齋童已逾百日艷置身錦繡叢
借問金谷裏誰歟起舞工

門外數畝地草木常爭妍紫藤拖滿架隨闌屈曲纏中有大紅花片葩開綿綿蒼松與翠竹枝葉互鈞連
何期蔓草縛黏衣如針氈呼童事芟刈已除又復然坐看長大息不如任所使妍醜雖各判要自賦諸天

奉和李介承秋思原韻四首之一

王惠和

梧桐落葉乍驚秋瘴海炎氣尚未收已喜雁迴書有字可堪龍戰血成流氣森巫峽猿啼老風急瀟湘鶴
唳悠塞上江間同慘黯杜陵野老不勝愁

豐順縣志

卷二十五

文藝三

十一

汕頭韓字局梅縣分局承印

路歧南北正堪悲寄語征人仔細思胡虜渡河方飲馬元戎賭墅尙圍棋發憂恤治私緯手快還期斬
亂絲極目中原猶擾擾升沉大數有誰知

周遂改謨大鼎歌

步昌黎石鼓歌元韻

王惠和

許君手持古鼎文勸我試作古鼎歌古鼎有銘推孔氏僕偏祖述弗父何神禹九鼎巧象物魑魅魍魎
天戈衛國孔惺辭溢美論譏先祖工琢磨桓桓宣王中興主九州萬國皆網羅薄伐獫狁震朔漠功輿華
嶽齊巍峩其時將相均奇特武記江漢文卷阿啓謨遂氏帥師出史泮冊命無譴訶折首六百後五十渠
魁酋從治無訛酬庸勒廟致寶鼎雷篆饗饗變蚪蚪朱黃赤帝互掩映不數鼓鼓冒靈龜二千餘年埋沒
久時序易葉兼收柯一朝鐘土岐山出精光迸溢水纖梭錫女賴見百世字想見退食臣委蛇世界如今
厭守舊好古誰復測皇娥喜君偏嗜金石錄最年撥掉江之沱拓就金山古鼎字書法軼絕晉永和注經
校史資考訂篇次排列甲乙科朗然一字值千緡吉光片羽豈在多細讀津津倍有味如啖燭峯紫駱駝
每盼他山藉攻錯輒幸風雨時相過憶昔與君戰場屋字句疵累蒙切磋廿餘年來徒奔逐流光一擲等
逝波嗟予懷駒苦踟促羨子駘蕩無偏頗嶄然子弟露頭角光遠早卜耀自佗談經鴻都疏罅隙詎趨風
氣工煢爇左圖右史勤搜索赤文綠字目摩挲前有昌黎後東坡撫摩石鼓相吟哦此鼎晚出如驂靳漫
比家雞與鷄鵠周代兕觥并彝鼎屏朝百辟受福那迄今寶物隱復現風霜兵燹歷坎軻偏旁點化供蒐
討萬古不廢如江河自古神奇出陳腐毋嗟歲月其蹉跎

寄吳君雲裳

吳以春間入京謁選刻尚留京

王惠和

班生此去擬登仙父老相祈著祖鞭燕雀亦知鴻鵠志驚駘難附渥洼羈解吟草句居原易早出茅廬進身先眼界增時才力健願揮珠玉寄雲箋

和岑縣長學呂

吳家淮

治績東番有盛名龍江飛鳥播羊城岑彭事業從今始呂尚功勳早歲成邑逢疲難調劑苦案無翻覆鑒衡平下車愛戴歌來暮老我空山聽碩聲

和玲瓏館題壁原韻一首

王家騏

花源蓮社一齊通憔悴韶光唱晚風殺敵渡河悲擊楫抗懷射日怒張弓頭銜早已從高東文字由來莫送窮雅集蘭亭坐修竹敢誇異曲本同工

贈青光旅社主人一首

王家騏

鬱葱佳氣耀松岡影落明湖青壁光鷄鳴獅牙鍾雋秀羊腸鳥跡關康莊遊春莫載春歸去祖道休嗟道阻長結社敦賢度意態漫憑冷眼識行藏

理苗卽事

王懋修

草草停鞭說理苗一枝暫借愧鷓鴣峒民飢溺同休戚時局艱難倍灼焦綬靖應謀蘇涸鮒招徠無計格飛鴉幾年戎馬粗休息但願從今劫氣銷

豐順縣志

卷二十五

藝文三

十二

汕頭鑄字局梅縣分局承印

閏三月上旬詠鶴蘭

王 緯

約得東皇半月留猶蘭操聽越人謳火輪輾破三千界鶴警被登十二樓芳蕊天香長養鼻光輝金色久凝眸如何濁世趨炎客偏惱春光百五修

閏三月九日偶吟

王 緯

荷錢買得有餘香喜極山妻欲忘貧綠戰紅酣娛晚景鶯歌燕語媚幽人登臨山水慚腰足來往漁樵迭主賓長嘯一聲天籟寫銜山日落柳眉顰

貞義婦陳柯氏

并引

王 緯

去所居四十數里許光緒間里有陳柯氏極樸中爲農家養媳年及笄未成禮而所夫夭殤居貧以十指事霜姑尋螟蛉一子年五十餘卒近悉顛末爲拈四韻以俟夫觀風者采焉

物有陰陽耦人知天地心如何玉蟾輩

蜀東貞義婦柯李氏咸豐丁巳冬王天台賜號玉蟾子事見微生船

獨免劫塵侵十指事姑謹隻身代子任

卓哉貞義著臨穴一沉吟

次韻酬李老表介承過訪見贈

王 緯

高軒過賦方投轄矮屋欠伸忽打頭西岳峯尖搖筆逸北山瀑酒洗眸游半輪桂魄孤懸影一片秋心萬古愁勿話橫流增感慨免如宋玉又悲秋

吊宋馬將軍墓

墓在潮州金山

張騰光百謙

萬點流螢蔓草中天南有淚洒英雄千秋智井糲糊碧一樹高棉掩映紅孰令河山淪異族長懸日月照孤忠豐碑剝落存名號樵牧依然唱晚風南天不築受降城國破家亡一死輕古塚千年埋碧血空山萬籟泣商聲可憐胡馬中原逐忍看蝸牛內部爭莽莽神州多事日我來憑弔淚縱橫

豐城敵機炸後移居新峯嶺

李介丞

溪山招我亂中移便向東隣借一枝水繞成村城市遠樓孤欲晚夕陽遲彌大戰火依人拙捲地秋風動客思國破曾知無樂土閒尋黃葉且題詩

豐城晚步

前人

風景依然又九秋川原信美是吾州孤城水繞隨山盡故壘雲連落日浮四塞雄關空險隘三忠遺烈景前修明季吳萬雄羅萬傑吳廷楨三公均以忠節著建三忠祠於公園已久可憐邑里多焦土敵去猶疏保衛謀

偕劉偉軍專員劉禹輪縣長禮亭栢蒼維岳諸君憩

由榴社樹下口占

前人

欲墾荒原濟食貧遠尋還憩澗之濱當途社樹靈風滿如畫溪山倦客親麥畝難成文叔飽履痕同入謝公塵此行不爲登臨興踏遍烟阿二月春

築黃花橋峭壁間有古籐長二丈許爲路工斷去悵然

賦此

前人

豐順縣志 卷二十一 文藝三

十三

汕頭鑄字局梅縣分局承印

汀蒲短短水潺潺石上寒籐不記年峭壁今成行客路他時誰憶舊溪烟

村居卽事

前人

紅荳黃花歲歲妍土風不改是林泉吾家更釀重陽酒舊秫留香記隔年

酬徐哲東見贈原韻

前人

彈射皆穿的孰如徐子才商量加我遂懷抱爲君開既結論詩侶何當載酒陪倘逢驛使至定寄嶺南梅

酬劉永濟見貽原韻

前人

何意詞宗伯新詩萬里傳儒林欽挹久野老辱貽偏氣味攸蘭臭神交伐石堅春風多燕雁長願寄芳妍

酬雙燕樓主陳翔冰巴黎

大公報主筆

前人

比翼翩翩萬里飛巴黎門巷亦烏衣倘聞舊侶巢林去應感今時救國非風雨雞鳴喚喔樓頭柳色任依依山川信美雙棲好莫漫商量縵縵歸

禽言

前人

脫却布袴脫却布袴廚無粒米炊無釜茯苓斲盡藏薇空飢腸碌碌尋山芋大官劉公憐我飢貸我墾米活戶戶南山墾盡復北山只愁米盡飢如故東村西村墾處處將工代賑無飢殍脫却布袴行不得也哥哥行不得也哥哥胡爲日尋山之阿長林宿莽我所止爾乃伐木夷陵坡老兒不作書蟲死築塘開渠蒼若何犁墓墾草田爲禾豈無蛇螫山鬼呵慎防魑魅伺人過行不得也哥哥

泥滑滑泥滑滑上山下山屐齒折春雨時至路險巇辛苦爲誰憐汝拙濕爾衣履忍爾饑帶水拖泥牛咄咄長爲曳尾歧路傍失足甯無墮荆棘泥滑滑

不如歸去不如歸去故山猿鶴勞汝俟山塘開口今能言（劉志陸）饑驅何不荷鋤至我有陵坡沃土沃可墾梯田田無數連山瀟泉東西流灌溉畝可收五庾彼餐若小素不如歸去

旅京感懷前四首

并序

吳震雲

庚戌孟夏社友從海上來有事於都門自夏徂秋相與奔馳者數月卒以時機未至先後南歸僕以事牽久留京邸維時寒風嘯天冷雪鋪地熱爐煮酒知已天涯撫景懷人百端交集感愴言之不計工拙也

薊門飄泊旅囊慙憂患餘生病亦頑十說劇憐蘇季子一官辜負白香山寧爲雞口終饒舌爛盡羊頭總汗顏夢斷天涯歸未得中原遙隔淚潸潸

碧雲出岫久委心暮地西風吹不禁槎漠無涯常遠近萍江有浪任浮沉積薪厝火當時策流水高山舊日琴獨倚陶然亭上望憑欄休作等閒吟

廿載韶光歎逝波英雄兒女兩蹉跎豺狼當道程途險蜀洛爭馳黨派多過去樵夫夢得鹿而今豎子鳩如鵝鵝年南北長羈旅莫唱馮驩劍鏃歌

偶作京華汗漫游栖遲歲月客心愁行歌燕市悲屠狗坐對新亭泣楚囚在事怕交鸚鵡語謀身換就鸛

豐順縣志

卷二十一

藝文三

十四

汕頭錦字局梅縣分局承印

鸛裘離觴餞罷知多少暮雨晨風感不休

山陰逸叟以秋感詩見寄次韻和之兼柬崔別駕

子駿

許繼戎小序

前人

搖落江山半壁秋南朝天子獨無愁妃呼唱徹商聲老子夜蛩增滄海憂寶匣寒鏃凝劍氣金風斜日照

城頭乾坤詎任神州劫太息黃民尙夢游

鮑江月夜醉呵三絕寄都門國光報記者張俞人

前人

東門倚嘯聲何壯易水悲歌氣自豪剩有頭顱酬死友漫天紅雨一單刀

留侯一擊事雖成車笠天涯感慨增岡上黃花如鐵血由來豪俠死生輕

咤叱風雲徧磅礴男兒立志要英雄朝三暮四欺人甚拔劍狂呼砍狙公

擬古二首

前人

鴻雁東南飛奮翮在天際臨風何徘徊下顧求羣類自君遠從征南天與北地非無織錦詩迴環明妾意亦有紅淚壺努力堅君志自春復徂秋相思心如醉如何塞外音天風吹不至

出門接雙鯉開緘喜遠貽云當乘月來十五團圓時細味詞中意使妾驚且疑自頒大陽曆兔魄常參差月有廿一日夜夜推盈虧屈指計十五僅隔三日期舉頭望天漢畫娥不成眉安得皎皎光月下親君儀何當三五夜花前酌君卮君書不分明妾心長苦悲

剗烟行

爲洋夏鄉作此以寓勸戒

吳白華

有田不樹桑與穀有圃不藝蔬與菽胡爲反取人所棄竟把芙蓉操豚祝昔焚鴉片召夷氛割吾土地殘
吾軍慘剗國民無生氣千年國恥若不聞欣欣相告機會臨天然印度羣生心教得烟花成世界獲利不
殊天雨忽聞法令頒通邑催剗烟花人欲泣釀金來挽絕命期苟延旦夕毋太急上官轉恐燃死灰掃
却魔障迅如雷若有吾民逆吾命烟花未發彈花開斯民重利苦無狀家富何惜國淪喪信是見金不見
人悍然不顧來相抗自來貪得終還失况種禍根害來日以身試法何其愚如蛾赴火飛來疾君不見洋
夏鄉前千畝綠忽變荒涼堪慘目芙蓉寧獨害同胞田園尙且遭遺毒

羊石紀遊二首

羅翔初

鎮海名樓築五層風光大好客頻登分明眼底窮千里無限滄桑感不勝
遊來花塔息吟鞭茗罷神清學坐禪卽色卽空原若是六榕無樹榜依然

救國殲敵七古一首

前人

自從暴日肆憑凌錦繡山河喪半壁凡屬炎黃之子孫忠貞莫不抱憤激徒以羣雄意尙歧低頭不敢撓
鋒鏑又因武庫未充盈忍辱負重持沉寂比者薄海賦同仇僉謀禦侮罷牆閭兼之軍備漸修明稍加訓
練敵辟易倭奴機警知其然作賊心虛有所惕急圖先發以制人欲啓覺端無隙寬借故寇我蘆溝橋好
似晴天起霹靂一味蠻幹逞兇橫砲彈紛飛惡已極君不見平津淞滬間商店民居成瓦礫嗚呼國難既
臨最後關惟有犧牲爲目的健兒救國此其時勇往直前集羣力破釜沉舟師項王猛先看鞭追祖逖或
法子貢說游詞或步陳琳而草檄或效卜式樂輸財或學鄂王勇殺敵滅此朝食雪深讎痛飲黃龍酬勳
績

豐順縣志

卷二十五

文藝三

十五

汕頭編字局梅縣分局承印

酬楚材見贈之作次原韻七律二首

吳桂芳 藝秋

卅年往事思勞結師弟相逢兩鬢皤禍福因人生倚伏虛中應物莫蹉跎危時共惜英雄少來日還期俊
彥多禁令新頒茶當酒樽前未覺醉顏酡

觀人老眼閱婆婆塵海微瀾有伏波驚鳥歸飛云倦旅游龍婉轉且高歌開門未覺青山隘放棹遍達綠
水多似與雄心隨日老魯陽猶欲一揮戈

審查縣志感賦

吳桂芳

筆削森嚴修國史重勞月旦著鄉評眼中人物分臧否筆底毫芒激濁清果有奇才能揭地豈無聲價重
連城老夫漸覺風懷淡高東頭銜市直名

鵬湖書院懷古七絕五首

并序

吳祖理 實生

今之衛生醫院蓋卽清代全邑文化總滙之鵬湖書院遺址也院聘山長一人掌理教務其時中堂原
有奎閣兩層高矗雲霄南皇壯麗與其下之普濟石橋爲邑中建築物之最大觀者先君子海帆掌教
於斯先後十年學風稱一時之盛祖理尙年幼嘗隨侍讀焉厥後邑人議將奎閣拆棄而學風稍見陵

夷迨廢科舉改學堂識者議就此地改建嗣以經費故竟借城中之文昌廟設置致鵬湖勝地荒廢多時殊爲可惜現邑人倡議就此專設高級中學洵可謂能瞻矚形勝者矣感慨之餘詩以紀之

崔巍奎閣插中天學舍連雲思昔年浪擊鵬湖誰振翻英才龍化有三千

安墩嶺上境清新爲避喧囂不染塵隔水禪房鐘鼓聲聲警覺一般人

春風沂水儼當前石拱橋平兩岸牽吾追原來同一貫舞雩咏嘆意拳拳

趨庭鯉對詩常先陟岵興嗟廿載前風景不殊人物異望中樓閣已桑田

果然此地占高中四望平疇舊貫通八代文章衰易起問誰司鐸學韓公

寄少懷族姪

并序

女史陳玉如吳耀寶妻

民十年外子星君調梅州司法監督時族姪少懷任法院書記官少懷固善於繪事者贈余所繪梅花數幅作此奉謝

猶記梅州共話時紗窗夜冷月來遲憐儂病後無詩料爲畫梅花三兩枝

客懷

廿四年冬欲歸家省親旅臺告乏有感賦此

吳丹華思九

宦海升沉已十年歸鞍難覓路頭錢聰明多被虛名誤一任清高莫自憐

書歎

吳丹華

廿六年春復任法官初任海康地院推事五月調代瓊樂地院推事兼院長旋因原任同院調任瓊山

豐順縣志

卷二十五

藝文三

十六

汕頭鑄字局梅縣分局承印

地院推事僅及五月又調連縣地院推事因即口占并呈高等法院院長史延程獲奉准免調

檄調頻驚迅似雷不遑寧處實堪哀征塵僕僕南和北輸與磯頭築釣臺

次魯凋醉後原韻

王楚材

重認兒時舊釣遊橫吹短笛憶騎牛家鄉風景何曾異故國山河尚未收書劍飄零人漸老地天翻覆志難休歸來漫作滄桑感一醉能澆萬斛愁

野望

前人

村郊滿望盡生機禾黍青青草正肥最是當年垂釣處一溪春漲沒魚磯

揆一携媳自韶歸

前人

千里韶關道征鞍未拂塵羣來相問訊爭看遠歸人

端陽感賦

王楚材

昨伴春風歸故鄉匆匆駒隙又端陽徒聞競渡哀忠盡空賦懷沙弔國殤蒲劍降魔驅暴敵艾旗懸戶迺休祥遭逢時難年荒日爲遣牢愁一舉觴

玲瓏館雜詩

倒疊韻

王楚材

自儗雲中鶴迴翔盼故鄉瀟流一渡水導始萬松岡沽酒嫌圩遠尋詩引興長平生恥虛後數典念前王

閒居

倒疊韻

王楚材

晚歲惟耽靜道遙釋壯圖掬泉堪釀酒拚飲當餐鱸着意營三徑何勞泛五湖飄然雲水裏也似守真徒

舍姪懷冰携眷由澳門回里席中喜賦一首倒次魯

騰原韻

王楚材

即景題詩不計工雲山迢遞盼征鴻途逢荆棘嗟行役篋滿珠璣豈算窮拙藻攜經師永叔乘風破浪效
宗公滌塵漫借滄江水盡在傾樽一醉中

遊南山

疊韻

前人

百鍊千錘火候青優游林壑傲山靈養生試繹莊周論立命兼推孟氏經北郭盤桓追輞墅南山卜築繼
蘭亭層巒蔥鬱堪招隱鳥語泉聲細細聽

審查新縣志喜賦

前人

妙手何人續大玄欣逢邑乘纂新篇董狐筆法堪傳世李洛文章重紀年羅列羣峯爭突兀瀦流雙水映
漪漣山川明媚鍾靈秀光大前修冀後賢

弔淮陰侯

王家驥

途窮一飯報千金士擁三齊敢負心不聽劇通終恨晚庸知呂雉設謀深河山帶礪方懸誓手足桁楊已
就擒烏盡弓藏危始悞子房畢竟勝淮陰

玲瓏館雜詩

前人

豐順縣志

卷二十五

文藝三

十七

汕頭總字局梅縣分局承印

故里饒詩與端居說姓王大原遺澤厚閩嶠導源長聳拔三枝嶂嵯峨萬石岡潺湲環水曲夾岸是家鄉
刻畫玲瓏館應思顧野王詞章推祭美贊頌數褒長清景一輪月高歌千仞岡竹林風味好况是共居鄉

閒居

步韻

前人

閒雲與野鶴敢嘆出無徒山曉嵐如黛潭清鏡若湖秋聲娛耳目鄉味饗尊醺嶺表皆人境炊烟映畫圖

舍姪懷冰携眷自澳返里席中感賦

前人

避世湖濱作寓公天涯消息戰雲中父書少讀余將老師道真傳子不窮栗碌半生慚守兔閒關千里喜
歸鴻竹林此日團圓會欲序蘭亭恨未工

遊南山

王家驥

秋來猶有數峯青山水曙供寫性靈鴉背夕陽牛返牧鐘鳴古寺石聞經環溪曲曲灤蘿徑猴嶺巉巖矗
驛亭入耳樵歌聲斷續悠揚最喜隔岡聽

審查新縣志感賦

址在縣立一中即勸小學舊址余三十六年讀書處也

王家驥

前塵回首感欷歔三十六年此讀書學友已成分舉燕講堂差免鞠爲虛濫芋吹白漸南郭直筆垂青記
史魚却喜魯靈光尙在琳琅共賞載盈車

山茶殘春始花

李滄萍

春已將殘花始開含苞曾否憶寒梅遲遲不放將安託落落何因有暗催人事遷流今即古年光容易去

離回吾人莫負東皇意且及花時盡一杯

七夕

李滄萍

人間天上兩無情歷歷明河淺且清久立空階遲佩響乍驚驟雨作秋聲佳期一別成孤往良會差池似隔生莫道詩人多怨感靈山此夕最屏營

六月十八大雨作

李滄萍

悵望人間萬事非寸心不改願多違曉來殘月深深見秋全鳴蟬漸漸稀大海潮音獅子吼疾雷迅雨黑雲飛邦家無限光明氣莫再哀時詠式微

中秋

李滄萍

明月中秋萬古情寒光照眼客心驚廿年羈旅歸無計一夜淒清夢不成永憶社團非昨日長懷村舍負平生亦知秋士偏多感無盡人生意未平

長沙會戰大捷十首之六

吳逸志

千里長圍戰洞庭聲聲鼙鼓耳邊聽雄師蕩盡胡塵穢重見湖峯入眼青
人欽白戰岳家軍決策猶懸志不紛依舊西南雄局在朗潭修贛氣屯雲
漫天烽火逼羅城滾滾江流氣不平正伏奇兵齊殺敵應知主帥極英明
諸將勛勞智勇全存誠妙算是心傳風占鳥角孤虛術都是臨機料敵先

豐順縣志

卷二十五

文藝三

十八

汕頭鑄字局梅縣分局承印

萬家嶺外憶驅除暮皂山前布陣圖却笑蝦夷吞象肉鄱陽飛渡洞庭湖
形勢兵爭到眼明胸中成竹意崢嶸將軍自有縱橫畧救國精忠負勝名

第二次長沙會戰大捷十首之五

吳逸志

再捷饒歌滿洞庭又看氣繞大陵星可憐歷亂倭奴骨夜雨煩冤帶血腥
寇勢艱危計已窮拚將孤注擲湘中大羊犇突逢熊虎一似當年草木風
救國精忠四字標雲龍風虎氣凌霄盛名久著軍難撼漫比潢池盜弄潮
雄師捷伐奮鷹揚民物昭蘇喜若狂滌盡腥膻膺六月算無遺策愧韓張
擊揖中流猛著鞭同仇與子掃狼烟炎黃帝胃精神在重整河山廓八埏

第三次長沙大捷喜賦十首之五

吳逸志

兩度狂瀾靖洞庭又傳鼙鼓馬前聽星沙依舊金湯固一樣丹心照漢青
誘敵圍城讓撲城四郊戰壘血流平雨花臺畔重回首白骨森森照眼明
捲土重來逼歲除敗微如匕見窮圖雄師指顧飛江漢京觀行看遍兩湖
孰謂雄風不競南新牆壁壘等穀函合鑄嶽麓山頭石大捷長沙紀第三
會當掃蕩超東海笑折櫻花一醉歌大漢雄風依樣在共揮逐日魯陽戈

題萬家嶺戰場照片

吳逸志

二十八年冬唐師長古樞率師出擊道經萬家嶺覽戰爭遺跡攝影十六幀見胎因有牌記裝具證明皆倭寇骷髏及其戰馬之骨也感而賦之

茫茫慘黷血玄黃楚尾吳頭古戰場
聲鼓填酣犇萬馬旌旗旖旎拂三霜
雄師難撼聲威壯大將咸推智勇長
驀憶當年殲虜處罡風彈雨逐斜陽

德安形勢記兵爭修水潭潭萬嶺橫
壯士鷹揚聲震地將軍龍躍劍屠鯨
山川莽蕩胡烽黯草木蕭騷寇胆驚
戰骨已隨秋露冷倭奴猶自夢長征

睥睨沙場亦快哉翻將戰蹟畫圖來
骷髏歷亂埋榛莽血漬斑斕幻蘚苔
廣漠魂啼秋夜雨昆明七黑劫餘灰
遙知島國招魂日應悔窮兵是禍胎

湘贛功高蔚國光精忠兩字久名揚
指揮若定欽孫武籌策多疎愧子房
京觀祇今榮蔓草漢家終不失珠囊
天河共洗胡塵惡絳綬光華照故疆

清風閣

并序

吳逸志

麓山清風峽鑿祠棄土成邱因築室其上顏曰清風閣形勢雄奇景物幽美星沙湘渚橫列案前誠巨觀也詩以紀之

移山築閣別有天二離箕斗插簷緣松楓得地植萬千斧斤所赦數百年高節奇文傲山巔
紅葉青林萬壑妍碧草如烟雨露鮮滿山蜀錦麗杜鵑新栽桃李徧溪邊
春意草敷漚百川雞犬不到隔人烟天好憐

豐順縣志

卷二十五

藝文三

十九

汕頭縣字局梅縣分局承印

幽水潺湲畫圖欣賞大自然停驂小住且留連
兩袖徐來風拂絃小鳥作客雲作牋盤餐市遠花飛筵玉酒此間有逸泉
明月清風何須錢醉風之意寓真詮雙株大樹峙門前陽夏高風竊慕焉
艱危百戰愧身全到此彷彿人間仙有時日暗雨綿綿雲海塵寰似九淵
臨深履薄每拳拳常從愛晚景前賢匈奴未滅遑息肩修我戈矛轉乾坤
封姨吹角奏凱先登臨憂樂上吟鞭名山之名不虛傳安得暇日長周旋

保衛大湖南兩週年感賦

吳逸志

精忠百萬拒東夷大捷長沙挽國危兩載未嘗遺寸土三湘依舊鎮雄師
補天賴有軍難撼射日慙無計出奇衆志成城驅海寇踏平富士慰心期

民國二十八年廣州之敵犯粵北陷英德翁源韶關危在旦夕余偶由湘派兵赴援并令陳烈軍於八小時內由衡乘車馳救軍抵大坑口距敵祇半日程分兵南進一舉破敵韶關之危遂解於是廣東各界公推吳議長在民

率領慰勞團來湘慰勞學以龍韜豹略旗贈余感其真

誠奉謝一律

吳逸志

贛湘縱奏空前捷粵北重開勝利年原濕相呼收犄角武洩無恙洗腥羶伐謀我
我平戎策救國鄉多急難賢千里風塵勞慰問寒梅花未憶南天

題南潯敵情彙刊

吳逸志

泰山易撼岳軍雖血戰南潯敵胆寒帷帳猶懸疎筆劃未將殘寇殄江干

三十一年國慶喜賦

吳逸志

頻年彈雨與腥風血染旌旗分外紅大誇三逢雙十節九戰區三次大捷皆逢雙十節精忠一貫九州同止戈爲武宜崇武

工力成功可樹功本年雙十長沙開國民運動大會景運弘開千載盛收京行逐島夷東

謁曾文正公墓感賦

吳逸志

有清宰輔孰賢豪立德立言公獨勞一代勛名猶事小千秋師表實功高清道光以後文武世習自公以公忠誠模倣幸其將佐傑屬風氣爲之一變治

軍居官皆粹然有儒者氣象其所爲古文卓絕一代爲世所宗所遺治兵語錄亦爲現代軍人所重視狂瀾欲倒憑扶挽浩氣長存仗治陶獅子山前瞻謁處依依不盡

聽松濤

其二

靈開衡嶽縱英明已溺已饑字量宏公會云爲天下計則必已饑已溺一夫不獲引爲余辜舉世滔滔思古道精忠耿耿爲蒼生公會云今舉千瘡並潰無可收拾獨賴此耿耿精忠之寸衷與斯民相對於會禍而謂之中冀其塞絕橫流

之人欲以挽回版圖之天心庶幾萬一有補不然但就時局而論則滔滔者吾不知其底也波翻東海鯨猶在板蕩中原寇未平公不生遲八十載與公攻打石頭城

秋日遊黃埔

王紹生

師及連翩集輿言黃埔游春秋多佳日綠水送行舟濯足高歌清思發灌漑浴舞意悠悠遠山盛如蔚海波碧似油畫翠縱橫稻浪起嬉水時見白鷗浮探杜若涉芳洲雁隨陽蘆荻秋黃埔鎖鑰地屹峙鎮江流

豐順縣志

卷二十五

文藝三

二十

汕頭鎮字局梅縣分局承印

將軍談豹畧壯士臂鷹隼秋冬勤講武超越勝難漠漠隴雲飛戰野旌旗映日烈風還壯美何雄渾美感感何深相看兩不厭悠悠樂我心

秋操

王紹生

野曠風還雁宇高森森戰壘樹旌旄部署周詳資教戰千人集合赴秋操將軍胆氣豪戎服掛金刀驅馳慣乘青驄馬換印輕裘錦戰袍介冑謁元戎軍禮何雍容獨立揚新令動員頃刻中森然劍戟凝清光奮似雷霆勢莫當運用全歸一心妙喊搖山嶽氣飛揚奇變常山蛇鮮艷赤城霞軍容壯盛原如此制勝矜奇未足誇我聞武士在于城文德不服事專征以後河山傷破碎去凶禁暴爲令名快槍實彈射天狼國威振兮正義張敵愾同仇綠底事誓將一舉掃殘槍

晴日墓道登望作

王紹生

上世葬其親守制待廬墓叔季逼生齒茲事良不具吾父葬經時江山與終古痛定有餘悲躑躅任來去地傑信修美靈德金石固遠峯插浮雲鸞鳳來依附其上有宮闕恍若對玄圃一水清且泓沙岸俗驚鷺竹樹綠逾青萬花嬌欲吐林角隱莊家禽鳥相間語麥秀雉鳴日暖遊蜂聚感此生意妍形象想寐寤不盡明發情欲行復猶豫

風雨後謁墓

王紹生

昨夜飄風大雨翻朝來猶自澁心魂東郊屢過存親墓北闕休陳叩帝閣額外孤峯侵曉色林梢一角上

朝嗽濕雲似蓋籠烟樹祇覺親墳靜裏尊

七夕

王紹生

耿耿銀河孰導源羣飛尾首駕大孫定多歡怨分晴雨苦憶睽違等書昏星轉玉繩催曉色風飄羅袂淡秋痕汾陽富貴難求索兒女癡情總費論

閒居

步韵

王紹生

遊倦相如賦高陽舊酒徒層雲跨岱華飛鳥落紅湖窗影三竿竹盤鮮一尺鱸田疇豐黍穀好寫廣平圖

倒疊前韻一首

王紹生

未踐買山約南溟豈可圖藩籬安斥鷃罟網理銀鱸冷眼雲歸岫秋心月滿湖不爲榮利損抱一信吾徒

送舍姪兆堅赴邑任都講幹訓所

王紹生

爲政循名實治術貴甯一煌煌古之徒斯民賴表率驥子亢吾宗奔放推俊逸邑侯愛爾才都講委清秩政令配抗連學說待紹述機構重階層用衆以紀律效率今講求程功匝月畢戶籍與保甲一一稱法式沒政尤所重動員策羣力鄉鎮里閭鄰貫徹歸部勒譬如身使臂不用分南北廟算有良謀決勝定可必持此康濟心未必安緘默滄江臥經年投袂茲復出嚴裝聞戒途清秋日初吉行不假安車奮若鷹隼疾事功非倖致教導宜身帥師法管夷吾效慕王荆國

鄉居次楚材九生原韻

鄒仲干

豐順縣志

卷二十五

藝文三

二十一

汕頭韓字局梅縣分局承印

疎慵怪我探春遲雨後春山景最宜十畝一畦堪學稼一簾明月好吟詩身經離亂思歸隱夢逐繁華憶舊時差比泉明供嘯傲栽花種菊滿東籬

中秋夜嘉定城樓步月

李國平

去年海上中秋節今宵寂寞嘉州月拚將離恨付西風獨上城樓思欲絕

奉和登格壽弘度詞丈用弘丈寄卷園老人原韻

李國平

桃李交榮梓蒼松不改妍貞心高上國拔地老忘年自有龍吟調還同金石堅枝條捍霜雪衆卉流無偏

除夕有懷

李國平

詩成人悲歸何許萬里家山一醉還白髮華燈稚子笑懷人溫語到更闌

卷園杖履人間少未種梅花命作圖秉筆今宵詩幾就更闌想有寄兒書

詠懷

用黃山谷贈張文潛韻

李國平

東身翰墨林本性原不翳明明日月心哀傷食之既歡樂倘可期設神獵衆智榮名安足論抱璞守一世昔慕陶淵明今讀疇人傳疇人本易幾轉覺思鄉縣大庾萬里遙當塗阻龍戰有日歸去來淡泊真理見雲間南歸雁飛鳴求其羣千里結恩愛慚愧不如君吳天色蒼蒼江上水沄沄良辰誓以期把臂共蘭蓀清歌琴瑟聲玉顏昭書几思子蘭蕙姿襟懷類時啓我寧擬蒼松芬馨不如子何以答芳情雞鳴振衣起山河淪戰伐中土蒙妖氛才難騁廟算蕩滌駭瞻聞沉潛觀物理時復撫奇文君子厲本心項屑豈足云

暑來浴天風寒來熱空爐性本不解飲安用酒家胡窮達有所守所貴格精蠡平生重義赴義不踟躕
季世競浮誇慷慨易不朽後生揚顏波紛紛鑿戶牖寧知六合間捧心有妍醜狂流詎易迴吾心嚴可否
世路誠可危人心匿弓矢仁者處其間焉忍築壁壘白黑不分明毋爲妄人喜願來長者車胡用掃門軌

讀家秋韋太史遺文感賦

鄭德能

正初堂稿似曾看懊惱俄將少作剗要令吾家楊德祖不因片語致譏彈
後生慎莫誤家丘高密當年蔚九州珍重茂陵心事在未燒書合武皇求
貧而好學顏回事牆面拘墟應識旃料想西清魚雅日猶懷鉛槧帝王篇
言子絃歌在武城宓生單父亦賢名大溪天上甘棠政遺愛於今流頌聲

大史曾刊正初堂集旋自廢棄故今日不可見曾爲邵武令邵武在閩北大溪上游大溪有灘五百餘
故諺謂一灘高一丈邵武在天上德能附註

和玲瓏館雜詩原韻五言一首

王家騏

繚緗談世系花別牡丹王桃李爭妍開河汾教範長英靈歸嶺表美玉出崑岡惻然村夫子先生祇號鄉

雜錄

邑人李唐介承甫編纂

海甯查孝廉伊璜繼佐崇禎中名士也嘗於冬雪偶步門外見一丐避廡下貌殊異呼問曰聞市井有鐵丐者汝是否曰是也能飲乎曰能發醅坐而對飲查已醺酺而丐殊無酒容衣以絮衣不謝徑去明年復遇之西湖放鶴亭下露肘跣行詢其衣曰入春不須此已付酒家矣問曾讀書識字否曰不讀書識字何至爲丐耶查奇其言爲具湯沐而衣服之詢其氏里曰吳姓六奇名東粵人問何丐曰少好博盡敗其產故流轉江湖自念叩門乞食昔賢不免僕何人敢以爲污查遽促其臂曰吳生海內奇士我以酒徒目之失吳生矣留與痛飲一月厚貲遣之六奇者家世海陽祖明世爲觀察以擢謫故遂爲寔人既歸粵寄食充驛卒稔知關河阨塞形勢會王師入粵邏者執六奇六奇曰請得見大帥言事既見備陳諸郡形勢因請給遊劄數十通散諸土豪所至郡縣壁壘皆下帥上其功十年中累官至廣東水陸師提督孝廉家居久不復記憶前事一日有牙將叩門請謁致吳書問以三千金爲壽邀致人粵水行三千里供帳極盛度梅嶺已遣其子迎候道左所遇部下將吏皆負盾抱弩矢爲前驅抵惠州吳躬自出迎導從雜沓擬于侯王至戟門則蒲伏泥首登堂則北面長跪歷數往事無所忌諱人夜置酒高會身行酒炙歌舞妙麗絲竹迭陳諸將遞起爲壽質明始罷自是留止一載裝累鉅萬將歸復以三千金爲壽錦綺珠貝珊瑚犀象之屬不可貲計查既歸數年值吳興私史之獄牽連及之吳爲之營救查遂獲免于難初查在惠州幕府一

豐順縣志

卷二十六

雜錄

一

汕頭鑄字局梅縣分局承印

目遊後園園有英石一峯高二丈許深寬異之再往已失此石問之則以巨艦載至吳中矣今石尙存查氏之家（王士禎香祖筆記）查伊璜敬修堂同學出處偶記已亥余客長樂潮鎮吳葛如以厚幣邀余至其軍爲語南鄙昔日艱難諸狀葛如能詩自比武侯故以六奇爲名大率用兵以計勝顧名知之矣時令其長君啓晉晉弟啓豐侍余座晉字長源啓豐字文源長源已登丁酉賢書生而紹秀玉立工詩所至輒流速興懷古昔疾行五指篇什繁富不勝舉也余嘗歛其爲文有關戢安之大者嗣余選詩可凡仕宦遊歷所賦無不及之專帙東粵遂入葛如瀆陽峽一詩別久之投余遠問別葛如病而長君晉已修文去矣葛如隨物故世傳余初有一飯之德葛如方布衣野走懷之而思厚報其實無是事也（吳騫拜經樓詩話）案阮通志六奇傳後云六奇貧時遇查繼佐事世艷稱之吳騫拜經樓詩話引繼佐語謂實無其事然王士禎撰六奇別傳及鈕琇粵觚言之鑿鑿英豪未遇乞食而逢知己自古有之特六奇之賢不繫乎此耳故採其說而並存之案蘆中人傳奇亦爲六奇而作

鄭善哉明諸生崇正末讀書潮州夜疲倦隱几臥夢一神人翩然至揖而言曰君尙在此高臥耶潮將亂汝鄉扁山層巒崔巍亘延數十里築砦於此可捍衛一方黎庶善哉覺疑之越宿復如故爲言如是者凡三猶疑信參半神乃曰君猶未信余言耶當拔金山古松爲徵翌晨往視則百尺老松已拔出地上矣善哉乃悟真神靈所詔遂束裝歸自廢田租四百餘石築扁山砦設險立棚鑿井開道日廢錢數萬父兄阻之不聽人皆以爲神魔及砦成潮果大亂遠近依以安者數百家海陽辜朝采吳元昌陳圃公諸名流皆

避亂居岩中迨大清定鼎開科舉取士多有勸之應秋試者則曰我豈不知新朝大典其如食先朝之粟何我將去矣竟無疾而卒時有里人自扁山採樵歸者半山遇善義整冠帶簪擁上碧囑其歸告家人云鑰匙未及交付曾置在某處及至家聞哭聲傳善義已逝世爲之愕然今九河鄉人猶能指其山半地點曰此卽善義公當日遺言樵者處云參鄭家園碑與堂述畧編

金瓶寨在湯坑大山背明季寇亂里人依山築寨自衛垣周於山僅南關一門深池高牆與金湯金鼎二寨犄角舉人楊世喬爲寨主時九軍劉公顯等盤踞蔚霖二都地攻陷揭陽城世喬率寨勇搗其巢穴揭圍遂解未幾劉公顯率大股圍攻金瓶寨世喬督衆堅守閱數月糧盡其棉核蕉根十餘人無所志自提其妻豬使大號佯示寨中尙宰豬食肉者時吳六奇集兵湯田通判府城寨人賴心台夜縋寨牆出赴吳乞援復於夜半頭戴瓠杓泗水回爲賊所獲縋逼心台誘寨人開門得免死心台伴諾之及門則大呼援兵且至宜堅守賊怒斷其手足並焚其屍旋六奇援兵至大破賊附近湖下村巫姓皆附賊六奇驅其衆於山上盡戮之其村後山名至今稱之爲殺人崗旋世喬與六奇定方畧屢擒賊渠劉公顯馬殿黃申等多名寨人抗戰久死者數十乃於寨內山巔闢帝廟附栗主祀之有十二將軍某某勇士某力士某猛士謀士智士傑士壯士威士某某等頭銜姓名至今享祀不替山半舊有敕書樓永曆帝敕授世喬兵部主事時建後燬于火今樓圯改建齋堂其寨屹然如故附錄李介承墓前季嶺東山岩記

朱麻圯山岩在縣東鄆山高二千尺東距饒平鳳凰圩十五里與鳳凰天峯諸山咫尺相望山腰有石洞

豐順縣志

卷二十六

雜錄

一一

汕頭鎮字局梅縣分局承印

深數十丈廣丈許洞外山坡斜坦廣十餘畝富水泉四面皆峭壁僅東南一徑可通洵天險也明隆武帝在閩被執殉國武南公馮玉成率馮亞六等奔避山上穴洞而居據險爲若集兵謀匡復編所部爲三十六隊每隊一灶故俗稱其地名三十六灶不時徵取鄰近鄉村供其餉精久之聲勢張甚官軍以其地險不敢進勦先是鳳凰各鄉因嘉靖海寇吳平崇禎間寇余五姐屢劫掠曾築寨自衛至是文殿佐爲寨長與弟殿餘以勇畧稱當道密令殿佐兄弟圖之殿佐遣心腹投武南公所部並以女娶玉成通好往來密約爲內應康熙己巳殿佐囑其女乘夜先將三十六灶火以水澆滅之躲匿洞側遂親率鄉壯黑夜進襲既潛至岩口以雄雞擲入洞內爲號守兵內應之玉成猝不及備殿佐內外夾擊昏夜互相殘殺玉成部衆遂潰岩亦被燬潮州知府石文晟總兵薛受益申報藩府給殿佐千總劄付併十一縣總巡捕牌隨同官兵清勦餘黨玉成亞六俱精技擊遂遁去不知所往今岩址猶存荆棘怒生荻蘆風戰徒興人感弔之感己明季嶺東山岩記

新樓寨在羅家約明季九軍賊渠劉公顯等據蔚霖爲亂羅姓舊居新埔園被賊攻破羅基盛羅明倫昆仲率族衆遷地于茲築新樓寨謀保寨牆厚三尺許周遭遍設砲眼門外鑿池爲長濠設險甚固甲寅劉進忠之變潮寇復熾所至鄉村皆被燬新樓迭被匪攻基盛等督衆死守以冒險乞外援救卒得保全明季嶺東山岩記

揭陽硯在沙田鄉箭坪村山半四面峭壁僅向南一路可通硯內平坦有溪澗自三十六峯下流飛瀑數

十丈中有關帝廟世傳明末巨寇廖欽輝金德光踞此爲巢穴廟即寇渠結盟拜會時所建後擾及閩粵
贛三省數十里後移銅鼓嶂稱天王自後傳遇擾亂鄉民輒避居於此（錄東山岩記）

仲坑山產銀鉛明代開採有大小鑛窩數百最著爲蘇窩之大興鑛烟燄下之水徑窿大興鑛因鑿獲銀
牛其鑛遂陷即周巖沈三官被壓死之處水徑窿口徑三尺許深十餘里盡處可聞隔山之雞犬聲內有
窰三四深丈許上架木橋可乘燭遊今則橋折水溢矣山南有三官亭祀周巖沈三官亭內有鑛爐一鑛
自康熙壬午爐鑛文字甚晰殆當時採鑛工商所捐鑄者鑛工註冊者凡一三萬餘人山上有鋪石街道
三長各數里鋪戶無數舊址猶存西北二里有淨水寺即淨水遠鐘邑志所稱爲八景之一也鍾鑛自元
代至元三年寺內有五足鍾鼎缺去其一角相傳此鼎舊埋沒於長埔村山塘田面坎間爲田父鋤土所
毀後乃移置寺中故俗稱之爲飛來爐惜無文字可攷所未詳也寺重建於康熙乙巳即吳六奇之川舅
胡海所倡建葛志相傳舊爲茅菴未足信寺前溪水不產魚蝦故名淨水殆鑛泉寒冽故耳（參譚竹君遊

記編

大田村舊名伴邦鄉大樅譚氏明代建倉於此久之遂家焉明季李寨人窺其豐積屢肆焚劫康熙丁亥
六月二十二日洪水田廬燬燬爲平地沙岡朱姓十餘人避屋後柚樹下全被淹斃道光庚寅閏七月洪
水拔木崩山白溪壩金吳溫謝胡各姓淹斃八十餘人譚姓亦死三男二婦冲塌房屋三百餘間咸豐甲
寅七月紅巾賊起龍溪賊首管以均白溪賊首朱阿懶勾結嘉應外匪古聲揚海陽蘇友才盤踞龍溪槍

豐順縣志

卷二十六

雜錄

三

汕頭籌字局梅縣分局承印

掠譚姓倉穀初十日直撲縣城爲官軍擊潰中秋復勾結揭陽賊林元愷紀亞鵠踞大田劫葉華復進攻
縣城甫至上林坑爲官軍鄉勇合勦古聲揚授首被殲同治乙丑十二月江南髮逆大股由嘉應竄北溪
先鋒衝至白溪壩石子岌口被營兵諸截竄回北溪隨招降而散此乃地遠所致不然區區之衆烏能禦
數萬之巨寇者哉（前錄大田譚氏譜遇異記）

丁雨生制軍日昌自巡撫福建乞歸養病在籍奉旨加總督銜會辦南洋海防節制沿海七省水師兼總
理各國事務大臣爲大夫人修基於湯坑之犁頭山時李鴻章總督直隸兼軍機北洋大臣以丁憂請開
缺太后准給假百日在任服喪李力求開去直督缺乃諭舉人自代李以日昌荐報可奉諭先電徵本人
同意李急電惠潮嘉道轉達原電於正月初一日到潮飛足專遞時日昌尚在犁頭山墓廬初三日辰由
其弟親送至山望見一白虎從墓後去及見面舉以告日昌默然不答既見其兄尙穿素服始悟失言隨
反湯坑旋擬電覆并作書分致京中樞要越日遂不適既而其病初七日過揭陽園寓旋接京電知督直
硃諭已下迄初十日竟淪然長逝暫未發喪儘人畫跪像十二日上諭遞到府諸昆季皆吉服捧跪像出
迎既畢乃發喪奉詔賜卹賜祭此實錄也民國間竟有污衊公歿爲自盡者騰諸汕報故述之以正其妄

李介承著鴻泥雜述

豐順屯田始於明洪武初兵荒後耕稼久廢兵食告匱乃改元帥府爲衛置屯以聚兵置兵以衛民各屯
有官受田則各軍有數納糧則每年有額分界前軍民各別始則屯軍自耕後則變爲屯丁久則屯丁又

以佃戶代耕坐食其利而歸其餘於官既而佃反爲主問田所在而屯丁不知也其貧者又私將屯田轉賣佃戶而佃戶復展轉變賣積至清初既不復可理雍正間裁併衛所屯田糧丁並歸縣官管理有司憚于清查祇歲依舊額向佃徵收蓋已變爲民田矣縣屬屯田額原三十六頃六十九畝有奇俱在潘田墾墾小產葛布四社因水衝沙壓共荒去四頃二十二畝零實存三十二頃有奇歲征熟稅米七百四十石有奇向於墾墾設置屯倉由縣令派員駐倉經管早冬兩造各屯戶依額送倉完納皆折米完穀公家於時出糶新陳代謝歲以爲常所謂屯田蓋僅有其名而已民國初年廣東政府清理官產令邑民價領屯田按額計值官給執照另自立契補稅遂變賣一清屯倉亦並拍賣今屯田已成爲歷史上之名詞矣然民間執管契照猶是屯田名義久後發生枝節或輾轉涉訟將有茫然不知其所由來者矣此亦關係縣民生利病之端也迨二十四年縣參議會諸人倡行清丈田畝履畝征稅本屬良法顧當事者一以漁利爲務得賄則以廣爲狹索賄不遂則以狹爲廣田畝面積不實科稅又高下不平輕重任意怨惡滋甚且有不將畝數列冊者非重行清丈決不足以正稅收而維民生關係尤重故略述其始末以詔後世

雜述

鴻泥

韓江匪劫商船向在豐埔交之黃竹基河面因兩縣無確定界限每遇劫案兩縣長吏互相譏卸不理故劫掠頻仍光緒乙未潮州府道鎮會商於兩縣交界地點建立卡房撥兵駐防邑令鄧衍熹奉文諭紳士陳期昌勘定庵子前跌牛石磯頭建築卡房一所配巡船一艘撥把總一員兵五十名旋以兵多滋擾裁

豐順縣志

卷二十六

雜錄

四

汕頭韓字局編縣分局承印

撤自是兩縣轄境即以卡房所在地爲鴻溝分界而劫船案至今皆熄轄境界限關係治安如此鴻泥雜述墾墾地濱韓江沿岸鄉村青年婦女在昔投江自沉之風極盛俗以爲河伯娶婦所致光緒間邑紳陳期昌呈縣令仿韓公祭鱷魚事祭告河伯以維民命略云三十年來婦女投江死者不下三四百人皆年十六至二十歲未經生子兼有姿色者三五成羣或針線互紉其衣裳或以繩帶並繫其手足更互結其髮視死如歸傳聞河干時有水鬼露出真形五六爲羣皆係青年男子有人見而問之答云到某處娶親初不知其爲鬼也詎旬日內是處即有婦女投水者又有婦女投江被救回者皆言當時所見非水有見爲華屋樓臺者有見爲樓船畫舫者中有男子招之如小產村陳益陳彩之妻約同伴六人投江其四人不及往猶昏迷若狂恨嘆不得與之同居尤爲目見事實邑令許曾濟因於七月十五日率當地紳耆備牲牲爲文祭河伯於墾墾江干其文有云蜃樓海市幾迷化鶴之心裙布荆釵悉葬江魚之腹推原其故厥非無由或見男子相招約同居而同穴或見樓船可住羨美奐而美輪夫婦雖夙世之緣人鬼豈嘉耦之配嘆鰥魚之夜泣儼然求娶人間矜鸞鳳之待年忽爾同登鬼錄惟願河伯威靈驅逐邪祟免令孤魂無主出爲厲階庶使生命免付波流等詞祭畢投之江中自是其患遂息是果河伯之有靈耶抑官紳神道設教之效歟鴻泥雜錄

客族婦女每歲元宵中秋皆喜迎紫姑以下休咎俗亦呼請尿缸姑大抵取龜絡作問架以竹紮之外套女衣上飾爲髻如婦人狀腰間繫以鎖匙多枚若環珮使俯仰之間鏘然有聲乃羣擲向廁所焚香燭禱

而迎之習俗相沿已久攷異苑紫姑本人家妾其婿名子胥爲大婦曹氏所嫉每以穢事相次役正月十五感憤而死故世人於是日作其形夜於廁間或猪欄迎之祝曰子胥不在是曹姑亦已歸小姑可出戲繆者覺重便是神來奠設酒果亦覺貌輝輝有色卽跳躑不已能占衆事卜一年蠶桑此所記與吾鄉婦女所事者無少異惟祝詞則曰紫姑快快來莫向溪間弄青苔既有長竿送汝續又有短竿送汝歸玩其詞意殆似紫姑投水自沉者章大炎謂客族語言敦古風俗亦多存中原之舊今以迎紫姑一事証之誠信而有徵鴻泥雜述

婦人夫死再嫁始自漢光武姊湖陽公主厥後蔡文姬適河東衛仲道衛亡爲胡騎所獲事左賢王生二子曹操憐蔡邕無嗣遣使贖歸再嫁陳留董祀蓋天家才人皆已有之宋士大夫最講禮法以再嫁爲恥然范文正公之母改適朱氏文正幼隨母居長山旣貴凡所推恩多予朱姓子弟其長子范純佑與王陶爲僚婿陶妻亡再婚范氏長姨文正聽其改適客族夫亡再嫁不以爲怪有由來也惟有遺孤可託則守節而終故松貞柏節每邀榮褒蔚爲風教若夫死而已無所出或養子爲嗣或夫妻情重以身爲殉均數見不鮮至於生離改嫁向爲社會所不齒但近數十年來已習爲常事此亦風俗變遷之一端也鴻泥雜述客族婦女時夏皆帶涼帽制用竹織其式爲圓箔中開一空以容頂髻周圍以三紗羅布分五幅摺而下垂旣可周遮其頭面長夏操作可以迎風障日此制實創自東坡坡老謫惠州携朝雲隨侍暇輒令朝雲藝園蒔花故製此帽戴之斜陽細雨中娉婷操作波老則笠屐其間以消永日鄉村婦女遂羣相效尤習

豐順縣志

卷二十六

雜錄

五

汕頭鎮字局梅縣分局承印

而成俗內則女子出門必擁蔽其面西婦以薄紗籠首然均無障日迎風之作用宜涼帽爲村婦所習用也鴻泥雜述

豐順縣轉水村洪姓先祖某以織屨爲業村北小山上有老屋一椽久無人居相傳屋內有妖某利其地寬假以工作嘗於月夜見廊下有黃白馬出沒因發掘之得黃白金各一甕遂致巨富論者謂黃白馬實金銀氣充溢所致杜詩不貪夜識金銀氣諸家註解異詞此事其可爲杜詩作鄭證矣鴻泥雜述

豐順占頭村明季有一老人遊居小山上築屋如塔而居鬚眉幡然不示人以姓氏時有冠劍之輩遠來訪謁餽遺甚豐歿卽葬於此世稱之曰塔君曰塔君夫人里人奉之爲神故其地今名塔子下論者謂係明季隆武帝在閩殉國其遺臣遁逃避居於此者惟無可攷證乾隆初有陳立齋者於山下築屋掘獲藏鏹甚豐疑卽爲老人所遺至今居民歲祀不輟鴻泥雜述

豐順官溪鄉張丹客今張氏始祖也因掘地獲鐵屑一枚拾之歸投諸飼鴨盆中鴨食穀既盡越日復滿奇之乃投諸銀米中其銀米皆取之不盡遂致巨富嗣因乏鹽復移至鹽缸中竟失其效或曰錢遇鹹則生銹宜其生機爲鹽所毀滅也鴻泥雜述

釋迦策古寺明代有一老僧嘗往八十里外之湯坑市購物不逾時卽歸來寺中有飛行絕迹之能一日山澗中有石蛙跳入僧茶煨內僧擲去之旋復跳入如是者數次老僧素持齋戒其嚴大異之最後乘怒取而生吞焉竟破戒僧亦離寺而去不知所終堪輿術現世斥爲迷信在昔盛行則甚驗豐順有黎立南

張賓佐譚方哲三人同往江西興國學其術既歸黎則擇湯坑今丁氏光祿祠地址時丁氏尙未建祠黎竭畢生之力謀不就譚則擇縣學宮地址厄於吳六奇大平公館僅購其旁屋地三間後乃公諸建立學宮張兄弟五人就建橋圍內建屋一連五座既落成張私語其妻曰圖分得二三兩座之一則居此否當移居他地其妻謂我先代圖不得汝可持異議復圖詎兩次均圖不得遂遷居江西今建橋張氏數千人皆二三兩座祠裔餘皆百數十人而已由今視昔若能前知者然知之而不能自致雖人事亦天道也曾國藩謂富貴功名冥冥中自有主宰非人力可能強致今世之謀佔墳墓爭奪佔築不惜搆訟械鬥以求其所欲者其亦知所返矣鴻泥雜述

豐順產溪李屋壩有古榕二株樹身各插一鐵釘銜以鐵鎖詢據鄉人稱昔年行客過此每值黃昏輒有二女子招邀誘惑久之始知其爲妖怪有舉以問諸神者謂此爲溪上古榕所化故以釘鎖鎖之後遂絕迹余聞多年古木其根深入地層凡盤及枯骨者往往化爲妖物所化皆如其枯骨之形是或然歟鴻泥雜述

豐邑之北部有吳翼德者死其鄰人徐番之畜小狗奔其喪不返人皆異之吳居蛙湖徐家溫坑皆山谷之民素不相往來且相距二十里中隔高山嶺複林深鳥道紆曲小狗生數月耳吳朝而死小狗夕而往逕入吳門臨其尸且喁喁若哭泣者日夜蜷伏於靈前及葬則又先執紼者而行既歸復依其家不去既而徐番以失狗聞閭旬日有傳其尙在吳氏家者或曰小狗於吳必有前生之因果關係可異也鴻泥雜述

豐順縣志

卷二十六

雜錄

六

汕頭鎮字局梅縣分局承印

述

建橋張硯丞家有瓷杯六枚枚底有禮樂射藝書數各一字依其形式大小以次疊之則成一枚俱完好無缺據稱係某農家於一渡水山坡墾荒掘得之其地舊爲明代江姓宅址杯藏於井涵中云徵訪
隴隍居林村朱泉生家舊有硃砂山一座古瓶一尊爲清仙遊令朱孔璋所遺聞係某制軍貢品古瓶已於昔年售諸外人得價數千元其珍貴可知今惟硃砂山尙存殆硃砂礦自然結構形成小山者有丘壑之勝云徵訪

沙田鄉楊次岳家有雙魚瓷壺一尊詢據係先代自黃沙溪田壁中所掘得者漢有雙魚洗此壺亦古物也其家尙有前明古瓶二樽磁盤多枚皆順治間其先祖楊貞參軍所遺傳者徵訪

李介丞舊有伏波杯盤各一枚爲龍州林大令大年所贈者據述咸豐間興築龍州城於東門外馬伏波紫大營故址所出土者質厚及來而色白成龜裂紋杯底微陷不類近代製又有晉磚晉瓦各一方大及尺中刻大晉官監製六字磚旁刻永嘉五年字樣皆購自廣州市東郊民家掘古塚所得者又有養利縣催生石多枚爲黃令忠浩所貽石產養利縣城北溪間取其形如琢琢成陰陽者用白布加蓋縣印裏之謂產婦分姪時令兩手各納其一則生產異常順利云余不欲却其雅誼姑受而藏之

民國十六七年共黨之亂東北平縣幾無乾淨土日殺人如麻其屠戮之慘酷視牛頭馬面刀山劍樹之刑尤毒有割人頭拋鄉爲戲者曰踢皮球逼使被殺者自掘地四五尺深驅而活埋之曰種人樹剖腹挖

心取其心使死者自視之曰驗心肝臠割其皮使血花四濺者曰人開花又鄰邑高陂羅氏婦生子女各一入學校有年投共黨中向母氏索款不應與共匪割其母兩乳名之曰食母奶若麻醉青年婦女同爲禽獸猶其罪惡之餘事也鴻泥雜述

逐犬獵獸張羅弋鳥皆山民農隙所有事也若獵蜂則絕無而僅有者吾鄉李萃居深山而耕暇輒取鳥獸或獵蜂爲生事其獵也日登山坳熟視採花之蜜蜂先察其頭毛之有無以別其爲野蜂或家養者繼注視其所去之方向今日登東山之坳明日則登西山之坳均就其方向各殊之中間於岩石古樹之空隙求之百不一失每歲輒獵得蜂羣無數每羣估值六七金而又有蜜糖之利所得亦豐矣余謂此其察微知著頗有科學頭腦鴻泥雜述

羅芝達藍田上陽人九代單傳性謹愿年四十八尙鰥居蓋一茅屋於濱水之區養鴨數十日作暮息習以爲常某日黃昏有狀類行商者肩挑兩巨箱道經其門詢芝達曰某乃行商時值歲暮急於旋里知君素謹愿將兩巨箱寄存君家倘明歲上元節後某不來君可啓箱取用及期其人不來再越兩載其人踪跡竟渺芝達啓箱視之則纍纍者皆黃白物也卽此以發家置良田百餘頃娶妻生子孫旬雍正舉人曾孫慎貢元迄今子孫盈千雲初繼起爲羅家約一望族書羅芝達得金事

